

DE
ATTRITIONE
EX METU GEHENNÆ

E I U S Q U E

CUM SACRAMENTO POENITENTIÆ
S U F F I C I E N T I A

Juxta mentem S. Concilii Tridentini
Contra

DISSERTATIONEM DOGMATICAM

Exim. P. CHRISTIANI LUPI

E T

QUÆSTIONEM QUODLIBETICAM

Exim. P. FRANCISCI FARVACQUES

S. Theol. Doctorem, Ord. Erem. S. Augustini

AUCTORE

MAXIMILIANO LE DENT

WINOCIBERGENSI,

Societatis JESU S. Theol. Professore

LOVANII.



Mechliniæ, Typis Gisberti Lintsil 1667.



OCCASIO SCRIPTIOIS

A D

LECTOREM.

ANni jam sunt circiter viginti septem, cum occasione quarumdam sententiarum rursus in lucem emissarum, quas jam pridem Doctorum consensus (ut alia taceam) sopierat aut extinxerat, gravissimè exortæ sunt hic & in Galliis inter Theologos concertationes. Inter illas una fuit, quam hîc tractandam suscepimus, de Attritione ex metu gehennæ, quæ asserebatur nec esse actus supernaturalis seu ex gratia per Christum, neque ullo modo excludere posse voluntatem peccandi, adeoque nec ad justificationem sufficere accedente Baptismi aut Pœnitentiæ Sacramento. Verùm quia, ut fieri assolet, minores curæ pelluntur aut sopiuntur à majoribus ac gravioribus: cùm quædam recens exortæ doctrinæ capita essent, quibus periculum, imò & exitium jam jam videbatur imminere, ad ea præcipuè utriusque partis studium, & acrior concertatio conversa est: refrigescente interim disputationis ardore circa alias quasdam quæstiones, quæ minoris momenti videbantur, ut de Attritione, de ignorantia invincibili, & ejusdem generis alias: quæ tamen resumptæ postmodum fuerunt, præsertim post decidam à legitimo Judice circa præcipua dogmata controversiam. Illas acerrimè propugnandas susceperunt, ac oppositas omnium pœnè Catholicorum sententias earumque Auctores calumniis ac insigni maledicentia impetierunt jam pridem in Gallia Montaltius & Wendrockius larvati hostes: horum tamen auctoritate, sat scio, pro sua sententia non utentur Adversarii, si vel librum ipsum, vel judicium Episcoporum ac Doctorum Parisiensium ad examen illius libri deputatorum inspexerint.

In Belgio ante quinquennium prodiit folium chartæ inpressum, nomine Parochorum Gandensium, in quo nituntur ostendere,

dere, Attritionem ex metu gehennæ conceptam, sine ulla Dei propter se dilecti motivo, non sufficere ad veniam peccatorum cum Sacramento impetrandam; quod scriptum suo calculo approbavit Facultas Theologica Lovaniensis. Verum cum in illo assereretur potius, quam firmo aliquo aut verosimili argumento firmaretur, nemini ex communis sententiæ propugnatoribus curæ fuit, isti folio quidquam reponere.

Tandem circa mensem Julium anni proximè elapsi ferè simul in lucem prodierunt duo justæ pro materia molis libelli, quorum alteri titulus est: *Dissertatio dogmatica de germano & avito sensu Sanctorum Patrum, Universæ semper Ecclesiæ, ac Sacrosanctæ præsertim Tridentinæ Synodi, circa Christianam Contritionem & Attritionem.* Alteri verò *Quæstio Quodlibetica de Attritione.* Illa Auctore Eximio Patre Christiano Lupo; hæc Auctore Exim. P. Francisco Farvacques; utroque Sacræ Theologiæ Doctore Ordinis Eremitarum S. Augustini. Ad præviam horum opusculorum famam, avidè multi illa expectabant, tum ut ex illis discerent, quænam tandem esset communis sententiæ adversantium mens, quam usque ad illud tempus, saltem quoad multa, non habebant satis perspectam, utpote ab Adversariis non plene explicatam, & ut in sententiis malè fundatis fieri solet, diversis diverso modo & non satis constanti ac unanimi sua sensa exprimentibus: tum etiam ut intelligerent, quibus tandem & quam solidis nixi fundamentis, sententiam apud omnes passim receptissimam tentarent convellere. Comperi autem tum duos hos Auctores, tum alios passim omnes, qui Attritionem ex metu gehennæ conceptam, tamquam in Sacramento insufficientem ad veniam, rejiciunt, licet alias quasdam rationes diversi diversas afferant, omnes tamen in hæc duo præcipua illius sententiæ fundamenta unanimiter consentire. Alterum petunt ex Concilio Tridentino sess. 6. cap. 6. ubi ait: *Illumque tamquam omnis iustitiæ fontem diligere incipiunt.* Alterum verò & primarium ex eo, quod metus gehennæ, & Attritio inde tamquam unico & adæquato motivo concepta,

non possit excludere (nimirum positivè) voluntatem peccandi: Imò volunt ex ipsis aliqui dolorem peccatorum ex metu gehennæ, nisi simul adsit Dei super omnia dilectio propter se, necessariò ac inseparabiliter sibi conjunctum habere actum voluntatis peccaminosum; quin ipsum quoque talem dolorem peccaminosum esse.

Cum autem hoc anno scholastico juxta distributionem materiarum Theologicarum in scholis nostris observari solitam, tradenda mihi obvenisset materia de Sacramento Pœnitentiæ, existimavi operæpretium fore, fusiore solito disputationem instituere de Attritione ex metu gehennæ, ut sic plenè instructi essent Auditores in tota hac quæstione, quæ hoc tempore apud quosdam hîc maximè controvertitur, & à duobus S. Theolog: Doctoribus eodem tempore, junctis quasi viribus, impetebatur. Quare fundamenta illorum singula ac rationes, quibus aut suam stabilire conantur, aut nostram oppugnant sententiam, proposui ac dissolvi, communemque doctrinam stabilivi.

Ea quæ discipulis tradideram, cum ad aliorum quoque manus pervenissent, & hi lecta approbassent; visum fuit iis, ad quos id pro muneris ratione spectat, illa, quæ distavera, prælo subjicienda, quò ad plures pervenirent, ut si qui Doctorum præfatorum rationibus, vel (ut apud multos usu venit) auctoritate potius moti, sententiam communem vel ut falsam, vel ut dubiam habere cæperant, hoc tractatu perlecto clarè intelligant, quam parum roboris insit argumentis, quæ contra illam intorserunt, nihilque omnino ab illis effectum esse contra eam, quam oppugnarunt, ex metu gehennæ conceptam Attritionem, hujusque cum Sacramentis Baptismi ac Pœnitentiæ sufficientiam.

Videbor fortasse aliquibus de illa quæstione, an metus gehennæ excludere possit voluntatem peccandi, egisse pluribus, quàm in re per se notâ, omnibusque aded manifesta opus sit. Necessarium tamen id duxi, quia opposita sententia primarium est partis adversæ fundamentum, quod proinde radicitus convulsam oportuit, & cum illam vix stabiliant, nisi aliquot D. Augustini

gustini testimoniis, plurium Patrum adduxi testimonia, quò manifestum omnibus fieret, quis hac in parte sit communis ac unanimis eorum consensus; referunt etiam, è præcipuis nonneminem asseruisse, nostram de Attritione sententiam Concilii Tridentini placitis conformem esse, si modò ostendi posset, metum gehennæ excludere omnem peccandi voluntatem.

Id unicum in hoc tractatu specto, ut suus sit veritati locus, ac omnibus constet, quæ peccatori ad reconciliationem cum Deo sufficiens sit dispositio ac præparatio: sufficiens, inquam, neque enim quæstionem hîc instituimus, quænam præparatio majoris sit perfectionis ac meriti apud Deum; certissimum enim apud omnes est, actum charitatis Dei propter se suamque bonitatem, reliquos omnes longè antecellere. Hinc, qui ad perfectionem nituntur, comparando charitatis fervori summo studio incumbunt, neque contenti peccata ex amore Dei detestati, eundem quoque scopum reliquis actionibus præfigunt. Charitatis studium passim inculcæant Scripturæ, SS. Patres, & quotquot de vita spirituali ac perfectione tractarunt. Eandem, & quidem quàm fieri potest perfectissimam, in suis passim requirunt Sancti Religionum Fundatores. De illa hanc habet Societas S. P. N. IGNATII constitutionem part. 3. Constit. c. 11 §. 26. quam refert, eâque tamquam gemmâ opusculum suum concludit & consignat Exim. P. Farvacques: *Omnes RECTAM habere INTENTIONEM studeant, non solum circa vitæ suæ statum, verùm etiam circa res omnes particulares, id semper in eis sincerè spectantes, ut serviant & placeant divinæ bonitati PROPTER SEIPSAM & propter charitatem & eximia beneficia, quibus prævenit nos, potius, quàm ob TIMOREM POENARUM, vel SPEM PRÆMIURUM (quavis hinc etiam juvari debeant) & crebro admoneantur ut in omnibus quarant Deum, exuentes se, quantum fieri potest, amore omnium creaturarum; ut affectum universum in ipsarum creatorem conferant: Ubi rectè advenit P. Farvacques in actionibus omnibus includi haud dubiè confessionem peccatorum. Hinc tamen nemo interet id esse absolutæ obligationis,*
leu

AD LECTOREM.

ſeu de neceſſitate Sacramenti, niſi qui crediderit, nihilo plus à Religioſæ vitæ ſectatoribus eorum Regulas ac Conſtitutiones requirere, quàm quæ omnibus fidelibus ſunt abſolutè neceſſaria. Optandum proſectò eſſet, ut, quàm à nobis requirit Fundator noſter charitatis perfectionem, ea in fidelibus omnibus reperiretur, ad quam proinde pii ac prudentes animarum directores tum in concionibus, tum in confeſſionibus, tum in aliis ſpiritualibus inſtructionibus ac Exercitiis provehere alios conantur, & cum fructu conati ſunt hætenus. Verùm, ut in omnibus planè is ſit charitatis fervor, optandum potius eſt, quàm ſperandum: neque, licet id impetrari facilè ab omnibus poſſet, idcirco ea, quæ conſilii & perfectionis ſunt, à veritatis amante conſundi deberent cum neceſſariis. Videamus igitur, qui noſter eſt ſcopus, non quid perfectius ſit, ſed quid requiratur ac ſufficiat ad gratiam in Sacramento impetrandam. Eo utar ordine ac proponendi ac probandi ratione, quæ mihi viſa ſunt, poſſe maximè ad claritatem conducere, ut cum quæſtio omnes concernat, omnes quoque etiam vix in Theologicis verſati, veritatem conſpiciant: quod an affectus ſim, Lector benevolus judicet.

INDEX

INDEX

CAPITUM ET PARAGRAPHORUM.

CAP. I. Proponitur doctrina Tridentini opposita doctrinæ Lutheri.	pag. 1.
CAP. II. Quid significetur per vocem Attritio.	3.
CAP. III. An timor gehennæ solum possit retrahere à peccatis externis.	7
CAP. IV. An Attritio ex metu gehennæ habeat necessario conjunctum aliquem voluntatis actum peccaminosum.	10
Paragr: 1. <i>Quanam necessariò consequantur ex doctrina P. Lupi.</i>	11
Par. 2. <i>Resolvitur quæstio proposita.</i>	14
CAP. V. An dari possit timor gehennæ qui excludat omnem voluntatem peccandi.	17
Par. 1. <i>Declaratur volitio efficax.</i>	18
Par. 2. <i>Resolvitur quæstio.</i>	21
Par. 3. <i>Solutio Argumentorum.</i>	28
Par. 4. <i>Responsio ad testimonia D. Augustini.</i>	34
CAP. VI. An timor gehennæ & dolor peccati inde conceptus bonus sit & honestus.	42
CAP. VII. An timor gehennæ & dolor peccati inde conceptus sit supernaturalis.	51
CAP. VIII. An attritio concepta ex metu gehennæ in Sacramento Pœnitentiæ justificet.	55
Par. 1. <i>Primum argumentum.</i>	ibid.
	Par.

INDEX

Par.2. <i>Alia evasio P. Lupi.</i>	59
Par.3. <i>Alterum argumentum.</i>	63
Par.4. <i>An & qui nostram sententiam docuerint ante Tridentinum.</i>	65
Par.5. <i>Duo alia argumenta.</i>	71
CAP. IX. <i>Solutio eorum quæ proponuntur in Quaestione Quodlibetica: ubi sequentibus novem Paragraphis novem argumenta Patris Farvacques dissolvuntur.</i>	74
Par.10. <i>Argumenta quædã ex Tridentino conglobata</i>	91
CAP. X. <i>Satisfit aliis argumentis, potissimum iis quæ à P. Lupo proponuntur in Dissert: dogmat:</i>	94
CAP. XI. <i>Quæ fuerit mens DD. hujus Academix de Attritione ex metu gehennæ.</i>	97
Par.1. <i>Ad articulos Universitatis & Adrianum VI. ibid</i>	
Par.2. <i>Quid senserint ii, quos adfert paragr. tertio.</i>	100
Par.3. <i>De Cunero Petri, & Rosemundo.</i>	102
Par.4. <i>De Estio, Lindano & Gravio.</i>	104
Par.5. <i>De Jacobo Baio, Latomo, Joanne Beets, & Joanne Briaert.</i>	106
Par.6. <i>De Joanne Driedone.</i>	109
Par.7. <i>De Lensæo, Molano, Stapletono.</i>	112
Par.8. <i>Autores Universitatis Lovaniensis, qui docuerunt sufficere Attritionem ex metu gehennæ.</i>	114
CAP. XII. <i>Quodnam sit discrimen Attritionem inter & Contritionem.</i>	114

FACULTAS
R. P. PROVINCIALIS

EGO infrascriptus Societatis JESU Præpositus Provincialis in Provincia Flandro-Belgica, potestate ad hoc mihi factâ ab Admodum R. P. N. JOANNE PAULO OLIVA Præposito Generali ejusdem Societatis, concedo *Gisberto Lintsio* Typographo facultatem typis mandandi Tractatum *de Attritione ex metu gehennæ, ejusque cum Sacramento Pœnitentiæ sufficientiâ &c.* à R. P. MAXIMILIANO LE DENT Societatis nostræ Theologo scriptum, & à deputatis ejusdem Societatis Theologis examinatum & approbatum. In quorum fidem has manu mea subscriptas & officii mei sigillo munitas dedi: *Antverpiæ 15. Februarii 1667.*

ÆGIDIUS VANDER BEKE.

C E N S U R A.

CUM Tractatus *de Attritione ex metu gehennæ, ejusque cum Sacramento pœnitentiæ sufficientiâ*, à R. P. MAXIMILIANO LE DENT è Societate JESU S. Theologiæ in Universitate Lovaniensi Professore compositus, doctrinam S. Concilii Tridentini firmis rationibus tueatur, & quæ in oppositum adferuntur, solidè diluat; typis merito mandari posse censeo. *Bruxellis 8. Februarii 1667.*

MATTH. MIDDEGAELS Decanus
in signis Collegiata DD. Michaëlis &
Gudila, Oppidi Bruxellensis, Lib. Censor.

DE ATTRITIONE

EX METU GEHENNÆ

EJUSQUE

cum Sacramento pœnitentiæ sufficientia

CAPUT PRIMUM.

*Proponitur doctrina Tridentini opposita doctrinæ
Lutheri.*

Quia non parum utilitatis ad rectam Conciliorum intelligentiam confert, scire quinam illi sint, & qui eorum errores, quos Concilia impetunt, & proscribunt: operæ pretium erit ante omnia uno quasi intuitu spectandam exhibere doctrinam Lutheri, eique oppositam Tridentini; ut ex ipsa verborum inter se collatione manifestum fiat, id à Concilio approbati, quod reprobatat Lutherus; ut dum inde aliquando petemus argumenta, necesse non sit Lutheri verba sæpius repetere.

2. Lutherus sermone 2. de pœnitentia ita habet: *Contritio* (scilicet enim caput vocari pœnitentia interior) duplici via paratur. Primo per *diffusionem*, *rejectionem*, *detestationem* peccatorum, quæ quis, ut dicunt, *retrahat annos suos in amaritudine animæ suæ*, ponderando peccatorum gravitatem, damnum, sceleratam, multitudinem, deinde *amissionem æternæ beatitudinis*, ac æternæ damnationis acquisitionem, & alia quæ possunt tristitiam & dolorem excitare spe satisfaciendi per bona opera. Hæc autem contritio facit hypocritam, imo magis peccatorem, quia *solum timore præcepti & dolore damni id facit*. Et tales omnes *indigne absolvantur & communicantur*. Et si libere deberent (remoto præcepto & minis pœnarum) confiteri, certe dicerent sibi non displicere eam vitam præteritam, quam sic coguntur displicere confiteri, in quo magis timore pœnæ & dolore damni sic conternuntur, eo magis peccant, & assuntur suis peccatis, quæ coguntur, non autem volunt odisse. Et hæc est illa contritio, quam ipsi vocant *extra charitatem* non meritoriam, alii vocant, *attritionem* proximè disponentem ad contritionem, sic enim ipsi opinantur, quam opinionem errorem ego iudico.

3. Secundo paratur per intuitum & contemplationem speciosissimæ iustitiæ, quæ quis videt hanc in pulchritudine & specie iustitiæ meditatus in eam ardētius & rapitur, incipitque cum Salomone fieri amator sapientiæ, cuius pulchritudinem viderat. Hæc facit verè pœnitentem, quia amore iustitiæ id facit, & huiusmodi ab omni attritione. In sequentibus dicit
A quod

quod virtutis species non sit intuentia *abstractivè* sed *concretivè*, ut nempe *intuentis homines qui tali virtute licent*. Undè datur intelligi, quod Lutherus solum requisierit amorem iustitiæ creatæ.

4. È contra Tridentinum sess. 14. cap. 4. *illam verò contritionem imperfectam quæ attritio dicitur, quoniam vel ex turpitudinis peccati consideratione, vel ex gehennæ & poenarum metu communiter concipitur, si voluntatem peccandi excludat cum esse veniæ, declarat non solum non facere hominem hypocritam & magis peccatorem; verum etiam donum Dei esse & Spiritus S. impulsum, non adhuc quidem inhabitantis, sed tantum moventis, quo poenitens adjutus viam sibi ad iustitiam parat. Et quamvis sine sacramento poenitentia per se ad iustificacionem perducere peccatorem nequeat; tamen enim ad Dei gratiam in sacramento poenitentia impetrandam disponit.... Quapropter falsò quidam calumniantur Catholicos scriptores quasi tradiderint sacramentum poenitentia absque bono motu suscipientium gratiam conferre, quod numquam Ecclesia Dei docuit aut sensit. Sed & falsò docent contritionem esse extortam & coactam, non liberam & voluntariam.*

5. Deinde in Canone 5. qui respondet capiti citato, ita loquitur: *Si quis dixerit eam contritionem, quæ paratur per discessionem, collectionem & desolationem peccatorum, quæ quis recogitat annos suos in amaritudine anime suæ, ponderando peccatorum suorum gravitatem, multitudinem, scditatem, amissionem æternæ beatitudinis, & æternæ damnationis incursum, cum proposito melioris vitæ, non esse verum & utilem dolorem, nec præparare ad gratiam, sed facere hominem hypocritam & magis peccatorem; demum illum esse dolorem coactum & non liberum ac voluntarium; anathema sit.*

6. Quæto an ullus negare possit Concilium hic primum illum contritionis modum rueri ac retinere, quem Lutherus rejiciebat, iisdem fere verbis descriptum? Profecto si umquam ex Conciliorum verbis colligere licuit quos hereticos, quosque horum errores damnarent, hic manifestissimè patet adstrui veritatem Catholicam eo sensu, quo impugnarat Lutherus.

7 Dixerat autem Lutherus hanc contritionem facere hypocritam & magis peccatorem, id iisdem verbis Concilium rejicit, addens esse bonum & utilem motum ac impulsu Spiritus Sancti, adeoque supernaturalem actum.

Asserebat Lutherus cum solo dolore ex metu peccatorem indignum seu indispositum esse ad absolutionem; Tridentinum è contra asserit ad gratiam Dei in sacramento poenitentia impetrandam disponere, præparare ad gratiam.

Denique illum dolorem vocaverat coactum & non voluntarium; quod ibidem reprobat Tridentinum.

CAPUT II.

Quid significetur per vocem attritio.

Quia quibusdam libuit novam, & à communi, ac ab ipsius Concilii Tridentini sensu abhorrentem ejus vocis significationem comminisci; antequam ad alia progrediamur, necesse est ostendere, quid hac voce *attritio* seu *contritio imperfecta* importetur.

8. De hac ita loquitur Exim. P. Lupus in sua dissertatione dogmatica nuper excusa pag. 83. *Attritio seu contritio imperfecta, ut vera sit, omnino esse debet germana, & quidem affectu saltem super omnia Dei dilectio* & pag. 33. *Dei super omnia quoad affectum dilectio inesse debet, ac semper inest etiam imperfecte ex gehennarum servili metu concepta attritioni.* & pag. 12. *Proinde per timorem solum circa charitatem de peccatis concepta contritio, est contritionis ficta.* Quare juxta hunc auctorem, ut sit veri nominis attritio, debet esse dolor de peccatis conceptus ex germana Dei super omnia dilectione tamquam motivo, sive interim hoc sit motivum adæquatum, sive tantum inadæquatum, simul nempe movente metu gehennæ.

9. Idem per attritionem intelligit Jansenius. Tom. 3. lib. 5. cap. 34. Similiter Lutherus non agnoscit pro vera contritione seu attritione actum, qui pro motivo habet solum metum gehennæ, cujus hæc verba refert Roffensis loco statim citando: *Primum hoc nemo negabit, contritionem quantumlibet magnam, nisi fiat amore justitiæ, & (ut ipsi dicunt) in charitate, non est vera sed simulata.* Quod quid est aliud, quam esse fucum contritionis?

Hæc, ut dixi, attritionis notio aliena est à communi reliquorum intellectu, qui per attritionem seu contritionem imperfectam intelligunt dolorem peccatorum conceptum ex metu gehennæ, spe præmii cælestis &c. sine ullo Dei propter se dilecti amore.

10. Hoc sensu ante Tridentinum usurpatam à Catholicis attritionem testatur Joannes Fischeus Episcopus Roffensis, qui ad articulum 6. pag. 404. ad verba Lutheri relata num. 9. ita respondet: *At hoc silere non possum, quod cum non ignores istos, adversum quos conflaturis (id est Catholicos) contritionem asserere motum esse quendam animi formatum charitate, præter quem & alium cordis motum statuum charitatis experiem, quem vocant ATTRITIONEM.* In quem etiam sensum præmiserat pag. 400. *Cum contritio potest duobus parari modis, hoc est, vel per timoris, vel per amoris viam, tu timore posthabito solo vis amore contritionem à peccatoribus queri.*

Gabriel Biel in 4. dist. 16. q. 1. art. 3. dub. 1. querens utrum attritio fieri possit contritio, questionem respondet: cum displicentia de peccato sit actus successivus, possunt partes illæ continuari ex diversis causis finalibus v.g. potest quis nolle peccasse propter poenam inferni tantum & post idem velle continuare prop-

ve propter amorem Dei: & istius velle pars prior est attritio, posterior contritio. Quod postea saepe repetit dicens *attritionem & contritionem esse actus habentes diversa objecta, quia diversos fines, ideo differre specie &c.* Ubi etiam explicat quid sit iuxta Petrum de Palude attritionem posse fieri contritionem sicut ex mane fit meridies id est, inquit, *unus actus post alium.*

Eodem modo attritionem intellexisse Alexandrum & S. Bonaventuram, quod nempe attritio & contritio sint à diversis principiis, attritio à timore servili, contritio à timore initiali, testatur loco citato Gabriel. Eodem modo attritionem definit Dionysius Cisterciensis in 4. dist. 23. q. 1. in corollario.

Nec aliter attritionem intellexerunt Joannes à Daventria, Tilmannus Segebergensis, Paulus Cortesius alique Tridentino anteriores. Item Dominicus Sotus, qui impressit sub initia Tridentini, & eodem fere tempore Ruardus Tapperus, quem tamen inter Doctores hujus Universitatis Tridentino posteriores intra recensibimus.

Neque dissimulavit Lutherus hoc sensu à Catholicis usurpari attritionem, ut patet ex ejus verbis supra num. 2. & alibi.

11. Eodem sensu attritionem usurpat Tridentinum supra num. 4. ut patet tum ex oppositione cum Luthero, tum ex iis quae dicuntur infra, ubi refutabimus modum quo aliqui hujus loci vim eludere conantur num. 145.

12. Post Tridentinum constantissima fuit apud Theologos acceptio vocis attritio in sensu jam dicto. Tapperus ad articulum 4. hujus Universitatis pag. 110 *Secundum genus imperfecta displicentiae est, quod oritur ex timore poenarum spiritualium vel aeternarum, quae lumine fidei cognoscuntur, & hanc Doctores scholastici proprie attritionem vocant.*

Mercerus supplem. q. 1. art. 3. *Notandum attritionem rectè definiti esse animi motum, quo efficaciter detestatur peccatum ex motivo supernaturali, quod non sit ipse Deus, quatenus est summum bonum, à quo peccatum nos avertit. Illud autem motivum statim ex Tridentino assignat metum gehennae & poenarum, & foeditatem peccati & ad has duas species revocat dolorem ex amore vitae aeternae &c.*

Wiggers eodem art. pag. 350. *Attritio vero est quidem peccati detestatio cum proposito de cetero non peccandi, sed non procedens ex illa dilectione Dei super omnia, neque ex odio peccati tamquam summi mali eo quod Deo injuriosum sit, eumque offendat, sed ex aliquo alio motivo. Quale postea assignat metum gehennae, bonorum spiritualium amissionem &c.*

Cunerus Petri Tract. de charitate pag. 270. *Verum si quis pleno corde contreratur siue imperfecta hac penituntia ex turpitudine peccati vel gehennae & metu poenarum atteratur &c. Praemiserat autem imperfectam poenitentiam vocari solere attritionem.*

Similiter Franciscus Sonnius Demonstr. de 7. Sacramentis Tractatu 4. cap. 6. dolorem de peccatis ex solo metu pœnæ evadendæ vocat attritionem.

Denique, ne in re manifesta longior sim, Estius in 4. distinct. 16. §. 9. licet nolit dolorem ex metu gehennæ sufficere in Sacramento, cum tamen statuit esse attritionem; cumque alteram enumerasset præterea attritionis speciem, quæ esset ex amore Dei remisso & imperfecto, postea sese corrigens addit: *Ceterum postremi generis attritio vera contritio est, sufficiens sine Sacramento, quando hujus suspensionem excludit necessitas.*

Quos hujus Universitatis Doctores secuti sunt ii, quorum opera impressus est Carechilinus ad usum studiosorum Academiæ Lovanientis, in quo cap. 4. de sacram. rit. de pœnit. petitione 3. dicitur. *Contritio generaliter est duplex, perfecta & imperfecta. Perfecta nomen generale contritionis retinet, imperfecta attritio soles appellari. Et petit. sequentiz: Attritio autem est dolor ex turpitudine peccati consideratione, vel ex gehennæ & pœnarum metu, aut ex motivo alio inferiori, quam Dei super omnia dilecti Spiritu S. inspirante conceptus.* Eandem attritionis definitionem tradunt Vega lib. 13. cap. 34. Iembartus, Gammachæus, Marandè, Lorichius, Petantius, Putcanus aliique innumeri, quos longum esset recensere.

Omittere non possum Sylvium, qui cum in prioribus editionibus circa hanc materiam fuisset ambigüe locus, in quarta demum editione mentem suam explicans supplem. q. 1. art. 1. conclus. 6. ait *ad contritionem, quæ interdum absolute & per autonomiam vocatur contritio, alias autem contritio perfecta, requiritur amor Dei super omnia simpliciter: in hoc enim distinguere solent contritionem ab attritione.* Et pag. 11. asserit principium seu motivum attritionis esse metum gehennæ, aut aliquod aliud motivum supernaturale quidem, sed inferius Deo: contritionis autem perfectæ principium esse aut Deum secundum se, seu ut est summè bonus, aut peccatum in quantum est offensâ Dei propter se suamque bonitatem diligendi &c.

13. Porro ut vitetur omnis æquivocatio bene hic notandum, quod etiam notat Sylvius ibidem, attritionis nomine non venire solum timorem, prout aliqui sibi videntur persuadere; certum enim est, etiam eum qui actu peccat, si occurrat cogitatio de pœna inferni, quam suo peccato incurrit, aliquo timore concitari, in eo tamen nec est nec esse potest attritio, aut ulla veri nominis pœnitentia, neque hoc vel in dubium ab ullo vocari potest. Ad attritionem igitur requiritur ut peccator ex metu gehennæ vel alio simili motivo & peccata commissâ detestetur ac de iis doleat, & proponat numquam deinceps mortaliter peccare, & insuper ut adit spes veniæ à Deo obtinendæ. Contingit enim (ut fere Rossensis) in hac peccatoris pœnitentia, ut dum fides hinc æternos cruciatus peccatoribus à Deo præparatos repræsentat, homo terrore concutitur, considerans in quæ mala suo se vitio præ-

cipizant inde vero dum eadem fides proponit Dei misericordiam ultro peccatores ad gratiam invitantis, fit ut peccator spem veniæ concipiat, ad quam impetrandam peccata, quibus illius pœnæ reus factus est, absolutè & firmiter detestatur & de iis ex animo dolet, omnino optando ea non cõmisisse, futura verò peccata, quibus rursus iisdem pœnis fieret obnoxius omnino statuit non committere, sed in posterum omnibus Dei mandatis fideliter obtemperare.

Et hæc est attritio de qua hic disputatio instituitur, in qua reperiuntur jam dicta, non interveniente tamen perfectæ charitatis seu Dei propter se dilecti motivo.

14. Dixi perfectæ charitatis seu Dei propter se dilecti motivo. Censent enim non pauci in attritione prout eam proximè descripsimus, amorem Dei & quidem super omnia involui. Ita inter cæteros Sylvius supplem. q. 1. art. 1. conclus. 5. ubi cum statuisset, ad attritionem non requiri amorem Dei simpliciter & absolutè super omnia, id est, ut postea explicat, amorem amicitia, vult tamen requiri virtualiter aliqualem amorem Dei super omnia secundum quid. Ita loquitur in probatione: *Ad imperfectam contritionem sufficit, quod ad illum bene afficiatur, & ab illo veniam ac vitam æternam speret, habeatque voluntatem resolutam deinceps non peccandi mortaliter; hic autem amor non est amor amicitia, sed concupiscentia, pertinetque ad spem potius quam ad charitatem..... vera ac sincera ad Deum conversio non potest intelligi sine voluntate placendi Deo per mandatorum eius observationem, hæc autem voluntas non est absque aliqua dilectione Dei, quæ sit aliquo modo super omnia..... sc. ad Deum affici, ut penitens ab eo veniam speret, habeatque voluntatem non amplius ipsam offendendi includit saltem virtualiter illum Dei amorem quo ipse pluri estimatur, quæ quidquid aliud inferius Deo, quandoquidem anteponatur omnibus, quæ possunt hominem ab illius amicitia excludere, hoc ipso nimirum quod cum spe veniæ adest voluntas nunquam illum offendendi mortaliter iste amor non est Dei secundum quod in se summe bonus est & perfectus, quemadmodum nec ejus motivum est Dei bonitas & perfectio, sed aliquod motivum inferius, nupore spes salutis, metus gehennæ & pœnarum, aut consideratio turpitudinis peccati. Hactenus Sylvius; quibus similia habet conclus. 6. ad 1. argum. Eodem fere modo amorem Dei aliquo modo super omnia agnoscit & explicat Andreas Vega libro 6. de Justificatione cap. 30. ut videbimus infra num. 193. aliique.*

15. Quæres fortè quid movere potuerit P. Lupum, ut rejecta communis vocis attritio significatione, aliam substituerit. In promptu est causa, quia illa retenta fateri etiam debuisset, dolorem de peccatis ex solo motivo metus sufficere in Sacramento poenitentia ad justificationem, cum cap. 3. indubitanter asserat & merito, Tridentinum agere de dispositione proxima & sufficienti, quando sess. 14. cap. 4. ait. attritionem *quamvis sine Sacramento poenitentia per se ad justificationem perducere peccatorem nequeat, tamen cum ad Dei gratiam in Sacramento poenitentia impetrandam disponere.*

*An timor gehennæ solum possit retrahere à peccatis
externis.*

16 **A**ffirmat Lutherus, in disputatione Lipsica respondens Eckio ait: *Quod autem Augustinus dicit: timor servilis est cum per timorem gehennæ contines se à peccato: continet inquam se à peccato externo tantum.* Et in litteris ad Spalatium de disput. Lipsica eisdem cohibet manum, intus tamen &c. Denique adversus art. 6. Leonis X. *Sentio perniciosum esse genus docendi, quo intuitu poenarum, prætorum, peccatorum, docentur poenitere; his enim doctrinis coercentur quidem ab opere &c.*

Consonat Jansenius Tom. 3. lib. 5. cap. 35. ubi inter fructus timoris gehennæ enumerat, *quod quamvis à peccato animum non contineat manum tamen cæteraque coercet membra, ne in facta proficiant.*

17. Conformiter P. Lupus pag. 69. ait: *gehennarum metum solum manum aliaque membra compescere.* Et pag. 61 asserit timorem servilem ab Augustino distingui poenæ secundum animum, quo quis à conspiciis peccatis ob annexi illis mali poenalis metum abstinet. Similia habet pag. 77. & alibi.

Hæc opinio paradoxa est: porro crediderim eam inde ortam, quod quædam poenæ sint, quarum metus retrahere tantummodo potest ab externis actionibus: quod quam malè extendatur ad poenam gehennæ evidens fiet, ubi ostenderimus, quæ poenæ & cur à solis exterioribus cohibere possint.

18. Conclusio 1. Certum est dari poenas, quarum metus quantumcumq; absolutus & efficax sit, non habeat vim retrahendi, nisi à solo opere externo, & ab illo actu interno, qui opus externum efficaciter inferret. Tales sunt poenæ à iudice humano passim statutz in legum transgressores.

Probatum quia cum poena v. g. patibuli furibus lege statuta solummodo respiciat eos, qui aliena bona rapiunt, non autem eos, qui interius vel de furto cogitant delectantur, vel habent desiderium conditionatè efficax furandi, si non esset periculum suspendi: sit ut metus furæ licet absolutus & efficax non possit retrahere ab his actibus internis.

Ratio à priori est, quia sicut efficax intentio finis solum inferre potest electionem mediorum, per quæ finis obtineatur, non autem aliarum actionum ad finem non necessariarum; ita quoque timor seu fuga poenæ efficax solum potest inferre fugam eorum, per quæ illa poena incurritur, non autem aliorum, quæ quantumvis quis ponat, poenam tamen illam non incurret. Sic timor gehennæ ut sic non potest cohibere à peccato quopiam veniali, cum sciatur per hoc non iacurrenda gehenna.

19. Imò licet timor seu fuga poenæ capitis homicidio præfixæ, sit planè efficax, fieri tamen potest, ut in certis circumstantiis non possit cohibere à per-

perpetratione homicidii. Sit aliquis, qui inimicum capitalem in illis circumstantiis loci, temporis &c. depræhendat, in quibus, si cum occidat, certus sit numquam posse homicidium judici vel ex suspitione innotescere; eo casu timor illius pænæ non poterit illum cohibere à morte hic & nunc inimico inferenda. Iudex enim pœnam infligere non potest, nisi crimen novèrit, quod in casu supponitur certò ignoraturus, adeoque omisio homicidii in casu non est medium conducens ad pœnam capitis evitandam, ac proinde illius pænæ timor non magis deterret ab hoc homicidio, quam ab alia actione quacumque, quæ nulli pænæ obnoxia est.

20. Conclus. 2. si per impossibile Deus non esset conscius secretorum cordis, rectè assereretur, quod metus gehennæ à Deo infligendæ, solummodo posset cohibere à peccatis externis.

Probatur, quia cum Deus punire nequeat scelera nisi sibi nota, actus autem interni supponantur ipsi esse ignoti, per hos in illa hypothèsi impossibili, non incurreretur pœna gehennæ. Ergò timor gehennæ licet efficaci vim non habeat impediendi mala, quæ interius consumuntur. Idem haberet locum in eo, qui per errorem sibi firmissimè persuaderet, aut sola peccata externa à Deo puniri, aut hæc sola posse illi innotescere.

21. Conclus. 3. supposito quod homines ex lumine naturæ vel fidei probè sciant Deo æquè patere cor, quam ea quæ foris geruntur; sine ullo fundamento, imò contra omnem rectam rationem dixeris, metum gehennæ (quæ per utrumvis actum cognoscitur incurrenda) solummodo posse illos retrahere à peccatis externis & conspicuis. Est contra supra citatos.

Prob. quod timor pænæ à iudice humano infligendæ tantummodo possit timentem cohibere ab opere flagitioso, non inde præcisè oritur, quod illi sint actus externi, sed quod per hos solos incurrenda esset pœna, quæ absolute & efficaciter timetur: atqui pœna gehennæ æquè imò præcipue incurritur per actus peccaminosos internos ac per externos & ut volunt multi per solos internos: ergo æquè imò & principaliter potest gehenna cohibere animum ne interius delinquat. Major propositio probatur, quia juxta dicta num. 19. pœna ab homine infligenda non potest detertere ab omni opere externo prohibito, sed ab illo tantum, per quod natam est fieri, ut illa pœna incurratur, non autem ab alio, quod certò scitur mansurum judici ignotum.

22. Quod ut pateat adhuc evidentius: ponamus Deum statâ lege judici humano manifestare peccatum aliquod cordis occultissimum v.g. blasphemiam internam, simulque judici præcipere, ut quoscumque hujus criminis reos Deus manifestante didicerit, exquisitissimis ignis aliarumve pœnarum tormentis morte mulctet. Nemo sanus negaverit, quin mortis tam atrocis metus cohibere possit, & plurimos de factò cohibiturus sit ab illo cordis affectu.

affectu. Sic jam multos ab opere turpi retrahit metus infamiae apud alios incurrendae, quos proculdubio eodem modo cohibere posset ab actu quopiam interno, si hic sciretur manifestandus, & sic eadem incurrenda infamia.

23. Ex quibus evidentissimum fit, perinde omnino esse, sit ne actus externus internusve, in ordine ad hoc ut metus mali incurrendi ab illo hominem possit retrahere, sed hoc solummodo spectandum, per quem actum incurrendum sit illud malum. Ita ut timor à solo externo cohibere valeat; si hic solus reos poenae constituat; à solo vero interno, si per hunc tantum incurratur malum; denique æqualiter ab utroque, si utrovis posito poena non possit evitari.

24. Sanè non intelligo, quid causæ fingi possit, cur metus gehennae, quæ scitur quovis peccato incurri, vim habeat cohibendi membra & manus, non autem ipsum animum ac voluntatem. Sit aliquis furto jam dudum assuetus, qui incipiat timore gehennae concuti, qua veritatis specie dicitur, quod timor ille possit impedire, ne alteri rem suam eripiat, in qua actione totus fructus & utilitas furti sita est, non possit autem impedire, ne idem ille eliciat hunc actum omnis fructus & utilitatis expertem: vellem furari si non esset infernus, per quem nihilominus ejus poenae reus constituitur. Idem ostendi potest in plurimis aliis peccatis. Nonne tamquam hominem rationis expertem rejiceremus, qui omni homicidio aut furto æqualiter proposita mortis poena, assereret, posse quidem hujus poenae metum cohibere manum alicujus, ne occidat Petrum, aut ne hujus bona surripiat, non autem ne Paulum vita aut fortunis spoliaret? non magis tamen inconsequentia argui posset, quam qui, omni peccato proposita gehennae poenâ, asserit hujus metum cohibere posse manum ac membra ab opere flagitioso, non autem voluntatem à pravis desideriis. Eodem profecto jure asseruerit quispian, quod amor Dei à solo opere malo externo hominem retrahere possit, prout ostendemus cap. 5.

25. Quæro denique à Patre Lupo quid causæ sit, cur cum velit metum gehennae solum manum ac membra cohibere, fateatur tamen etiam metum cohibere voluntatem ab actu, quo efficaciter statuerit opus externum exequi? Hujus sanè non aliam poterit rationem asserre, quam quod stante tali actu, & oblata occasione exequendi, poneretur opus externum, adeoque & incurreretur malum, quod supponimus efficaciter timeri. Hæc autem ratio militat pro quovis peccato interno respectu gehennae, ergo &c.

CAPUT IV.

An attritio ex metu gehennæ habeat necessario conjunctum aliquem voluntatis actum peccaminosum.

Demonstratum est superiori capite timorem gehennæ æqualem vim habere revocandi timentem ab actu sive interno sive externo, adeo ut vel à neutro possit cohibere, vel possit ab utroque. Hic quaerimus an saltem sit aliquis actus voluntatis interior, qui peccatum sit, & semper reperiri debeat in eo, qui de peccatis attritur ex metu gehennæ tamquam morito adæquato.

26. Circa hanc quaestionem P. Lupus docet sequentia:

Primò quod timor gehennæ servilis, sic habeat annexam servilitatem, ut hæc ab illo separari non possit, nisi per veram Dei affectus saltem super omnia charitatem. Ita docet pag. 69. 71. 83. & alibi. Cum ergo attritio, de qua agimus, pro motivo adæquato & ultimato habeat metum gehennæ, illa juxta hunc auctorem necessariò habet sibi annexam servilitatem.

27. Secundò: quod servilitas illa sit secundum animum quo quis à conspectu peccatis abstinere, malens tamē & optans non fore justitiam qua peccata ista vetaret, aut certe puniret: hunc animum meritis appellamus servilitatem: est enim servilis meritis voluntas qua solent servi non ex animo & bona voluntate, sed subdole servire suis dominis & coacti, pag. 61. item quod sit insima & secreta mentis preparatio, qua homo servili gehennæ metu frenatus mallet esse licitum, quod dolet esse veritum qua optet non esse gehennas, quibus à cupiditatum suarum sequela & adimplerione retardetur pag. 71. Qua velis esse nullas virtutum leges, nullas peccati pœnas, nullam ipsarum insensatricem justitiam, adeoque hujus, id est, ipsius Dei est occultus inimicus & h'or. pag. 62. Divina legis ac justitiæ, quam apud hominū oculos observat in cordis sui secreto est osor & inimicus pag. 61.

28. Tertiò: quod ista latens cupiditas sit peccatum mortale pag. 71. & 72. Quod gehennæ metus dumtaxat frenet malè agendi cupiditatem, quod autem frenata & laxata cupiditas sine serē ejusdem sceleratitatis & noxæ: Ibid, quod sit voluntas longè nequior: pag. 61. Quod gehennæ metus ex proprio sui-ipsius amore nascatur, adeoque qui ob illam solam, & non Christum Dominum à gravi peccato abstinere, non solummodo plus illam timeat, sed & seipsum supra Dominum diligit, quod est etiam cogitatu horrendum: pag. 71. Quod hic timor oriatur ex mercenario amore sui ipsius, quo homo sibi ipsi bene vult esse, non solum in hac vita, sed etiam in futura: Porro sui-ipsius amorem, quo homo non in Deo, sed in seipso seipsum diligit, esse fontem impurum, & omnis distorti affectus primam radicem: est unum è fund amentis doctrinæ Catholice & Augustiniane: pag. 63. Quod servilis gehennæ metus omnino inofaciat, dumtaxat tamen occasionaliser, aut potius ostendat nos magis peccatores: pag. 78.

29. Sententia ergo hujus Auctoris est, omnem gehennæ metum, & ex hoc

hoc motivo conceptam attritionem, si desit Dei super omnia dilectio, necessarium involvere, vel annexum habere peccatum mortale. Hæc doctrina videtur desumpta ex Jansenio Tom. 3 lib. 5. cap. 27. & sequentibus, ubi fatetur suam sententiam esse contra plerosque scholasticos.

Cujus tam heteroclytæ doctrinæ rationem assignat Jansenius cap. 29. *Quia Philosophorum omnium unanimes & certa sententia est, ea qua aguntur pro ex metu esse involuntaria secundum se spectata; prout verò hic & nunc aguntur voluntaria, hoc est ex utroque mixta.... ex quo fit ut hujusmodi voluntatis actum conjunctum habeat: nollem hoc facere, vel nollem abstinere, nisi mali impendentis metu coegerer.... qui ergo pure ex metu facit, necessario sentit talem repugnantiam ad id quod metu facit. Et, ut habet ejusdem capitis titulus: Qui nudo timore peccatum fugit, in virtus & animo repugnanti fugit, ideoque non fugit peccatum, sed aliud quidpiam.*

Eodem fundamento pro hac doctrina utitur Lutherus tum in sermone de poenitentia, tum sæpe alibi. Quare in hanc videntur inducti sententiam ex male intellecto communi hoc axioma: *metus causas involuntarium secundum quid.* Quod quomodo intelligendum sit dicemus, postquam quasdam consequentias ex doctrina Patris Lupi elicerimus.

§. 1.

Quanam necessario consequantur ex doctrina P. Lupi,

30. **E**X illius doctrina legitime sequitur 1. quod is, qui ante baptismum mortaliter deliquit, numquam possit justificationem obtinere, nisi novum peccatum mortale committat: baptizatus vero si peccet mortaliter, non nisi in rarissimo casu justificari possit, nisi novo mortali admissio.

Facilis est hujus sequelæ probatio: nam ut jam vidimus juxta Patrem Lupum timor servilis habet necessario sibi adjunctum mortale: atqui juxta eundem cap. ultimo, vera poenitentia nondum baptizati semper debet inchoari à timore servili, & qui per veram charitatem expellatur; Poenitentia verò baptizati ab eodem timore regulariter inchoari debet. Ergo juxta illum nullus qui mortaliter peccavit (si casus rarissimos excipias) justificari potest, nisi admittat novum mortale.

31. Egregia profectò hæc est scelerum poenitentia, quæ non nisi cum novo scelere peragi potest. An lex naturæ ac divina, dum poenitentiam peccati præcipit, id præcipere dicenda est, quod sine mortali impleri nequit? Quis unquam Catholicus credidit, se commissi criminis veniam consequi non posse, nisi novum veteri adderet? Quis in foro poenitentiam, dum fur-tum, homicidium &c. consistit, sese insuper accusat de peccato nunc admissio, dum sese serio ad veniam à Deo per Sacramentum obtinendam disponebat? Quis Confessarius poenitentes admonet de hoc peccato in confessio-

ne exprimendo? Non agnoscunt ergo Catholici tam impiani pœnitentiam, quam mirum est potuisse à Christiano Doctore procudi: mirum magis reperiri potuisse, qui talem doctrinam, ut scripturis sacris ac Conciliorum & SS. Patrum doctrinæ consonam laudarent.

Ponamus hominem, qui ante baptismum mortaliter peccavit, hic quod sese vertet? si non agat pœnitentiam, peccat contra Dei ac naturæ legem: si agat, novum admittit mortale & idem regulariter locum habet in iis, qui suscepto baptismo peccarunt. Si qui fortè sint futuri hujus sententiæ sequaces (quod non arbitror) monendi sunt, ut prius exquirant, utrum peccatum majus sit, an illud quod committeretur non agendo pœnitentiam, an verò illud quod dicitur timori necessariò annecti: si hoc posterius, utpote quod constituat *osorem Dei ac inimicum*, pronuntiatur esse majus peccatum: jam passim homines liberantur obligatione pœnitendi. Si vero dicatur esse minus; fateri oportet illi timori non annecti mortale, cum evidens sit, quod peccare non possit, qui dum utrumque vitare non potest, illud vitat quod gravius malum est: ne alias peccetur in eo, quod vitari nequit.

32. Ex eadem doctrina sequitur 2. peccatorem, dum attritionem elicit, fieri hypocritam hoc sensu, quod exterius à peccato absteat, latente interius peccaminosa voluntate, adeoque, quod exterius facit, non faciat ex animo & sincero corde. Hanc autem veram hypocrisim esse existimarunt quidam & D. Augustinus tales vocat *callaciter justos*, ut refert P. Lupus pag. 81. negat tamen ipse per hoc constitui hypocritas. Quidquid de eo sit, satis nobis est, quod constituentur hypocritæ eo sensu, quo id passim asserit Lutherus: Hic enim in disputatione ante sermonem de pœnitentia Thesi 67. & 68. ita loquitur: *Hypocritarum justitia est, opere & foris non occidere, mœchari &c. Gratia Dei est nec concupiscere*. Et in sermone de pœnitentia: *Hæc contritio facit hypocritam, quia scilicet timore præcepti & dolore damni id faciunt..... & si libere deberent confiteri, certe dicerent sibi non displicere vitam præteritam*. Et rursus in resolutione super Lipliæ disputatis: *Cum ergo peccator ante gratiam iussus peccata discutere, necessariò legis Dei sit memor, necesse est, ut concupiscentiis resistat, & legem odiat; quam sola gratia diligere facit. Ita fit ut hypocritam fiat*. Denique adversus artic. 6. à Leone X. damnatum ita scribit: *Quod ex corde non fit, jam hypocrisis est, ut dicit Christus Matth. 15. cor eorum longe est à me: ac contritio per peccatum collectionem parata, sine amore Dei & justitia, hoc est sine corde conteritur, quare necessariò sequitur sacer hypocritam, quia nec volenter, nec amanter conteritur in corde suo. Ego enim hypocritam aliter definire non possum, quam eum, qui id, quod facit, non ex animo & sincero corde facit*. Ecce Lutherus tum ante tum post condemnationem, dum asserit illum dolorem facere hypocritam, intelligit hoc sensu, quod cum exterius non peccet, intus tamen concupiscit, odit legem, non ex animo & sincero corde dolet, non displicet ei vita præterita &c. ac qui

attritus

attritus ex metu gehennæ verè sit hypocrita hoc sensu juxta P. Lupum, ergo juxta eundem rectè & Catholicè, quoad hoc sensit Lutherus, nec fuit censuræ obnoxius.

33. Ex iisdem principiis sequitur 3. quod qui attritus, constituitur magis peccator, addit enim veteribus peccatum novum, quod est simpliciter & propriè constitui magis peccatorem, & in hoc sensu passim loquitur Lutherus, dum dicit fieri magis peccatorem: nam in sua disputatione hanc ponit positionem tertiam. *Qui poenitentiam à peccatorum detestatione ante dilectionem iustitie incipi, nec in eo PECCARI aseris, hunc inter Pelagianos hereticos numeramus.* Cui thesi hanc opponit Eckius: *Astruente poenitentiam non rectè inchoari à detestatione peccatorum, recogitando gravitatem peccati & poenæ & quod faciat MAGIS PECCATOREM* tanquam Evangelio & SS. Patribus contrarium dictum non audiendum. Dixerat Lutherus peccari dum à timore inchoatur poenitentia (quod idem asserit P. Lupus) id explicat Eckius per facere magis peccatorem, adeoque apud ipsos hæc duo idem significabant. Et rursus in disputat. Lipsi. relatis his Eckii verbis: *nos posse dignos fructus poenitentiae facere, si à timore inceperimus.* Respondet Lutherus: *Hoc secundum S. Augustinum sic explico, si peccata peccatis addiderimus* Et inf: *Qua infamia dicere audeat* (Eckius) *in ista Pelagiana propositione, quod non modo non peccet, sed secundum Evangelium & Patres agat, qui poenitentiam à detestatione peccati incipiat, hoc est à peccando poenitere incipiat.* Neque aliud vult, dum ad illud Eckii: *bonus est timor & utilis, per quem paulatim fit consuetudo iustitie.* Respondet: *hoc est meo iudicio consuetudo desperandi & odiendi Deum* nam etiam juxta P. Lupum qui dolet ex timore constituitur *obor* Dei.

Sensit ergo Lutherus dolentem ex metu gehennæ constitui hypocritam, & magis peccatorem, ex eo, quod in sic dolente necessariò maneat affectus ad peccatum, odium legis, displicentia in eo, quod non liceat peccare &c. Illum tamen in hoc damnat Leo X. & postea Concilium Tridentinum: ergo &c.

34. Præsentit hanc difficultatem P. Lupus; hinc cap. 16. quatit: An Synodus rectè dicat, quod servilis gehennarum metus non faciat hominem magis peccatorem? & respondet rectè dicere, *etenim*, inquit, *loquitur cum Augustino* &c. Ecce rationem, cur rectè definiat Tridentinum. Ego vero è contra dicendum autumo, nempe dum Conciliorum dictis consentientia reperiuntur in Augustino, præcipuum robur Augustino à Conciliis accedere: suam vero Conciliorum definitionibus veritatem & firmitatem integram stare, sive idem dixerit Augustinus sive oppositum; quod obiter contra tales loquendi modos volui indicatam.

Nunc quid ad rem nostram respondeat P. Lupus videamus: ita loquitur loco citato: *Quia nempe iste gehennæ timor facit minus peccatorem; licet non interna, externa tamen peccata vitat, atque ita mediam divinæ legis partem explet, quod*

quis non videt esse peccatum minus plena pravaricatione. Eodem modo id explicat Janfenius cap. 35. Timor quamvis à peccato animum non continet, manum tamen ceteraque coercet membra, ne in facta profiliant. Longe vero minus ac minus est sola voluntate peccare, quam ruptis timoris repagulis in apertam legis erumpere pravaricationem.

35. Concedo nunc P. Lupo actum internum esse peccatum minus, quam si insuper accedat actus externus, adeoque & minus peccari. Verum nihil id facit ad punctum de quo agimus: neque enim quæritur, an qui ex metu gehennæ dolet de peccato commisso, magis peccet, seu constituatur gravius peccans, quam si præterea aliud quid mali adjungeret, aut etiam quam ante peccaverat; sed an sic dolens constituatur magis peccator, quam erat ante. Peccantem esse denotat solum actum, qui de facto ponitur, denominatione verò peccatoris desumitur etiam à peccato præterito. Unde qui post grave crimen committit aliud levius, licet per hoc sit minus peccans, constituitur tamen magis peccator. Sic qui reus adulterii fornicatur, jam minus peccat, quam si rursus adulteraretur, adeoque minus, quam ante peccaverat, fit tamen per fornicationem superadditam magis peccator. Propositio autem, quam damnat Leo X. non est, quod sic dolens constituatur magis peccans, sed quod fiat magis peccator. Quin cum Lutherus aperte fateatur, timorem gehennæ cohibere à peccatis externis, quando dixit illo timore hominem fieri magis peccatorem, nihil aliud intellexit, quam, prout sæpe explicat, peccatum novum addi veteribus, quod propriè est constitui magis peccatorem.

§. 2.

Resolvitur quæstio Proposita.

36. **A**ssert. 1. Necessè non est, ut quoties quis operatur ex metu, ad sit voluntas inefficax faciendi oppositum, si abesset periculum mali, quod metuitur.

Prob. qui averfatur furtum ob metum patibuli non debet simul statuere, furaturus ne esset, si tantum esset furto præstituta poena flagellationis, si solius infamix, si solius multæ pecuniariæ, sed potest ab his præcindens simpliciter detestari furtum ob metum patibuli. Ergo similiter necesse non est ut, qui operatur ex metu, simul statuatur non operari, si mali, quod timetur periculum abesset, sed ab eo præcindens potest simpliciter velle operari, ne incurrat malum, quod hic & nunc ab intellectu proponitur. Sic solent viri boni, & famæ, ut par est, amantes consideratà solà infamiâ, quæ furtum consequitur, horrore ejus aliquo commoveri, & furtum utpote illius infamix causam detestari; quis autem dicere audeat, eos quoties id faciunt, fovere

fovere in animo peccaminosam voluntatem furandi, si abesset infamiae periculum. Sic quoque qui non vult furari, quia id repugnat iustitiae, non debet habere voluntatem furandi, si furtum tantum repugnaret charitati. Nec denique qui detestatur furtum ex amore Dei, debet habere voluntatem furandi, si Deum non amaret, vel si per impossibile Deus non esset.

37. Ratio à priori est: quia mors aut infamia, quae timetur, allicit ac impellit voluntatem ad absolutam nolitionem furandi, eo quod illud malum furto incuratur: non allicit autem ad volitionem conditionatam furandi, si abesset periculum mali, nec ad hanc volitionem habet ullam proportionem, idque quia ille actus conditionatus in oppositum nec necessarius nec utilis est, ad vitandum malum, quod metuitur. Hinc quando voluntate ex metu operante adest actus inefficax in oppositum, hæc nolitas non provenit à metu, ex quo opus fit, sed aliunde. Exemplum sit in ejiciente merces urgente tempestate; hic si simul habeat nolitionem inefficacem ejiciendi, ea nolitio non oritur ex metu submersionis, cum ad mortem evitandam illa nihil omnino conducatur; sed oritur ex metu damni mercium, adeo ut si nullum esset iacturae periculum, nullum quoque in ejectione mercium sentiret interiorem luctum aut pugnam. Patet id manifestè in casu, quo merces spectarent ad inimicum ejus, qui illas in mare abjicit; vel si sint propriae ejicientis, casu quo sciret eas ejectas æquè salvas in portum perventuras, quam si navi veherentur: his enim & similibus casibus propensissimè ferretur voluntas in illarum ejectionem, sine ulla voluntatis repugnantia etiam inefficaci.

38. Quamvis ergo, dum voluntas operatur ex metu impellente, adesse possit & sæpe adsit volitio inefficax in oppositum, si nempe proponatur ab intellectu aliud hujus actus motivum; certum tamen est, non debere necessariò adesse hunc actum inefficacem in oppositum. Idque, ut jam ostendimus, verum est, etiam quando ille inefficax affectus nullo modo impedit evasionem mali, quod timetur: nam si in tempestate navim exoneret, nihilo majus minuscve incurres submersionis periculum, sive inefficaciter optes, eas non ejicere, sive omni simili affectu sis planè liber: neque furæ pœnam incurret, qui à furto abstinere, licet non careat voluntate furandi, si periculum pœnæ abesset.

39. Assert. 2. à fortiori necesse non est, ut qui ex metu gehennæ peccata detestatur, habeat affectum inefficacem, aut conditionatè efficacem peccandi, si non esset gehenna.

Prob. 1. qui operatur ex metu alterius mali, non debet necessariò habere affectum inefficacem in contrarium, etiam quando hic, si adesset, non impediret efficacem fugam mali, quod timetur. Ergo à fortiori qui detestatur peccatum ex metu gehennæ, non debet habere affectum inefficacem ad peccatum.

peccatum, quandoquidem per hunc æquè incurrenda sit gehenna, quam per aliud peccatum.

40. Prob. 2. Neceſſe non eſt, ut, qui admittit aliquod mortale, identidem peccet, donec egerit pœnitentiam. Abſtinerit ergo à novo peccato per aliquot dies, & tunc incipiat ponderare gravitatem pœnæ, quam peccando incurrit, ac proinde ſtatueret eas omnino evitare, cavendo peccata in poſterum, & quaerendo remedium peccati commiſſi: quaero quid in caſu ſit, quod illum alliciat ad novum peccatum, ſeu ad affectum illum latentem? Non proſecto pœnæ inferni per intellectum repræſentatæ: alias enim pœnæ, quæ de ſe vin habent retrahendi ab actionibus, quarum poſitione incurantur, quaſque ideo Deus ſtatuit & comminatur, hominem ad peccandum invitarent; dicendumque conſequenter foret, quod pœna patibuli cognita alliciat ad furandum: quo nihil dici poſſe ſtolidius fatebuntur etiam adverſarii.

Dices illum actum inefficacem oriri à concupiſcentia.

Reſp. 1. ſicuti, antequam repræſentarentur pœnæ inferni, non exurgebat concupiſcentia; ita quoque poteſt hæc non rebellare propoſitis illis pœnis.

Reſp. 2. cum Roſſenſi poſſe aliquem verè deteſtari peccata, etſi ſentiat actus concupiſcentiæ reſiſtentes, dummodo illis reſiſtat ex motivo metus, quod jam ſupponitur repræſentari, & ex quo non obſtante concupiſcentia efficaciter deteſtatur & fugit alia peccata.

41. Prob. 3. Si timor gehennæ & ex illo conceptus dolor, neceſſariò habeat conjunctum mortale, dehortandi ſunt homines, ne ex illo motivo peccata deteſtentur; malè etiam concionatores ea ſupplicia peccatoribus proponunt, malè venturam iram inculcavit Joannes & Chriſtus ipſe: prout ruſius contra Lutherum deduxerunt Catholici. Eekius lib. 1. de pœnit. cap. 8. *Incuſſit protoplaſto Deus timorem pœnarum, ne tranſſederentur præceptum; diſcet Ludder hic pro impietate ſua, Deum voluiſſe ex protoplaſto facere hypocritam? & cap. 16. Videmus Hieronymum adſtruire timorem eſſe bonum, quem expectas à ſerviſ ſicut amorem à filiis: quis autem ita deſipit, ut dicat Deum expectere peccatum ab homine vel illud quo fiat hypocrita & magis peccator, ſunt inſanis Ludder. Deniq. cap. 19. Chriſtus prohibet timorem mundanum & nos adhortatur ad timorem ſervilem, ad timorem gehennæ & ejuſ qui mittit in gehennam; ſiſſe timor eſſet peccatum & ſciſſet magis peccatorem; vide quæ blaſphemia ſequitur, Chriſtum nos invitari ad peccatum, docuiſſe nos, quo eſſiceremur magis peccatores. Quæ argumenta locum habent non tantum ſi ipſe timor dicatur in vitaliter malus, ſed etiam ſi dicatur neceſſariò habere ſibi mortale conjunctum.*

42. Ex dictis patet; magis conſequenter locutum eſſe Lutherum, qui cum aſſereret (quamvis falſò) dolorem ex metu gehennæ involvere peccatum, ſæpe

sepe urget non esse inculcandum peccatoribus metum gehennæ, sed amorem iustitiæ, ut ex hoc motivo peccata detestantes rectam pœnitentiam concipiant, quæ ex metu concepta non caret peccato. Rationabilis inquam, quam is qui cum metui velit necessario conjunctum mortale, asserit nihilominus pœnitentiam ab illo timore inchoari debere. Quod utimum an tam generaliter verum sit, ut censet ille auctor, hic non disputo: hoc assero non posse utrumque simul esse verum, nempe quod & ille metus peccatum contineat, & ab illo debeat pœnitentia inchoari: quorum primum verum non esse hæcenus ostendimus.

43. Ad illud axiomat: *metus causat involuntarium secundum quid*. Resp. intelligendum de metu, qui retrahit ab opere, quod de facto ponitur, metus enim ille inclinat voluntatem in oppositum ejus, quod operatur, ac proinde causat ordinariè odium inefficax operis, & sic facit, ut voluntas non tam intensè amet & appetit id, quod operatur, sed in hoc feratur minus propensè, quam si, stantibus reliquis, metus mali per opus incurrendi abesset. Sic dum quis metu mortis à tempestate imminenti ejicit merces in mare, metus damni ex ejectione obventuri, minuit voluntarium in earum ejectione. Idem fit, dum quis non obstante metu gehennæ peccat, cum enim cognoscat se peccando constitui reum gehennæ, hancque non possit non timere saltem inefficaciter, fit ut actum peccaminosum ponat cum aliqua pugna & lucta, & cum quadam displicentia ac tristitia, non autem cum illa acquiescentia voluntatis, qualis esset, si per illum actum pœna non prævideretur incurrenda.

Quando verò metus impellit, seu invitat ac allicit ad opus, quod hic & nunc exercetur (sicuti timor gehennæ invitat ad non peccandum) tunc eodem ferè modo, quo concupiscentia impellens facit, ut voluntas in illud feratur magis propensè.

CAPUT V.

An dari possit timor gehennæ, qui excludat omnem voluntatem peccandi.

Timorem posse non habere conjunctum actum voluntatis peccaminosum constat ex cap. præced. adeoque posse excludere voluntatem peccandi negativè, quo modo excludere etiam potest quilibet actus voluntatis indifferens: hoc autem non est propriè excludere voluntatem peccandi.

44. Hic quaerimus an attritio ex metu gehennæ possit excludere positivè voluntatem peccandi; nam ut rectè Suarez, Reginaldus, Tannerus

apud Exim. P. Farvacques in sua quodlibetica argumento 8. pag. 34. Quando Tridentinum addit; *si voluntatem peccandi excludat*: intelligi debet de exclusione positiva, sic ut sit formalis, vel virtualis repugnantia cum peccato, sive, ut loquitur Tannerius, sic ut voluntas peccandi simul esse non possit.

Hoc autem quia arbitrantur adversarii fieri nullo modo posse per actum cujus motivum sit solus gehennæ metus, inde præcipuum petunt suæ sententiæ fundamentum.

45. Jansenius Tom. 3. lib. 5. cap. 33. ait: *intelligere nequeo, quid filii scholastici non nulli volunt, dum dolorem peccati ex pœnarum timore pullulantem tantopere extollunt, ut eum etiam omnem voluntatem peccandi excludere, & bene vivendi propositum includere putent. Quo nihil in Augustini doctrina absurdius & falsius dici potest. Addit id esse impossibile &c.*

Similiter P. Lupus pag. 83. Addit Concilium si voluntatem peccandi excludat: Porro hanc voluntatem seu servilitatem excludi non posse, nisi per veram effectum saltem super omnia charitatem supra demonstratum est. & pag. 84. Tridentinum generatim sumptam contritionem dicit esse peccati detestationem & alium cum proposito non peccandi de cætero, quæ omnia certum est non posse fieri sine vera dilectione.

Præter hos contendit P. Farvacques loco cit. non posse timorem gehennæ positivè excludere voluntatem peccandi. Ubi quia ad argumenta solvenda recurrit ad æquivocationem latentem in illa voce *efficax*, quam ipse non evoluit; necessarium erit aliquid præmittere de efficacia actus.

§. 2.

Declaratur volitio efficax.

46. **Q**Uando voluntati ab intellectu proponitur bonum aliquod, potest illa in hoc ferri diversimodè.

Primo sub simplici ratione boni per se amabilis, reperti in objecto, siue ullo ordine ad aliud, sive abstrahendo ab illius consecutione præsentis vel futura. Hic actus est simplex complacentia in bono, seu hujus amor simplex sistendo in ipso bono secundum se.

47. Secundò potest in illud tendere ut consequendum; sic ut optet quidem illud bonum sibi, non tamen statuat ac decernat illud consequi. Si hunc actum, quia non fertur in rem sistendo in ipsa, sed cum respectu ad aliud, sive ad ejus possessionem, vel ut loquitur Puteanus, quia cogitatur de objecto consequendo; si inquam illum propterea vocare velis efficacem, nihil moror quæstionem de nomine, dummodo sciatur non agi de efficacia in hoc sensu, quando dicimus volitionem efficacem beatitudinis positivè excludere voluntatem peccandi, & idem est de metu efficaci gehennæ. Cæterum ille actus merito rejicitur à numero efficacium; est enim inæra potius

tius velleitas seu quædam complacentia non quidem in bono secundum se & ibi sistendo, qualis erat actus primo loco recensitus, sed in ipso bono, quatenus ejus possessio bona est & amabilis, sive est simplex complacentia in illius boni possessione. Porro si agamus de beatitudine, vix reperietur alius amor inefficax circa illam, quàm jam dictus, neque enim solent homines ferri in beatitudinem in abstracto, sed in ejus possessionem hoc vel simili modo: opto vel optarem esse beatus. Hunc autem actum non excludere positive voluntatem peccandi, per se manifestum est, nihil enim, prohibet actu peccantem, habere talem affectum ad beatitudinem, optarem fieri beatus: sicut potest æger optare sanitatem, licet nolit sumere positionem necessariam.

48. Tertiò potest voluntas ferri in bonum non tantum nudè complacendo in ejus boni possessione, sed præterea firmiter decernendo illud consequi, cum aliqua tamen limitatione seu restrictione; v. g. per media facilia: Hic actus, si repræsententur media facilia, per quæ bonum illud obtineatur, æquivaleret actui absolute & illimitatè efficaci; si vero nulla talia media appareant, est quidem actus absolute inefficax, sed efficax conditionatè, si talia media darentur. Sic potest quis absolute velle evadere mortem per pharmaca, non autem per sectionem aut aduersionem.

49. Atque hæc limitatio esse potest, non tantum ad facilitatem mediorum, sed etiam quoad alia v. g. quo ad tempus, si bonum sit tale, quod possit etiam futuro tempore obtineri. Sit aliquis qui firmiter statuat beatitudinem consequi, & ad hoc adhibere media: sed quia scit ad id sufficere, si in fine vitæ ponat requisita ad beatitudinem, statuit efficaciter illa tunc temporis adhibere, non autem jam, quando nondum apparet ullum mortis periculum. Talis habet volitionem beatitudinis aliquo modo efficacem (quam possis vocare spem) quæ non inferat quidem positionem mediorum hic & nunc (nisi casu quo cognosceret jam instare vitæ finem) sed pro tempore, quo cognosceret mortem esse præ foribus. Hic actus nondum est omnino efficax intentio beatitudinis, sed ex parte inefficax: cum enim possit quovis momento subitâ morte extinguì, nihil tamen statuit de vitando periculo beatitudine excidendi, casu quo subitanea mors superveniat. Unde ille quoque actus non excludit positive peccatum hic & nunc ponendum, quia nihil statuit de vitando periculo, quod incurritur per peccatum, quod jam ponitur: sed tantum statuit eo tempore media adhibere, quo cognosceret mortem instare, quod supponitur hic & nunc non cognoscere. Fieri autem potest, ut, licet jam peccet, postea nihilominus per penitentiam in fine vitæ positam salutem æternam consequatur.

50. Quartò denique quando proponitur bonum, & simul media, quibus illud obtineri possit, potest voluntas velle absolute, & quam potest fir-

missimè

missurè statuere, illud bonum consequi, nullà factà limitatione circa media aut tempus, sed sic, ut statuat, ne ulli quidem per dilationem periculo aut incertitudini, illud non obtinendi, se se exponere v. g. proposito maximo bono visionis Dei æternæ, & simul mediis ad id necessariis, potest voluntas absolutè & firmiter statuere, illud bonum consequi, idque viâ certissimâ, sic ut nec periculo minime se exponat illud amittendi. Hæc autem voluntas infert necessariò vel involvit volitionem absolutam non ponendi & non omittendi ea, quorum positio vel omisio conjuncta esset cum aliquo periculo beatitudine exidendi.

Et hæc est illa intentio seu voluntas efficax beatitudinis, quam illi, contra quos disputat P. Farvacques, asserunt positivè excludere voluntatem peccandi.

§ 1. Atque hinc apparet, quinam actus versari possint circa malum.

Primò enim potest voluntas hoc simpliciter averfari ibi sistendo.

Secundò potest illud averfari cum respectu ad se, sic ut simpliciter optet illud sibi non evenire, non tamen statuat adhibere conatum ad vitandum. Et hic actus dicendus est fuga inefficax mali juxta dicta num. 47.

Tertiò potest velle illud vitare, sed solum per media facilia: & si malum putetur non obventurum, nisi postea, quod tamen vitari poterit, si aliquo tempore intermedio adhibeantur media, potest velle ea adhibere, sed tempore futuro, v. g. ex metu gehennæ velle pœnitere in fine vitæ, qui actus non obest, quo minus hic & nunc peccetur, ut patet ex num. 49.

§ 2. Quartò denique potest sic averfari illud malum, ut ne periculo quidem ejus incurrendi, v. g. gehennæ velit se exponere. Et hic est actus quem auctores vocant timorem gehennæ efficacem, negantque posse ullo pacto consistere cum voluntate mortaliter peccaminosa.

§ 3. Notandum primò quando aliquis actus, qui nunc est, versatur circa ponenda vel omittenda tempore futuro, non rectè inferri illum fuisse inefficacem ex eo, quod postea non ponantur vel omittantur illa, prout actus decreverat. Id enim oriri potest ex inconstantia & mutabilitate voluntatis humanæ. Unde, qui postea peccat, potest habuisse timorem efficacem gehennæ. Neque hoc negare possunt adversarii; nam etiam ille, qui jam ex amore Dei quantumcumque perfectò statuit, nunquam Deum offendere, potest postea peccare & ipse contingit, ut peccet; & tamen hunc fatentur esse actum efficacem. Quare ad hoc ut aliquis actus dicatur efficax, quatenus respicit futura, sufficit esse talem, ut si durasset, posita vel omissa fuissent illa, circa quæ versabatur actus: adeoque de cessatione peccatorum sive ex amore Dei, sive ex metu gehennæ vel spe præmii, non potest esse nisi affectivè efficax; quatenus tendit in futura; efficacem verò etiam effectivè esse potest circa ea, quæ noruntur, dum adest actus; quæ duo si habeantur jam habetur actus absolutè & omni modo possibili efficax, No-

54. Notandum 2. Adhuc nostrorum efficaciam solummodo considerare penes ea, quæ sunt in potestate nostra; unde si duo, similes actus in vita semper eliciissent, & uni eorum Deus per impossibile negaret cælum promissum, hic propterea non esset censendus habuisse actus minus efficaces circa beatitudinem, quam alter. Potest etiam uterque poenitens habere æque efficacem timorem gehennæ, ex quo consistitur, licet alter eorum vel per negligentiam confessari, vel aliunde non verè absolvetur.

§. 2.

Resolvitur Quæstio.

Quia in hac materia pleraque objectiones format P. Farvacques contra actum spei, necessarium duxi toto hoc capite, præter institutum, agere de utroque actu tam spei, quam timoris.

55. Afferit: 1. dari potest desiderium beatitudinis sic efficax, ut excludat positivè omnem voluntatem peccandi. Id tamquam indubitatum supponunt passim omnes, adeo ut supervacaneum videri possit id probare.

Prob. 1. dari potest desiderium boni creati sic efficax, ut inferat positionem omnium eorum, quæ ad illius consecutionem necessaria sunt, & quibus non positis vel periculum tantummodo esset illo bono excidendi: ergo dari potest desiderium vitæ æternæ, quod excludat omnem voluntatem peccandi. Antecedens patet, quia aliàs numquam dari posset desiderium boni creati, quin cum illo stare posset nolitio ejusdem boni etiam efficax; nam nolle mediæ necessaria est cum effectu nolle finem. Consequentia clara est, quia medium ad consecutionem beatitudinis certam seu sine periculo excidendi, est abstinere ab omni mortali tam interno, quam externo.

56. Prob. 2. Amor Dei potest excludere omnem voluntatem peccandi, ergo etiam amor seu desiderium beatitudinis: Probatur consequ. quia sicut voluntas creata potest pro innatâ sibi libertate in Deum summum & increatum bonum ferri, vel amore tantum simplici & inefficaci, vel efficaci tantum conditionatè, vel denique eo amore efficaci, qui excludat omnem voluntatem ei displicendi sic etiam potest in beatitudinem pro suo libitu ferri, vel simplici tantum complacentiâ, vel desiderio conditionatè tantum efficaci, vel denique eo desiderio, quo excludatur omne id, quo beatitudo amitteretur. Si quid enim obesset, esset quia est bonum creatum, hoc autem non obesse evidens docet experientia, quando homines perversi sæpe in vilissima bona creata feruntur amore magis forti & efficaci, quam sit amor quo viri sancti feruntur in Deum: ergo etiam poterit homo ferri in beatitudinem amore tam efficaci, quam alius feratur in Deum, adeoque

tam potenti, ut illo stante, poni nequeant, quæ beatitudinis consecutionem aut impedirent, aut periculum crearent.

§7. Et sane qui id negarent, omnem sibi præcluderent modum probandi, quod amor Dei possit excludere voluntatem peccandi; nihil enim adferent, quod non similiter probet conclusionem nostram. Dicent enim, si amans Deum peccaret mortaliter, amaret & non amaret, vellet Deo bonum & non vellet, quos actus cum impossibile sit simul componi, necesse est excludi peccatum, dum adest amor Dei. Verum eodem modo; cum amor beatitudinis sit amor sui ipsius, ut ipsi admittunt; si desiderans beatitudinem peccaret, amaret se & non amaret, vellet sibi illud bonum & non vellet &c. Porro cum viri sancti passim agnoscant & deplorent, in multis hominibus reperiri amorem sui inordinatum, qui nimirum potens sit & efficax; quâ veri specie dicitur, non posse reperiri amorem sui licitum & ordinatum circa beatitudinem, quæ sit planè potens & efficax.

§8. Assertio 2. potest etiam metus seu fuga gehennæ dari ita efficax, ut, dum adest, excludat omne peccatum actuale.

Prob. 1. quia dum Tridentinum sess. 14. cap. 4. dicit: *Illam vero attritionem, quoniam ex gehenna metu communiter concipitur, si voluntatem peccandi excludat* &c. aperte supponit, dari posse quæ excludat voluntatem peccandi; aliàs enim attritionem chimæricam nobis obtruderet & sess. 6. can. 8. *Gehennæ metum per quem à peccando abstinemus*. Hic autem agit de metu exclusâ charitate, cum sit idem ille, quem eadem sess. cap. 6. ponit tamquam sternentem viam ad spem & amorem.

§9. P. Lupus cap. 13. referens hæc verba *per quem à peccando abstinemus* subiungit explicationis gratiâ à peccatis externis. Idem id est, ac si quis ad illa ejusdem Concilii verba. *Si voluntatem peccandi excludat: & cum proposito non peccandi de cætero adderet nempe peccandi peccatis externis*: Consideret P. Lupus utrum hic non rectè quadrarent verba, quæ initio suæ dedicatoriæ in alios immeritò contorquet.

§10. Prob. 2. Possum aliquod malum sic aversari, ut stante illo actu impossibile sit, me ponere id, quo malum illud incurram; ergo possum sic aversari gehennam, ut impossibile sit, me simul admittere mortale, per quod scio gehennam incurri. Antecedens per se patet; quis enim dubitet, quin ex timore patibuli possim furtum sic detestari, ut non possim simul velle furari, per quod fierem patibuli reus. Deinde juxta adversarios timor gehennæ cohibet à peccatis externis, & ab interno, quo illa efficaciter imperarentur, & ut loquatur P. Lupus pag. 70. *Hæc cupiditas per servilem timorem omnino evanescit*. Adeoque timor gehennæ positivè has actiones excludit; ergo etiam potest excludere quodvis aliud peccatum internum, quod æquè constituit reum gehennæ. Cum enim voluntas non sit minus domina sui, quam

motuum

motuum, qui in membris sunt, si possit ex metu gehennæ admovere vel subducere manum, prout judicatur conducere ad vitandam gehennam; cur non poterit ex ejusdem mali metu, affectus internos excitare vel comprimere, quando hoc cognoscitur equè necessarium ad vitandum idem malum? cur non poterit id plenè sibi imperare?

61. Sanè si lupus (quo simili familiariter utitur P. Lupus) qui, dum metu abigitur ab ovili, retinet inefficacem cupiditatem rapiendi & mactandi, nisi obstarent canes & pastores; si inquam, ille lupus sciret, eadem omnino sibi imminere mala ab illa cupiditate inefficaci, quæ ab absolutâ & efficaci, eodem timore utramque pariter contineret: cur ergo idem non faceret homo?

62. Prob. 3. ex Patribus, qui generaliter asserunt timorem cohibere homines à peccatis.

S. Augustinus in Pl. 127. *Alius non in hac terra pati timet, sed gehennam timet; unde terruit etiam dominus: ubi vermis eorum non morietur, & ignis eorum non extinguetur. Audiunt hæc homines, & quia verè futura sunt impiis, timent & continent se à peccato. Habent timorem, & per TIMOREM CONTINENT SE A PECCATO. Timent quidem, sed non amant iustitiam. Cum autem PER TIMOREM CONTINENT SE A PECCATO, fit consuetudo iustitiæ. Hunc locum sic explicat Lutherus, continet se à peccato scilicet externo, quam explicationem etiam quidam alii amplexi sunt: egregia profecto glossa, quasi adeo stupidi sint homines, ut nesciant voluntates malas gehennâ puniri; ideoque ad hanc vitandam sufficere credant, si contineant membra & manus: quasi nesciant illud Gregorii 19. Moral. cap. 12. qui in aliis elisionibus iustus est, in aliis iniustus, quasi hæc latus cooperuit, hoc latus nudavit. Quasi ignorent illud Augustini sermone 19. de verbis Apostoli: Deus cor interrogat, non manum. Deinde si tantum agat de peccato externo, manente intus peccaminosâ voluntate; quomodo diceret per timorem fieri consuetudinem iustitiæ, cum fiat consuetudo peccandi in sententia P. Lupi, nempe peccato interno, unde omnis peccati externi origo & radix.*

63. Rursus Epist. 120. ad Honoratum: *timor non est in charitate, sed perfecta charitas foras mittit timorem. Proinde præmissus timor in cor nostrum pellit inde consuetudinem malorum operum, & servat charitati locum. Agit hic de timore, quem expellit charitas, adeoque de servili, asseritque hunc intrare in cor, inde, id est ex corde seu voluntate pelleret consuetudinem malorum operum; mala autem cordis opera sunt actus interni. Juxta P. Lupum autem timor servilis auget & roborat consuetudinem malorum operum in corde. Absit etiam ut senserit Augustinus, quod actus, qui sine peccato esse non possit, præparet locum charitati.*

64. Eandem vim inesse timori iudicii & mortis agnoscit Augustinus:

Tract.

Tract. 9. in Epist. Joannis: *Capit ergo timere diem iudicii, timendo corrigit se, vigilat adversus hostes suos, id est peccata sua, incipit interior reviviscere, & mortificat membra sua, quæ sunt super terram, sicut dicit Apostolus: mortificate membra vestra, quæ sunt super terram: spiritualia nequitiæ dicit membra super terram: nam sequitur & exponit avaritiam, im munditiam, & cetera quæ illis exequitur.* Per timorem ergo corrigit se homo, vigilat adversus peccata sua, mortificat spiritualia nequitiæ, quæ enumerat Apostolus juxta Augustinum: Atqui Apostolus eo loco agit de peccatis etiam internis, ut patet ex contextu & scopo, ergo etiam ab internis corrigit & mortificat se homo per timorem. Adverte etiam quam egregia sit vigilia contra hostes in sententia P. Lupi, nempe talis, cum qua necessitudo hostis, id est peccatum internum, admittitur. Et libro 2. de Genesi contra Manich: cap. 28. *nihil enim sic revocat homines à peccatis, quemadmodum imminens mortis cogitatio.* Quem locum cum Luthero objiceret Eckius lib. 1. de pœnit. cap. 12. addidit: *adhuc quatinus capit Luldere: timor mortis imminens revocat homines à peccatis.*

65. Denique juxta Augustinum timor gehennæ & deliderium vitæ æternæ facit, ut homo tormenta & mortem contemnat, irrideat totum mundum, & dona temporalia; ergo multo magis efficiet, ut abstineat ab a&u quopiam inefficaci, aut alio quocumque, quem facillimè homo comprimeret, si propter illum sola mors temporalis, aut tormenta in corpore essent toleranda. In Pl. 63. *Quod supra homines est time, & homines te non terrebunt. Mortem sempiternam time, & præsentem non curabis. Voluptatem illam incorruptam & quietem sine labe concupisce, & promittentem dona ista temporalia, & totum mundum deridebis. Ama ergo & time, ama quod promissit Deus, time quod minatur Deus, nec corrumpèris ex eo, quod promissit, nec terreberis ex eo, quod minatur homo.* Et Con-
 cione 30. in Pl. 118. *& à verbis tuis formidavit cor meum. Habuerunt quidem & illi (id est Tyranni) verba minacia, prescribo, occido &c. sed tua me potius verba servaverunt: nolite timere eos qui occidunt corpus, sed eum time, qui potest & corpus & animam perdere in gehennam.* Ab his verbis tuis formidavit cor meum, & contempsi persecutorem meum, & vici diabolum: sequitur: **EXULTABO ERGO** &c. per ea verba vici, à quibus formidavit. &c. Denique enarr. in Pl. 68. *Premisit Dominus, nolite timere eos &c. Majore timore minora contemnimus, & majore æternitatis cupiditate, omnia temporalia fastidimus. Nam & hic delicia temporales dulces sunt, & tribulationes temporales amarae sunt. Sed quis non bibit tribulationis temporalis poculum metuens ignis gehennarum? & quis non contemnat dulcedinem sæculi, inhians dulcedini vitæ æternæ?*

66. S. Gregorius lib. 2. in 1. Regum cap. 1, in illud: *Dominus mortificavit & vivificavit, ducit ad inferos & reducit.* Ita loquitur: *ut mortificet, ducit ad inferos, & ut vivificet, reducat ab inferis.* Omnipotenti etenim Deo ad inferos ducere, & speculatorum corda æternorum cruciatuum consideratione terrere. Et quoque ab inferis reducere, est

territis pœnitentium atque commissa lugentium mentes se vite indefinēdis atcellere. Tunc quippe PECCARE DESINIMUS, cum superna gratia mollis cordibus FUTURA TORMENTA FORMIDAMUS. Et ab inferis reducimur, cum interno visitati solatio, ad spem venie de pœnitentia lamento respiramus.

Et lib. 26. Moral. cap. 27. Stultos vocat qui ne pœnis quidem à culpa compeſcuntur. Sæpe qui iubentis verba non audiunt, scientis verberibus admonentur, ut ad bona æterna saltem pœne trahant, quos præmia non invitant..... Inus non nulli, quos à perditis meritis nec tormenta compeſcunt..... fatuitas quippe stultitia est, quod illos sic iniquitas obligat, ut à culpa eos nec pœna compeſcat.

Item lib. 5. in 1. Regum cap. 2. in hæc verba: *servite domino & timere enim in veritate.* Subdit: *Hæc quidem via bona & recta est, quæ ad æternam vitam tendit & velociter pervenit.* Per TIMOREM quippe domini DEVIANȚUR MALA.

67. Idem Homil. 7. in Ezech. de timore iudicii: Sed hunc ideo tunc electi terribilem non videbunt, quia modo terrorem illius considerare non cessant. Studiose enim considerant, quam terribilis ad iudicium veniat. Culpa antea res desunt, imminentes declinant. Pavorem illius quotidie ante oculos mentis ponunt, & timendo agunt, ne quando venerit pertineſcant..... & quia ipse pavor ejus, quem in suis cogitationibus tenent, eorum mentes protegit, rectè subiungitur: *EXTENTUM PER CAPITUM EORUM DESUPER.* Firmamentum hoc, quod in similitudinem crystalli super capita eorum animalium apparet, & horribile & extensum est, quia bonorum mentes UNDE TERRET, INDE PROTEGIT. Si enim pavendus in eorum cordibus non esset, proteſtor & modo à peccatis, & post à suppliciis non fuisset. Quia autem semper considerant, quis pavor ex iudicio imminet, virtutum pennas in rectitudinem conservant. Homil. 26. in Evangelia: Hunc tanti timoris iudicem ante oculos ponite. Hunc venturum timete, ut cum venerit, non timidi, sed se vii videatis. Timendus ergo est, ne timeatur. Terror ejus nos ad usum bonæ operationis exercet, METUS illius vitam nostram A PRAVITATE COMPEſCAT. Vide eundem lib. 5. Moral. cap. 13. lib. 16. cap. 13. per totum.

68. Idem de desiderio vitæ æternæ pronuntiat hic S. Pater. Homil. 17. in Ezech. spes enim celestium mentem solidat, ne concutiat fluctibus tumultuum terrenorum, de qua & per Paulum dicitur, *quasi sicut anchoram habemus animæ tutam ac firmam.* Lib. 19. Moral. cap. 14. Qui enim æternæ retributionis bona cogitat, necesse est, ut ad omnem se causam securus mercedis extendat. Hinc per Salomonem dicitur, *QUI DEUM TIMET NIHIL NEGLIGIT.* Denique lib. 5. in 1. Regum cap. 3. tanto jam fortius oblata mundi oblectamenta respuit, quanto jam celestia ferventius diligit. & ibid. cap. 4. Potenter corpus extenuat, qui amore celestium cor inflammatur: quia dum spiritalia fortiter diligit, desideria carnis valenter premit..... pauper spiritu esse non poterit, qui amare adhuc thesauros æternos nescit. Sic nimirum ira vincitur, si amore celestium perfecte terrena omnia despiciantur. Sic quoque acedia vincitur, si adinam cordis depellitur, si semper bona celestia cogitentur. T. EDERE QUI-

DEM MENS NULLATENUS POTEST, QUÆ TAM FUCUNDA BONA
PÆTANTER VIDET.

69. S. Ambrosius serm. 8. in Pl. 118. in illud: *Pariceps ego sum timentium te*, ait: quia sunt qui ignava formidine perimuntur, & habent trepidans æternæ, additis & custodiens mandata sua. Quæ ergo TIMET, CUSTODIT: ergo eas est custodire, qui timeat. & ibid serm. 13. Tunc cognoscitur Dominus, cum TIMENTIVM convertit AFFECTVS gravis TERRORE JUDICI. & sermone 6. in eundem Pl. Is qui in iudiciis Dei sperat, servare potest verbum veritatis: quia dum VERETVR P O E N A M, CUSTODIT GRATIAM. Ideoque ait: & custodiam legem tuam semper.

70. Idem in Epist. ad Coloss. cap. 3. ætatis Apostoli verbis: *Induimini viscera misericordie, benignitatem, humilitatem &c.* subiungit: *Vt lucrum possitis habere*, ad hæc eos facienda hortatur: quæ merium collant apud Deum. A PECCATIS autem ABSTINERE TIMOR FACIT: veretur enim, ne mala faciens penis subdatur. Hæc autem quæ nunc facienda monet, ad profectum peritinem meritorum, ex voluntate enim sunt, non ex necessitate.... super hæc autem omnia charitatem habete. Quia enim omnium maior est charitas, huic magis studendum hortatur &c. Unde & dominus amari se maluit quam timeri. Ubi vides pulcherrimè expressa, quæ docent auctores nostræ sententiæ 1. quod timor faciat abstinere a peccatis 2. quod ad opera bona, quæ sunt non ex necessitate præcepti, non instiget timor pœnæ, adeoque ad hæc alio opus sit motivo 3. quod hæc omnia optimè & perfectissimè fiant, dum sunt ex motivo charitatis. Eundem sensum habere videntur verba Augustini sermone 19. de verbis Apostoli: *Si timore gehennæ non facis malum, nondum amore iustitiæ facis bonum* per amorem autem iustitiæ, ut patet ex sequentibus, intelligit desiderium vitæ æternæ.

Item libro de viduis cap. 8. Si mente corerent homines peccatores, quale iudicium impingeret mundo, sensus humanus non dissiparetur vanitate seculari, si non infidelitate gravarentur. Lib. 5. de fide cap. 8. Nobis enim scire non proderat, ut dum certa futuri iudicii momenta nescimus, semper ramquam in excubiis consistui, & in quadam virtutis specula collocati, piscandi consuetudinem declinemus; ne nos inter vitia dies domini deprehendat.... Proderat ignorare, ut ignorantes timeamus, ut observantes emendaremur. Denique serm. 21. in Pl. 118, affert timore gehennæ & iudicii, exquisitissima quæque tormenta tyrannorum superari, & subdite excludit timor timorem. Si enim ingressus quis balneas, solis deponit æstus, & calor excludit calorem; quanto magis divini iudicii terror huius terrorem excludit humanum? Idem attribuit desiderio gloriæ cælestis serm. 70. in eundem Psalmum concludens. Quisquis enim meliora sperat numquam levioribus frangetur. Contra vero Omnis qui aliquid sine spe agit, omnia tribulatione succumbit. Ut loquitur in Epist. 1. ad Thessalon. cap. 2.

71. Origenes lib. 3. in Job. circa finem Nam & verè nisi primum obscura-
veris

verit diabolus corda hominum, nisi prius infusa verit animas eorum, nisi prius obstru-
erit dederit timoris Dei atque terribilium iudiciorum eius, non utique valebit unquam
peccatorum semen seminare in cordibus eorum.

Et in Epist. ad Röm. lib. 5. in fine: Non sine causa dixit: existimate vos mer-
itos esse peccatores. Rescimus de qua sermo est, in cogitatione, magis & ratione subsistit,
quia huiusmodi mors non in effectu, sed in cogitatione habenda est. Qui enim cogitat, vel
existimat se esse morituum, non peccat: Verbi gratia: si me concupiscentia mulieris trahit,
si argenti, si auri, si prædæ cupiditas pugnet, & ponam in corde meo, quod morituum sum
cum Christo, & de morte cogitem, extinguitur continuus concupiscentia & effugatur
peccatum, aut si odio vel ira inflammatus ad necem concitet inimici mei, si me exiimem
morituum esse cum Christo, & cogitationes mortis ponam in animo meo, extinguitur sine
dubio ira, furor cessat, odium concipit, peccatum non datur locus, & hoc modo peccato,
quis mori invenitur.

72. S. Prosper lib. 2. de Vocatione Gentium cap. 9. Hunc autem consensum
(voluntatis in bonum) non solum cohortatio, sed & METVS gignit: propter quod
scriptum est: Principium sapientiæ timor domini. Qui quantiliber terroribus inferatur, non
aliud agit, quam ut quem sceleris TIMENTEM, FACIAT ET VOLENTEM.... Cum
ergo hic timor immittitur, non illi ratio extinguitur, nec intellectus aufertur, sed illa po-
tius, quæ mentem præmebat, calido dissipatur, ut voluntas depravata prius atque captiva,
recta efficiatur & libera.

73. S. Hieronymus in caput 1. Malachiæ: Qui spiritum adptionis, in filium
Dei vertitur, qui autem spiritum servitutis in timorem Dei, servus efficitur. Vult itaque
primum Deus, ut filii eius simus, & bonum voluntate faciamus: si hoc consequi nolumus,
ut saltem servus nos habeat, & a MALIS per SUPPLICIORUM FORMIDINEM
recedamus.

Item ad Damasum asserit spe bonorum temporalium à Deo impetran-
dorum, compelli homines ad obsequium præceptorum; quanto magis spe
præmii æterni vel metu poenæ æternæ. Ita autem loquitur: Mercenarios secun-
dum alium intellectum eos animadvertisimus ex Iudæis, qui ob præsentia tantum bona,
legis præcepta custodiunt: hi iustissimi & misericordes, non ob ipsam iustitiam, & ob ip-
sum iustitiam bonum, sed ut à Deo terrene felicitatis, & longæ vitæ premium conse-
quantur. Qui autem ista desiderat, necesse compellitur ad obsequium præceptorum, ne eo-
rum prævaricatione careat concupiscentis.

Alibi asserit viduam nunquam inituram secundas nuptias, si attentè re-
cogitet extremum iudicium. Alibi quod ipse metu gehennæ carcere se dam-
naverit, fidusque sit seorpionum tantum & ferarum socius.

74. S. Cyprianus libi de exhort. martyrii cap. ultimo postquam osten-
disset quantum in cælis præmium Martyres maneat, ait: Has cogitationes quæ
perfectio potest vincere? quæ possunt tot mentia superare? & infra: Hoc oportet mente
contemplari, & cogitatione huius die ac nocte meditari. Si talis persecutionis dies Christi

nulitem repererit, vincti non potest VIRTUS AD PRÆMIUM PROMPTA.

S. Basilii in Psal. 33. Quemadmodum qui corporis membra habent clavis transfixa, ea habent ad operationem immobilia: sic quorum animum occupavit Dei timor, omnem importunitatem, quæ ex peccati affectione ac perturbatione oritur, vincunt. Timentis itaque non est incipia, hoc est, nihil illi ad ullam virtutem deest, qui per TIMOREM ad OMNI PRAVA ACTIONE cohibetur. Et quibusdam interiectis: si quando ad peccatum concitaris, velim cogites horribile illud & intolerabile Christi tribunal... Deinde poenam illam omnium durissimam probrum illud & verecundiam sempiternam. Hæc time, & hoc TIMORE instruitur, tamquam freno quæpiam animam COHIBE ab ea, quæ ad malum est, CUPIDITATE. Hunc domini timorem nos Patet se promissis esse donaturam.

75. Patrum testimoniis adjungo id, quod in hac materia senserunt Fitcherus & Eckius contra Lutherum. Prior ita loquitur ad art. 14. Qui damnè perpendit immensitatem, quod ex peccato conquiritur, in odium facile peccatum & detestabitur tam in aliis, quam in seipso, neque minus id quod oculum est, quam quod est agnatum. Eckius vero libro 1. de Pœnit. cap. 6. Falsum hic aperitissimè Ludderus, quod existimat penitentem non posse odire peccatum, nisi afficiatur ad bonum, cum omnis homo, qui spirat, noverit odire peccatum propter timorem poenæ.... Quomodo non odiret prodigium peccatum, ex quo in tantam venit miseriam ac omnium rerum inopiam: hæc per evacuationem suam Ludderum, licet per se frivoli & temerarii dicta sufficiant.

§. 3.

Solutio Argumentorum.

76. **A** Diversarii passim vix aliter nobis opponunt quàm, commune axioma: merus causat involuntarium, secundum quid. Et aliquot testimonia D. Augustini suis avulsa locis, vel malè intellecta. Quibus non contentus P. Farvacques plurima argumenta à ratione congestit, quæ hic eodem ordine referemus ostendemusque planè inefficacia esse.

Opponit 1. cum attritione servili simul esse potest voluntas peccandi, ergo hæc ab illa positivè non excluditur. Autem probat. Fides infidelitatem, temperantia intemperantiam, castitas luxuriam, liberalitas avaritiam, &c. eodem corde morari non patitur: verum potest quis simul esse fidelis & intemperans; castus & superbus; humilis & avarus: neque ulla illarum virtutum particularium omnia vitia à suo consortio excludit. Ergo spes Theologica (scu timor gehennæ qui ad illam reducitur) licet non patiatur secum stare desperationem, non excludet tamen intemperantiam aliæque vitia disparata.

Recip. 1. retorquendo argumentum: temperantia excludit intemperantiam & non alia vitia, ergo amor Dei excludit odium Dei, non autem intemperantiam,

temperantiam, luxuriam &c. Nihil huic argumento respondebit, quo suum non peridiat.

Resp. ergo 2. pro utroque negando antec. ad probationem, dissimulato antecedente, nego conseq. disparitas evidens fiet consideranti illarum virtutum actus. Cum enim liberalitas v. g. nihil omnino conferat ad moderationem venereorum, quod est castitatis objectum, nihil prohibet absolute & efficaciter intendi & obtineri castitatem, etsi nec intendatur, nec habeatur liberalitas, sed homo de facto sit prodigus vel avarus: neque hinc sequitur quod idem velit & nolit. Cum autem actus spei sit desiderium firmum obtinendi gloriam nec exponendi se periculo ea excidendi: medium autem ad hoc sit non peccare peccato quocumque, mirum non est, quod omnia peccata excludat, quorum unum si vellet committere, jam idem vellet ac nolle, æque ac si amans Deum peccaret: unde non magis alia vitia se habent disparatè ad spem, quam ad amorem Dei: Dixi, transeat antecedens: nam si, ut ait Hieronymus ad Eustochium, nisi adsit temperantia in cibo & potu, pudicitia rata esse non possit: & ut loquitur Ambrosius lib. 1. de viduis: *casto casta primum à vino, ut possis esse casta ab adulterio*: perfectæ castitatis desiderium etiam excludere debet intemperantiam in cibo & potu, tanquam id sine quo castitas stare non possit.

77. Urget 1. si actus spei positivè excluderet voluntatem peccandi, numquam posset stare cum voluntate peccaminosa: atqui certissimum est posse cum hac stare: ergo. Minorem probat, quia aliàs sequeretur in peccatore non manere spem, quod Suarez censet erroneum.

Resp. dari actus spei planè inter se diversos, sicut & amoris, ut patet ex num. 49. & 50. Porro si agatur de actu spei relato num. 50. fallum est, cum actu tali umquam stare posse voluntatem peccandi, licet stare possit cum alio actu de quo num. 49. non rectè autem fit argumentum ad uno actu ad alium diversum: sic licet dari possit amor Dei aded perfectus, ut etiam excludat positivè voluntatem actualem mentiendi, non sequitur omnem dilectionem Dei id facere.

Ad probationem, quæ multà laborat æquivocatione Resp. si per spem intelligat habitum, improut intelligit Suarez dicto loco, probatio est impertinens: quomodo enim ex eo, quod asserimus, sequitur non manere habitum spei in peccatore sive actualem sive habituale? Si vero loquatur de actu spei, Dico in eo qui est peccator habitualiter tantum, reperiri posse & de facto. sæpe reperiri actum spei quemcumque: in eo verò qui actu peccat, licet reperiri possit aliquis actus spei, non tamen ille de quo num. 50. & de quo hic disputamus.

Urget 2. Actus fidei etiam intensissimus non excludit positivè voluntatem peccandi, ergo nec id facit actus spei.

Resp. eodem modo argumentabor: actus fidei non excludit, ergo nec actus amoris. Item quando fide humana credo dari Romam, non urgeor ad media assumenda quibus Romam perveniam, ergo nec id faciet ulla voluntas, qua decerno Romam videre.

78. Opponit 2. amor sui-ipsius quo quis diligit proprium commodum, non excludit voluntatem peccandi: ergo attritio quæ ex amore proprii commodi nascitur, non excludet voluntatem peccandi, non enim magis quam motivum cui innititur.

Resp. 1. illud argumentum simile esse huic: Amor sui-ipsius, quo quis immoderate desiderat divitias quomodocumque comparandas non excludit voluntatem furandi, ergo absoluta fuga patibuli, quæ etiam nascitur ex amore sui ipsius, non impedit neque excludit voluntatem absolutam furandi, nec ipsum furtum. Quæ consequentia?

Resp. 2. amorem sui, quo quis querit suum commodum temporale, sine dubio non excludere voluntatem peccandi. Ratio hujus est, quia ommissio peccati non est medium ad hoc ut commodè sit in hac vita, sed ipsum potius peccatum sæpe ad hunc finem conducit: unde qui efficacissime desiderat sibi commodè esse in hac vita, si stante illo actu occurrat præceptum, cujus impletio habet incommodum annexum, tantum abest, ut ille amor sui impediatur violationem illius præcepti, ut potius violationem præcepti inferat. Aliud prorsus est in amore sui-ipsius, quo quis absolute vult sibi bene esse in altera vita: cum enim ad hunc finem, prout intenditur, sit necessaria ommissio omnis peccati, excludi debet peccatum quodcumque, ne aliàs illud bonum absolute velit consequi, & simul in actu exercito nolit.

79. Objicit 3. Quid repugnat cum amore sui-ipsius stare simul odium legislatoris: cum proclive sit, ut, qui se amat, oderit illum, à quo damnum patitur? unde illud vulgare.

Quem moris, quisque perire cupit.

Resp. jam diximus, quid repugnet, & cur proclive non sit odisse eum, à quo poenam times, si illo odio eandem incurras poenam. Unde in hac probatione nihil novi additur præter illud heremistichum, cujus sensum investigandum relinquo Poëti. Tantummodo quero an quando fideles jubentur timere superiorem sæcularem, jubeantur velle ut pereat? An timens superiorem paulo rigidiorē, debeat velle illum perire? An denique iussit Christus nos euperē ut Deus pereat, dum iussit nos timere eum, qui potest mittere in gehennam?

80. Opponit 4. voluntas illa dicitur efficax, quæ efficit illud quod per modum finis intendit, eo quod assumat media ex se omnino efficacia. Atqui falsum est, quod actus spei sit intentio seu voluntas efficax beatitudinis in

sen-

sensu jam dicto (& idem est de timore gehennæ) ergo. Minorem probat: quia plurimi sperant beatitudinem, in quibus spes beatitudinem non efficit. Unde hoc sensu sola illa spes dicitur voluntas efficax beatitudinis de qua scriptum est: *Spes non confundit, quia charitas Dei diffusa est in cordibus nostris.*

Resp. 1. hunc auctorem per suum latius nos imperere. Ponamus aliquem qui habet spem conjunctam amoris imperfecto, qualem requiri & sufficere cum sacramento contendit: hic ut ait P. Farvacques habet spem efficacem beatitudinis. Quæro eodem modo quomodo illa spes esse possit efficax? Cum enim juxta illum talis actus sit mera attritio, & non nisi cum Sacramento justificans, plurimi sic sperant beatitudinem, in quibus tamen spes beatitudinem non efficit. Fateri ergo debet vel hoc argumentum non concludere, vel spem etiam illam, quam ponit, esse inefficacem voluntatem beatitudinis.

Resp. 2. sepe fieri, ut is qui aliquando habuit actum spei in sensu nostro postea mutata voluntate non adhibeat media, & per consequens dampnetur. Verum id non obest efficacæ actus præteriti, nam alias nec efficax esset actus, quo vellem beatitudinem ex amore Dei etiam perfectissimo, adeoque per se justificante: contingit enim, ut, qui talem actum aliquando elicit, postea peccet & damnetur. Fateri ergo omnes debemus, ad hoc, ut voluntas, quæ fertur in præsentia & futura, dicatur efficax, sufficere quod iusserat positionem mediorum eo tempore quo durat: quoad futura vero, iungeret, si tunc continuaretur: adeoque quod, dum durat, sit efficax effectivè, quoad futura vero efficax saltem affectivè. Vide dicta num. 53. Quod si forte dicat, se agere de casu, quo actus spei aut timoris, quem nos ponimus, durat usque ad finem vitæ, videbit rursus idem esse in attritione quam ipse statuit: responsio autem parebit ex jam dicendis.

81. Instat: ergo solius spei & timoris præsidio possunt jam homines, & potuerunt olim Judæi obtinere beatitudinem & gehennam declinare, quod est per absurdum.

Resp. 1. ergo solius spei ex amore imperfecto præsidio possunt jam homines, & potuerunt olim Judæi obtinere beatitudinem: ecce hic rursus pugnat æquè contra se.

Resp. 2. vel sermo est de eo qui jam justificatus est, vel de illo qui adhuc infectus est originali vel actuali mortali: si de justificato; Dico illum etiam & in veteri lege salvari posse præsidio spei vel timoris, si hi actus durent tempore intermedio inter justificationem & mortem: inferent enim impletionem omnium mandatorum Dei: hæc autem sola requiritur ad salutem in eo, qui jam justificatus est. Quod si verò sermo sit de eo cui nondum remissum est vel originale, vel mortale personale, fateor cum non posse salvari præsidio solius spei aut timoris, uti nec juxta Patrem Farvacques salvari potest

potest præsidio solius attritionis, qualem ipse statuit, adeoque hinc malè infert actum, de quo agimus, esse inefficacem, nisi idem facatur de suo. Uterque ergo ulterius requirimus aliquid aliud, nempe vel actum se solo justificantem, vel susceptionem Sacramenti, quorum mediorum ulterius requisitorum alterutrum infert voluntas illa absoluta & firmissima salutis, qualem statuimus sicuti contritio perfecta infert de facto voluntatem suscipiendi Sacramentum Baptismi vel pœnitentiæ, quando adest potestas suscipiendi illa Sacramenta, quæ si in casu non susceperet, non saluaretur.

82. Ut autem clarius pateat insufficiencia totius hujus argumenti; ponamus Deum (quod potuit) non annexisse remissionem peccati soli contritioni perfectæ, sed præterea requisivisse quid aliud, v. g. à divitibus eleemosynam: quæro an posito eo casu, actus perfectæ contritionis minus excluderet voluntatem actualem peccandi, quam excludat de facto? æquè sine dubio excluderet, cum efficacia actus sit ejus prædicatum intrinsecum, & independens à præmio quod ob illum confertur; ergo ad exclusionem peccati actualis & efficaciam actus, nihil omnino facit, siue spes beatitudinis se sola sufficiat ad beatitudinem consequendam, siue non; sed solum facit in ordine ad remissionem peccati præteriti. Unde ulterius in ordine ad exclusionem peccati actualis per actum, impertinens est, quod quis sit in peccato habituali: si enim actus spei vel timoris elicitus à iusto faciat, ut simul stare nequeat voluntas actualis peccandi, eandem excludet elicitus, à peccatore.

83. Opponit 5. Licet actus spei imperet, ut voluntas abstineat ab omni peccato, si tamen nullus accedat benevolus in Deum affectus, voluntas non parebit. Assumptum probat; quia in casu voluntas non imperat sibi ex toto & plenè, neque ex affectu positivè contrario malæ voluntati in anima existentis; adeoque anima sibi ipsi resistente, non excluditur voluntas peccandi.

Resp. negando ass. ad probationem dico: imperet sibi ex toto & plenè, quod æquè potest ex motivo beatitudinis, quam ex amore sanitatis ex toto & plenè sibi imperare volitionem medicinæ necessariæ. Verum etiam non est, quod non imperet ex affectu positivè contrario voluntati malæ, cum amor beatitudinis illi æquè contrarietur, quam amor Dei, aut quam volitio sanitatis notationi medicinæ necessariæ. Porro quia hic Auctor videtur vim ponere in eo, quod mala voluntas exultat in animo, siue, ut intelligo, præexistat, adverte hanc præexistentiam nihil omnino ad rem facere; nam siue præexistat siue non, idcirco non magis minusve excluditur eo tempore, quo adest actus spei, sicut non magis minusve ea propter excluderetur per actum amoris Dei. Quod locum habet in omnibus actibus contrariis.

84. Ad simile quod ibidem adfert de amore naturali, ex quo si voluntas sibi imperaret abstinentiam ab omni peccato non plenè, nec cum effectu imperaret.

Resp. quod actus unus voluntatis positivè repugnet alteri, petendum non est ex supernaturalitate; tam enim non possum idem velle & nolle per actus naturales, quam si alteruter aut uterque statueretur esse supernaturalis. Hinc dico, qui in statu puræ naturæ (quidquid sit de statu præcænti) Deum actu naturali perfecte amaret, non posset simul habere voluntatem peccandi. Sic si alterum hominem amore amicitie perfecte amaret actu naturali, non possum simul velle malum ipsi inferre. Eodem modo absoluta voluntas fugiendi gehennam in statu puræ naturæ, non compateretur secum voluntatem peccandi, per quam gehenna incurreretur.

85. Instat: sit æger ita oppressus melancholiâ, ut, nisi eam depellat, sit brevi moriturus; non potest in casu amor vitæ plenè imperare actum gaudii, nisi accedat novum & priori contrarium motivum lætitiæ, nec imperare abstinentiam à tristitia, nisi accedat contrarium motivum illius abstinentiæ. Ergo similiter amor concupiscentiæ circa salutem non potest imperare abstinentiam à peccato aliis virtutibus opposito, nisi accedat motivum peccatis contrarium.

Resp. negando antecedens: sicut enim ut voluntas ex amore sanitatis sumat potionem amaram, patiatur se uri & secari, non requiritur aliud motivum, quam bonitas sanitatis, ut experienciâ constat; imo cum sumptio illa sit medium, non habet quâ tale aliam bonitatem quàm finis. Sic ergo ut voluntas cohibeat melancholiam, quatenus ea est libera, non requiritur in casu aliud motivum, quàm bonitas sanitatis.

Quod si ponamus in casu ægri, ad evadendam mortem non sufficere absentiam tristitiæ, sed insuper requiri positivam lætitiâ; neque in intellectu adit ulla cogitatio, quæ nata sit lætitiâ terminare; fateor eo casu non posse voluntatem immediatè sibi imperare lætitiâ, sed tantum mediâtè, imperando scilicet intellectui repræsentationem objecti lætitiæ excitandæ proportionatis non quo habeat novum motivum lætitiæ, sed quo habeat hujus objectum per intellectum repræsentatum. Neque id speciale est huic casui: nam proposito per intellectum solo bono, non potest voluntas sibi imperare odium, nec proposito solo malo amorem, nisi mediante in intellectu propositione objecti proportionati actui imperato.

Dixi: si ab intellectu non repræsentetur objectum lætitiæ: nam in casu illius ægri sufficit ad concipiendam lætitiâ, quod audiat nondum esse de vita sua desperatum; de quo objecto si gaudeat, æquè mortem evadet, quàm si de alio quopiam objecto.

86. Atque hæc de antecedenti, ex quo rectè intellecto nihil vel in speciem

ciem contra nos inferri potest. Nam licet verum sit, quod voluntas non possit sibi imperare odium & abstinentioniam ab omni peccato, quamdiu in eo non repræsentatur ab intellectu aliquid odibile, sed sola v. g. ejus bonitas & delectabilitas: potest tamen quando repræsentatur sub ratione mali; sufficienter autem repræsentatur ut tale, quando cognoscitur per illud incurri tormenta sine fine duratura, & amitti summum & æternum bonum: idque novit omnis qui spirat, ut dicebat Eekius num. 75.

Fatetur etiam P. Farvacques pag. 42. in medio, desiderium beatitudinis æternæ movere ad executionem mediorum, inter quæ præcipuum est abstinentionia à peccato: si spes ad hanc moveat, cur quælo non possit voluntas tam potenti motivo sinere se trahi ad abstinentioniam peccati? nisi contra sensum omnium dicas dari non posse intentionem finis efficacem, quæ efficax etiam sit circa mediorum adhibitionem.

Ex dictis patet, nullius planè roboris esse rationes contra nos hæcenus factas. Quare cum in hoc puncto totus ferè vertatur controversiæ cardo, nolique fateamur, actum in Sacramento requisitum deesse positivè excludere omne peccatum, toti in id incumbere deberent adversarii, ut efficaci quopiam argumentoproben, non posse metum gehennæ positivè excludere omne peccatum, tunc enim vel nobis fatentibus rem confecerint.

§. 4.

Responsio ad testimonia D. Augustini.

Non est animus sigillatim hæc referre & explicare testimonia D. Augustini sæpe valde prolixa. Solùm ergo aliqua notabimus ex quibus facile erit ea, quæ ex illo objici possunt, dissolvere.

87. Notandum primò: S. Augustinum per timorem servilem sæpe intelligere timorem humanum & malorum temporalium; timorem verò extremi judicii, timorem poenarum æternarum, & amorem præmii cælestis vocare timorem castum. Sic intelligit libro de Sancta Virginitate cap. 38. Ubi adhortans virginem ad timorem Domini subdit: *Timor quidem non est in charitate, sed perfecta charitas foras mittit timorem, sed timorem hominum, non timorem Dei; temporalium malorum, non divini in fine judicii.* Timor autem qui foras mittitur à charitate, etiam juxta adversarios, est omnis & solus timor servilis; ergo timor judicii, & æternorum malorum non est timor servilis juxta Augustinum hoc loco. Et eodem cap. infra: *Dicit Apostolus: NON ENIM ACCEPIMUS SPIRITUM SERVITUTIS ITERVM IN TIMORE, SED ACCEPIMUS SPIRITUM ADOPTIONIS FILIORVM.* Illum cum timorem credo dicere, qui datus erat in veteri testamento ne amitterentur temporalia bona, quæ Deus promiserat, nondum sub gratia liberis, sed sub lege adhuc servis. Est etiam timor ignis æterni, propter quem deus dandum Deo servire

servire, nondum est nique perfecta charitatis. Ubi spiritum servitutis in timore explicat de timore temporalium malorum, de timore vero gehennæ tantummodo dicit, ex illo motivo Deo servire, nondum esse perfectæ charitatis, quod apud omnes in confesso est. Denique enarratione in Ps. 127. ante medium: *Alius timor permanet, alius excluditur, timor qui excluditur castus non est, qui autem permanet castus est. Quis est timor, qui excluditur? dignamini animadvertere, aliqui propterea tantum timens, ne quid mali in terra patiantur, ne illis agri tudo mœdat* &c. adhuc timor iste non est castus. Similia habet in Ps. 18. expositione 1. & in Psalm. 84. & alibi. Quidcumque autem dixerit Augustinus de timore servili, prout significat timorem mundanum & malorum temporalium, nihil urget contra spem boni, vel metum mali æterni, de quibus hic tantum agimus.

88. Porro de timore mali temporalis, & quidem ab homine infligendi, manifestè agit Augustinus in sermone 19. de verbis Apostoli; Ubi cum laudasset eos, qui inventam pecuniam domino suo reddunt, etiam dum nullus adest testis inventæ pecuniæ, pergens ad illos qui non reddunt, quando sine teste reperiunt, ait: *Quod invenisti, & non reddidisti, rapuisti. Qui alienum negat, si posset, & telleret. Quod non tollis, timor prohibet; non bonum facis, sed malum nectis. Quid est magnum timere malum? magnum est non facere malum, magnum est amare bonum: nam & latro timet malum, & ubi non potest, non facit, & tamen latro est; Deus cor interrogat, non manum. Lupus venit ad ovile ovium, quærit invadere, jugulare, devorare: vigilant pastores, latrant canes; non aufert, non occidit; sed tamen lupus venit, lupus redit. Numquid quia ovem non tulit, ideo lupus venit, & ovis redit? Lupus venit fremens, lupus redit tremens, lupus est tamen & fremens & tremens. Interroga ergo, & vide, si tunc non facis malum, quando potes facere, & ab homine non puniris. Nemo est ibi, nisi tu & ille cui facis malum, & Deus qui ambos videt: hoc time. Hunc locum Augustini sæpe inculcat P. Lupus, & pag. 64. ex eo probat timorem gehennæ cohibere tantum à peccatis externis, manente interim in animo voluntate perversa. Verum non satis considerat hunc locum adfert ad id probandum, idque duplici ex capite; primum est, quia illo loco agit Augustinus de peccato, quod opere completum est, nempe de iniqua rei inventæ detentione; ex eo autem quodd quis comparente domino neget rem a se inventam, eamque detineat, colligit Augustinus quod etiam raperet rem alienam, nisi poenam ab homine timeret. Alterum est quia agit de timore poenæ ab homine infligendæ, non autem de timore gehennæ aut poenæ à Deo infligendæ.*

89. Similiter dum lib. 2. contra litteras Petiliani cap. 83. ait: *Timor autem poenarum, estsi nondum habet delectationem bonæ conscientie saltem intra claustra cogitationis coercet malam cupiditatem.* Quibus verbis passim utuntur adversarii; hoc inquam loco evidenter agit de timore poenæ legibus humanis constitutæ ut indicat totus contextus. Quo eodem sensu dixit Epist. 144. Nam

pœna corporis, nisi non à voluntate, rament revocat ab opere peccati. Nec facile quisquam est, qui palam committat, quod per illicitam & immundam percipiat voluptatem, si cruciatus vindictæ certum est continuè servituro: & hinc

90. Notandum 2. Nihil nos urgere omnia illa D. Augustini testimonia, quibus aliquid statuit de timore pœnæ, non addendo, quod agat de pœna geheimæ; nam illa explicari commodissimè possunt de timore pœnæ à iudice humano instigendæ, de quo, ut vidimus, sæpe alibi agit, & quem certissimum est non excludere voluntatem internam peccandi, ut ostensum est num. 18. & sequentibus. Hoc modo explica quod dicit Concione 25. in Psalm. 118. *Timor quo non amatur iustitia, sed timeatur pœna, servilis est, quia carnalis est, & ideo non crucifigit carnem. Vivit enim peccandi voluntas, quæ tunc apparet in opere, quando speratur iniquitas &c.*

91. Notandum 3. nihilo plus urgeri nos, sed potius adversarios, illis testimoniis, in quibus D. Augustinus præter timorem pœnæ tantum requirit, ut adsit amor ac desiderium vitæ æternæ: fatentur enim adversarii eandem planè rationem esse desiderii vitæ æternæ, & timoris gehennæ. Porro non raro S. Augustinus postquam dixerat non esse faciendæ bona vel omittendæ mala ex timore gehennæ, subdit id faciendum ex desiderio vitæ æternæ. Sermone 19. de verbis Apostoli: *Si timore gehennæ non facis malum, nondum amore iustitiæ facis bonum. Aliud est timere pœnam, aliud amare iustitiam. Amor castus in te esse debet, quo amore desideres videre non ex uni & terram, non spectacula nugatoria &c. sed desideres videre Deum tuum.... Ecce propter quam visionem ac bonum, ecce propter quam visionem noli facere malum &c. & enarratione in Psalm. 127. Jam incipit homo iuste vivere, propterea non quia timet pœnas, sed quia amat æternitatem. Exclusus est ergo timor à charitate, sed successit timor castus. Ubi torus sequens contextus agit de desiderio præmii cælestis. Similiter lib. de S. Virginitate cap. 38. solum requirit à virgine timorem gehennæ & spem præmii cælestis ad hoc ut sit sancta corpore & spiritu: ait enim: *Aliud est enim desiderium præmii, aliud formido, iupplicii. Aliæ voces sunt, quo abibo à spiritu tuo; & quo, à facie tua fugiam, & aliæ voces sunt, unam petii à Domino, hanc requiram, ut inhabitem in domo domini.... Has voces tu habeo, quæ felicitas es ea qua sumus domini, ut sis sancta corpore & spiritu. Illis vocibus comitatur timor qui tormentum habet. His autem vocibus comitatur timor domini castus &c.**

92. Notandum 4. per timorem Dei & gehennæ sæpe intelligi nudum & instructuosum ac ignavum timorem, quo homo non sinit se trahi ad confugiendum ad misericordiam Dei, & detestandum peccata commissa, ac ea in posterum cavenda. Hunc timorem vocat S. Ambrosius supra num. 69. *Ignavam formidinem & hebetem metum.* De quo timore loquitur S. Augustinus in Psalm. 146. in fine: *BENE SENTIT DOMINUS IN TIMENTILUS EUM.* Sed numquid sic timeatur Deus, quomodo & laico? Nam & laico timeatur, & bestia

timeatur.

timetur, & homo iniustus & potens timetur multum. BENE SENTIET DOMINUS IN TIMENTIBUS EUM. Sed quomodo in timentibus eum: ET IN HIS QUI SPERANT IN MISERICORDIA EJUS. Ecce timuit eum Judas traditor Christi, sed non speravit in misericordia ipsius. Postea enim poenituit eum, quod tradiderit Christum, & dixit: peccavi, quia tradidi sanguinem iustum. Bene quidem timuisti, sed si sperares in misericordia ejus quem timuisti. Ille desperando abiit, & laqueo se suspendit. Ergo sic time dominum ut speres in misericordia ejus.

Quidquid de hoc ignavo & hebeti timore (quem multi ex hoc loco vocant poenitentiam Judæ proditoris) dixerit Augustinus, nihil ad nos; nam talis timor nullo modo est attritio, de qua disputamus: agimus enim juxta dicta num. 13. de timore, qui cum effectu movet ad confugiendum ad divinam misericordiam, ad deprecandum de præteritis, & proponendum non peccare in posterum. Talem autem timorem non tantum commendat hoc loco Augustinus, sed & asserit eodem placari Deum, subdit enim: placabis eum, si speres in misericordia ipsius, atque, ita de cætero peccare caveas, ut de præteritis depreceris, ut tibi dimittantur. Quæ omnia reperiuntur in nostra attritione. De eodem ignavo timore intelligi debet Augustinus, quando dicit non esse magnum timere poenam, quia etiam nequissimus & crudelissimus latro poenam timet. Certum enim est latronem illum, qui timore poenæ & spe veniæ à Principe impetrandæ statueret desistere à latrocinio, & unicuique ablata restituere, vocari non amplius posse nequissimum latronem; agit ergo de eo, qui timet quidem, sed non patitur se trahi illo timore ad emendationem &c. adeoque non loquitur de timore in sensu nostro. Et hinc facilis erit explicatio multorum, quæ ex illo obijci possunt.

93. Similiter D. Augustinus per timorem servilem quandoque intelligit nudum & ignavum timorem, quo sibi conscius peccati commissi timet ne jam jam instet finis vitæ & dies judicii. Per castum verò timorem, illum quo quis sibi bene conscius optet adesse horam judicii. Ita explicat ipse enarrat: in Psal. 127. *Videat unusquisque qualem timorem habeat, an eum quem excludit charitas, an castum. absens est sponsus noster, interroga conscientiam, vis ut veniat, an adhuc vis ut tardet? quam multi si dicatur illis: ecce jam Christus, eras dies judicii, non dicunt, minam veniat. Qui enim dicunt, multum amant; & si dicatur illis, tardabit, timent ne tardet, quia timor castus est.* Huic loco sic intellecto optime quadrat simile, quod cum hæc, tum sæpe alibi adfert Augustinus de duabus poenitis, quarum altera adultera, casta altera; hæc timet ne discedat vir, illa ne redeat; quia nempe conscia est commissi adulterii. Vel si uterque vir sit absens, casta timet ne tardet, adultera ne veniat. Et hic rursus non est timor is, de quo agimus: aliud est enim timere quia peccaveris, aliud timere ne pecces. Ut rectè Ambros.

94. Notandum quintò. Plurima D. Augustini testimonia explicanda

de timore quem vocamus serviliter servilem, nempe dum quis habet hunc affectum (qualem sæpe habent servi) vellem facere peccatum, nisi obstaret poena. De tali servili timore agit manifestè S. Augustinus Tract. 9. in Epist. Joannis, ex quo loco, quia sæpe argumentantur adversarii; necesse duxi, quamvis longiorem, huc transcribere: sic autem ait: Non potest melius explicari, quid intersit inter duos istos timores, unum quem foras mittit charitas, alterum castum, nisi ponas duas mulieres maritalas, quarum unam ita constitutas volentem facere adulterium, delectari nequitia, sed timere ne damnetur à marito. Times maritum, sed quia adhuc amat nequitiam, ideo timet maritum; huic non grata, sed onerosa est viri presentia. Et si fortè viris nequiter, timet maritum ne veniat. Tales sunt qui timeant ne veniat dies judicii, Fac alteram amare virum; debere illi castos amplexus, & nullà se adulterij immunditià maculare, optat presentiam viri. Et quomodo discernuntur duo illi timores? Timet illa, timet & illa. Interroga, quasi unum tibi respondens. Interrogetur illa, times virum? timco. Interroga & illam si times virum: respondet, timeo. Una vox est, sed diversus animus: jam ergo interrogentur quare: illa dicit, timeo virum ne veniat, ne damnet: illa, timeo ne deserat. Pone hoc in animo Christianorum, & invenisti timorem, quem foras mittit charitas: & alium timorem castum. Loquamur ergo huic primo, qui sic timet Deum, quomodo illa mulier, quam delectat nequitia: salubris enim primo loquimur; O anima, quæ sic times Deum quomodo illa mulier, quam delectat nequitia, times virum.... & quid dicimus fratres? Illa mulier quæ ideo timet virum, ne damnetur à viro, fortè non facit adulterium, ne aliquo modo perveniat ad virum, & tollat ipsi lucem istam temporalem. Potest autem vir ille & falli: Timet illa eum, extra cujus oculos potest esse: tu non times semper faciem supra te viri sui? **VULTUS AUTEM DOMINI SUPER FACIENTES MALA.** Captat illa absentiam viri sui, & incitatur fortè delectatione adulterij, & dicit sibi, tamen non faciam; absens est quidem ille, sed difficile est, ut non ad illum quoquo modo perveniat. Temperas se ne perveniat ad hominem, qui potest & nescire, qui potest falli. Tu non times oculos ejus, quem fallere nemo potest? Tu non times ejus presentiam, qui averti à se non potest? Augustinus hoc loco per timorem servilem seu non castum intelligit similem illi, quem habet ista conjux, quæ de facto delectatur adulterio, velletque committere; sed solo cohibetur timore ne faciat; adeoque agit de homine qui tuperet non esse gehennam, ut tunc liberè peccaret. Neque dici potest, quod Augustinus ita loquatur de eo, qui dum timet habet internum affectum ad peccatum; non quòd in illo sit quid peculiare; sed quia supponit ita semper fieri, quoties quis movetur spiritu timoris gehennæ aut judicii: hoc inquam dici non potest; nam inepta esset illa Divi Augustini oppositio, quòd nempe uxor, quæ adulterinum, quem fovet, animum opere non explet per hoc virum timeat; ille autem qui interius peccat, Dei faciem, oculos, presentiam omnia perlustrantis non timeat, male assereret illum non timere Deum, si timor à peccato etiam interno cohibere non possit. Dum ergo

ergo dicit talem non timere, manifestè ostendit, posse etiam illum actum internum timore comprimi & excludi. Agit ergo de timore inefficaci, & ignavo ac hebeti, & sic rectè quadrat reprehensio D. Augustini, quòd, cum uxor virum timeat, & ex timore caveat ea, quæ possunt ipsi innotescere, homo non formidet peccare coram oculis Dei, adeoque Deum non timeat, vel non satis timeat. Et juxta hæc explicari possunt & debent plurima hujus Patris testimonia ab adversariis congesta, & præsertim illa, in quibus, ut sæpe facit, expressè addit, quòd timentes habeant afflictum peccandi, si pœna gehennæ esset sublata: item illa omnia in quibus adfert idem hoc simile de duabus matronis altera casta, altera adultera: & hac explanatione utuntur Doctores passim omnes.

95. Notandum sextò D. Augustinum etiam admittere, cum timore servili stare posse peccatum externum. Nam in Psal. 90. ita ait: *Ne incurrerent legem (veteris) reatum, missus est Spiritus S. ut amorem faceret, & servet à timore. Timor legem non implebat, amor implevit. Timuerunt homines, & non impleverunt, amaverunt & impleverunt. Timebant homines, & rapiebant res alienas: amaverunt & donaverunt suis* Ecce peccatum externum, quod juxta Augustinum stat cum timore servili, seu legis veteris; adeoque fateri debent etiam adversarii illum hoc loco agere de timore inefficaci & ignavo, ex quo non parum confirmatur quod diximus à num. 92.

96. Notandum septimò. Quando Augustinus requirit charitatem, amorem justitiæ, boni & similia, gratis id explicari ab adversariis de amore Dei propter se dilecti seu amore benevolentis. Certissimum enim est apud illum sæpe usurpari charitatem, amorem boni &c. pro actibus, qui non sunt amor benevolentis in Deum, sed amor cujuscumque demum virtutis. Patet id ex libro 4. contra Julianum cap. 3. ubi cum dixisset: *Amor fructus quibuscumque creaturis, sine amore creatoris, non est à Deo. Amor autem Dei, quo pervenitur ad Deum, non est nisi à Deo... sine hoc amore creatoris, nullus quiquam bene utitur creaturis.* Subjungit: *Hec ergo amore opus est, ut bonum beatissimum sit, & pudicitia conjugalis, ut sit ejus intentio, quando utitur conjugis carne, non in voluptate libidinis, sed in voluntate procreationis.* Ecce juxta Augustinum opus conjugale fit ex amore Dei seu charitate, quando fit ex intentione procreandi prolem qui est finis honestans copulam conjugalem. Idem patet ex Tract. 9. in epist. Joannis in fine, ubi per diligere Deum intelligit dilectionem proximi, & aliorum mandatorum divinarum observationem. Neque id diffiteri videtur P. Lupus; nam cum pag. 11. de dilectione Dei dixisset: *Sine hac nullam impleri legem, nullum servari divinum mandatum, nullum mentis nostre opus aut morum esse quemadmodum oportet bonum, clamat assidue Augustinus.* Postea tamen pag. 13. & 19. asserit ad bona opera, & divinarum legum impletionem sufficere amorem Dei virtutalem, quem negat sufficere in dolore

fore de peccatis : non explicat tamen quid intelligat per amorem virtualementem. Verum quomodocumque demum id intelligat; in hoc pro nobis facit, quod sicut ipse, dum Augustinus pro quovis bono motu requirit dilectionem Dei, explicat de amore virtuali, non autem de expresso & formali, eadem in explicatione utinobis liceat, quando pro poenitentia dilectionem Dei requirit. Imo sicut ipse explicat de virtuali in suo sensu, ita nos de virtuali in sensu nostro & S. Augustini proximè explicato.

97. Notandum octavo. Sæpe intelligi posse Augustinum de periculo, quod in magnis præsertim peccatoribus meritò timetur, ne dum timent, poenam, non timeant satis efficaciter, adeoque in animo maneat prava affectio ad peccatum. Hunc sensum præferunt verba illa ex sermone 19. de verbis Apostoli *Timeo dicere; si timore gehennæ non facis malum, est quidem in te fides quia credis futurum Dei esse iudicium: gaudeo fidei tuæ, sed adhuc timeo malitiæ tuæ.* Eodem modo intellige illud ex sermone 15. de verbis Apostoli: *Non sinitur, non adulteratur, non dicit falsum testimonium, non facit homicidium, non concupiscit rem proximi sui. Potest hoc, potest fortassis. Unde timore poenæ: quamquam qui timore poenæ non concupiscit, puto quia concupiscit.* Quæ horum verborum explicatio planior est quàm illa, quam dat P. Lupus pag. 70. distinguens duplicem peccati cupi ditatem, patentem aliam & positam quasi in cordis superficie (puto sicut scyphus in sacco Benjamin) aliam in cordis profundo ac intimo recessu occultatam & latentem. Mirum, unde adeo occultam P. Lupus præ aliis deprehenderit.

98. Notandum Nonò. Sæpe tantum velle Augustinum, quod minus perfectum sit, detestari peccata ex motivo poenæ, quàm ex amore iustitiæ aut Dei; quod sic minus. perfectè recedatur à malo &c. Ità ipsemet serm. 19. de verbis Apostoli. *Nam etiamsi timore gehennæ non facis malum, nondum perfectus es.* Dux etenim sunt iustitiæ & perfectionis Christianæ partes, declinare à malo, & facere bonum: licet autem ex timore poenæ declinetur malum; ex illo tamen non potest fieri bonum: vide num. 70. Et rursus libro de S. Virginitate cap. 38: *Est etiam timor ignis æterni, propter quem d. vivandum Deo servire, nondum est utique perfecta charitas.* Ubi obiter adverto D. Augustinum per perfectam charitatem hoc loco non videri intelligere amorem Dei; subiungit enim immediatè: *Aliud est enim desiderium præmii, aliud formido supplicii: alia voces huius; quo abibo à spiritu tuo, & quo à sacre tue fugiam; & alia voces sunt: unam per à Domino, hanc requiram ut inhabitem in domo Domini.* Quæ incongruè subnexuisset per particulam enim, si per charitatem significare voluisset actum amoris in Deum. Porro familiare est Patribus præsertim in sermonibus directis ad eos, quos ad perfectiorem vitam instituunt, minus perfectam, tamquam aliquo modo mala, repudiare.

99. Notandum Decimò. Perperam nobis obijci illa testimonia D. Augustini, in quibus dicitur, quod metus gehennæ concupiscentiam dumtaxat com-

pefeat, liget, reprimat, frænct & similia, non autem sanet &c. Quid enim aliud sonant illæ voces compescere, reprimere, frænare concupiscentiam, quam huic resistere ac repugnare? Quare quemadmodum is, qui exortis concupiscentiæ motibus & desideriis indeliberatis non consentit, verè is resistit, & ab omni peccato liber est, prout constat ex Tridentino, & sateri debent omnes Catholici: sic quoque à peccato liber erit, qui eosdem concupiscentiæ prævios motus compescit, ligat, reprimat, frænât. Sicuti enim passim dicimus in Adamo fuisse frænum, ligamen concupiscentiæ, quia munere Dei speciali in illo continebatur seu compescebatur concupiscentia, ne exurgeret contra aut præter voluntatis imperium: sic quoque in nobis rectissimè dicitur compesci, reprimi, frænari concupiscentia, dum ex timore gehennæ illius pravis motibus indeliberatis non consentimus.

100. Atque harum explicationum quælibet longè minus tora est & violenta, quam sit ea quàm adhibere coguntur adversarii. Unde hac vel simili ratione exponendus est S. Augustinus, ne cum Tridentino, & communi Patrum ac Doctorem sensui, ac ipsi rationis dictamini cogamur oppositum sateri. Et sane licet aliqua in illo reperirentur loca explicatu difficilia saltem in speciem, hoc non obesset nostræ sententiæ. Cum etiam contra puncta ab Ecclesia definita, ut in materia libertatis, gratiæ, Eucharistiæ &c. Passim objiciantur ex Augustino testimonia saltem in speciem difficilia.

Alias præterea Auctoritates adfert P. Farvacques

1. Ex Ambrosio lib. 8. in Lucam cap. 17. *Infirmus custos diuturnitatis est timor; pudor vero bonus magister officii; qui enim metuit, reprimitur, non emendatur.*

2. Ex S. Gregorio lib. 1. Moral. cap. 11. *Ecclesia simplicitatis suæ & rectitudinis vias timore inchoat, sed charitate consummat; cui tunc est funditus à malo recedere, cum ex amore Dei coepit jam nolle peccare. Cum verò adhuc timore bona agit, à malo penitus non recessit.*

3. Ex D. Thoma 2. 2. q. 19. art. 9. *Timor servilis non est numerandus inter septem dona Spiritus S. licet sit à Spiritu S. quia, ut Augustinus dicit libro de natura & gratia, potest habere annexam voluntatem peccandi.*

101. Ad S. Ambros. non est opus respondere, sed tantum adferre ejus contextum. In illud autem: *Si peccaverit in te frater tuus increpa illum*: ita commentatur: *Plus proficit amica correptio, quam accusatio turbulenta; illa pudorem inducit, hæc indignationem movet. Servietur potius quod prodi metuat, qui monetur. Bonum quippe est, ut amicum magis se, qui corripitur, credat, quam inimicum; facilius enim consiliis acquiescit quam injuriæ succumbit* &c. ac subjicit: *infirmus enim custos* &c. Monet hic Ambrosius quod is, qui corripit fratrem, plus profecturus sit, si peccanti amicum se ostendat & amicè corripiat, ut sic alteri pudorem inculcat; & metum, ne prodatur peccatum. Quod si autem turbu-

lentè & cum injuria reprehendat, in promptu esse ut monitus indignetur, & injuriam injuriæ rependat. Quid hinc quæso inferri potest quo vel in speciem probetur, quod timor gehennæ aut spes præmii cælestis non excludat positivè peccatum, quod ad id necessarius sit amor amicitiarum in Deum? Quid quæso pudori, quo conceptus metuit sua peccata prodi, commune est cum amore amicitiarum &c?

102. Ad S. Gregorium Resp. ipsum illic agere de timore inefficaci & ignavo juxta dicta num. 94. Subdit enim: *Ex ipso peccat, quo peccare velles si peccare inultè potuisses.* Porro mens hujus Patris manifesta est ex iis, quæ attulimus supra num. 66. & seqq. Adde quod eodem illo capite, ex quo petuntur verba contra nos allata, ea dicat de spe, quæ nostræ sententiæ favent contra adversarios.

103. Ad D. Thomam Resp. id non facere contra nos, fatemur enim dari posse timorem servilem, qui habeat annexam voluntatem peccandi, talis esset, quo timeretur poena ut summum malum, ita ut quis ad eam vitandam velit peccare: & hic est timor strictè servilis. Porro quia dari potest talis timor servilis, negat D. Thomas timorem servilem enumerandam inter septem dona spiritus S. Præter illum autem datur alius timor servilis non ita timens poenam ut ad eam evadendam velit peccare, sed quo propter malum, quod timet, simpliciter vult omne peccatum ejus mali causam vitare, licet ad hoc vitandum nondum feratur amore justitiæ. Et talem agnoscit D. Thomas ibid. art. 7. in corpore: *Quantum ad effectum, initium sapientiæ est, unde sapientiæ incipit operari, & hoc modo timor est initium sapientiæ. Aliiter tamen timor servilis, & aliter timor filialis: Timor enim servilis est, sicut principium extra disponens ad sapientiæ, in quantum aliquis timore poenæ discedit à peccato.* Hanc responsionem adhibet Sylvius in quæst. citatæ art. 4. & 9. aliique passim.

CAPUT VI.

An timor gehennæ, & dolor peccati inde conceptus bonus sit & honestus.

UT clarius intelligatur, quænam circa hoc fuerit doctrina Lutheri, eam per partes proponemus.

104. Primò igitur generaliter, asseruit Lutherus, quidquid liberum arbitrium agit sine charitate, peccatum esse, ex quo consequens est etiam dolorem ex puro metu gehennæ. seclusa charitate peccatum esse, secundum illam nempe rationem generalem privationis charitatis. Constat id ex Eckio & ex ipso Lutero variis locis, quæ superfluum esset adducere, cum adversarii planè contendunt Lutherum ita docuisse.

105. Secundò Lutherus agens de dolore peccati ex metu gehennæ considerato juxta specificam & sibi propriam rationem, dixit illum facere hominem hypocritam & magis peccatorem: quod tamen Lutherus non intellexit de timore secundum se spectato, & ratione sui, sed ratione actus à metu inseparabilis, qui nempe sit affectus inefficax ad malum, odium legis, & justitiæ displicentia quodd non liceat peccare &c. ut ostentum est ex ejus verbis num. 32. & 33.

106. Tertio metum servilem passim agnoscit non esse malum, si adsit amor justitiæ vel Dei. Sic in disputatione Lipsica ad loca Patrum, quibus Eckius probabat bene & laudabiliter inchoari poenitentiam à timore: respondet Lutherus: *Dico & ego habita charitate simul moveri hominem ad timorem Dei, & se incipi poenitentiam à timore in charitate.* Alioquin stat firma sententia, quod timor bonum non operatur, sed edit legem. Et rursus infra: *Respondet, quod D. Gregorius non debet excludere charitatem, nec excludit à timore incipientem poenitentiam, sicut D. Doctor intelligit, sicut nec à charitate excluditur omnis timor servilis præsertim in hac vita, cum charitatis officium sit expellere timorem servilem, atque id totà viâ....* Scopus iste versatur, quod auctoritate Pauli timor servilis non possit esse nisi peccatum, & augere peccatum, si desit gratia..... Quod autem Augustinus dicit, bonus est timor: verum est si includatur gratia.... Non accipit (Eckius) quod dixi gratiam prævenire & timorem & amorem, nisi loquar de gratia primæ motionis. Ego cum Apostolo & Augustino sentio, quod nisi lex diligatur (quod est charitatis) non bene vivitur, ergo nec Deus timetur nec coëtur.... Respondet Ambrosium, Gregorium aliosque non repugnare dictis Apostoli, & sibi eorum sententiæ. Non enim excludunt charitatem à timore fructu servili, fructu filiali.

Quidquid ergo dicebat Eckius de bonitate timoris servilis, admisit Lutherus, si intelligatur de timore, qui conjunctus sit charitati; quod si ab hac separètur, illum reprobat duplici ex capite 1. ratione actus inefficacis mali necessarii conjuncti. 2. ex generali illa ratione, qua omnis actus, qui pro motivo non habet charitatem, malus est.

107. Consentit Jansenius Tom. 3. lib. 5. cap. 31. *facile apparet animum, qui solo pænæ timore, nullo Dei aut justitiæ amore peccatum vitat, non hoc ita vitare posse, ut omni ex parte peccatum caveatur.* Nam præterquam quod eo modo voluntate reus est, quo supra ex Augustino diximus, quatenus intrinsecus est, malletque facere nisi pænâ terreret; ex alia quoque consideratione labem contrahit, quatenus pœnas timendo in sui-ipsius amore requiescit, cujus malum ita formidare, sicut bonum appetere debuisset, ut in utroque affectu seipsum referret in Deum.... quod qui non in omnibus actibus & affectibus suis facit sine dubitatione delinquit.

Nec refert quod cap. 21. in titulo dicat: *Timor gehennæ secundum se consideratus licitus, bonus, rectus est.* Quod in decursu probat tum ex Augustino, tum ex ratione, addens nullum sanæ mentis id negaturum. Verum qualem

bonitatem timori gehennæ attribuat, patet ex sequentibus: *Non enim qui penam timet, hoc ipse excludit à sua voluntate debitum finem ultimum. Quapropter si quis in pena fugienda velut in termino hæreat, per quam tanquam viam transire debuisse, non illa timoris, sed timentis culpa est..... qui in illa commoratur, nullius aliterius malitia adjunctione delinquit.* Addit exemplum de potus cibique sumptione, quæ secundum se damnanda non est, licet in ea peccetur, quando non apponitur finis charitatis, quem apponi lex Dei æterna jubet.

Censet ergo Jansenius actum, qui sistit ultimæ in timore seu fuga gehennæ, esse simpliciter malum; timorem tamen gehennæ secundum se seu abstractivè & genericè consideratum non esse malum, cum bonus sit timor quando in eo non sistitur, sed refertur ulterius in Deum. Sive vult timorem servilem esse bonum, quatenus est timor gehennæ, esse autem malum in quantum servilis est, seu sine amore Dei. Cur non similiter dicit odium Dei esse bonum, quatenus odium est, non autem quatenus Dei, cum similiter dari possit aliquod aliud odium, quod bonum sit? cur non dicit hominem, quatenus animal, esse brutum &c? quæ omnia absurdissimè dicuntur, nam dum actus in solo timore sistens consideratur præcisè quatenus est timor gehennæ, spectatur sola ratio genericæ timoris gehennæ, quæ indifferens est ad bonum & malum, adeoque sub illa ratione nec bonus est nec malus, sed malus erit, si determinetur ut sit servilis, bonus vero si determinetur ut sit filialis.

108. Examinemus modo, quam in hoc puncto sit mens P. Lupi. Act. 1. quidem dolorem ex solo metu gehennæ ab eo reprobari ratione actus necessariò & inseparabiliter conjuncti, quatenus adest voluntas malè agendi, si poena abesset, patet ex dictis num. 26. & seq. atque adeo admittit malum esse talem metum quasi extrinsecè, ratione actus mali adjuncti, quod, ut vidimus, asserit Lutherus. Videamus ergo quid censet de altero capite, unde hujus actus malitiam desumebat Lutherus. P. Lupus pag. 68. ita loquitur: *Prima hujus timoris imperfectio, est imperfectio seu vitium radice: oritur enim non ex casto Dei seu justitia, sed ex mercenario amore sui ipsius, quo homo sibi bene vult esse, non solum in hac vitâ, sed etiam in futura. Porro sui ipsius amorem, quo homo non in Deo, sed in se ipso respiciunt dicitur, esse FONTEM IMPURUM, ET OMNIS DISTORTI AFFECTUS PRIMAM RADICEM, est unum de fundamentis doctrinæ Catholicæ & Augustinianæ.* Hoc loco timorem gehennæ reprobat ex alio capite, nempe ex ipso actus motivo: quia sistit in amore sui, non autem in Deo tanquam motivo: talem autem sui amorem vocat fontem impurum, & omnis distorti affectus primam radicem. Atqui actus, de cujus bonitate hic disputamus, est is, qui sistit in timore, adeoque cui ex suis intrinsicis convenit, quod pro motivo habeat amorem sui, & non Dei propter se dilecti. Ergo juxta P. Lupum ille actus secundum se & sua intrinseca consideratus, habet

habet impurum motivum, estque affectus distortus seu malus. Illum ipsum amorem sui malum pronuntiat pag. 20. ubi agens de eo qui Deum amat ut sibi bene sit, ita loquitur: *Non castam benevolentiam, sed IMPURISSIMAM AVARITIAM & CONCUPISCENTIAM esse istiusmodi dilectionem, ostendit eleganter in libris de vita contemplativa Julianus Pomerius: Qui amicum propter commodum quodlibet amat, non amicum amare convincitur, sed commodum. Et ideo Deus, quo nihil majus aut melius, propter quid diligitur? propter seipsum perfecte diligitur. Si vero saltem propter illa, quæ præstat, amatur, non utique gratis amatur, quia jam illud, propter quod diligitur, ei, quod DICTUM quoque NEFAS est antefertur.*

Quod idem rursus timori gehennæ applicat P. Lupus pag. 71. Gehennæ metus ex proprio sui-ipsius amore nascitur, adeoque qui ob illam solam, & non Christum Dominum à gravi peccato abstinere, non solummodo plus illam timet, sed & seipsum supra Dominum diligit: quod esse etiam COGITATUM HORRENDUM, supra nobis Julianus Pomerius dixit. Ecce quia desiderium vitæ æternæ & timor gehennæ, si in illis motivis sistatur, nascitur ex amore sui-ipsius, ideo qui sic sperat vel timet, seipsum supra Dominum diligit: hoc autem est dictum nefas & cogitatu horrendum, est turpissima avaritia & concupiscentia, ut cum suo Juliano pronuntiat P. Lupus. Atqui nasci ex amore sui-ipsius essenziale est actui de quo disputamus, ergo hic actus juxta P. Lupum ex suis intrinsecis non tantum malus est, sed & insigniter malus, id enim sonant illa verba; dictum nefas, cogitatu horrendum &c.

109. Verum dices P. Lupum sæpe repetere metum gehennæ esse utilem, bonum, sanctum, imo Lutherum temeritatis incusat, quod eundem pronuntiarit malum. Ita enim loquitur pag. 73. Fundat se Martinus Lutherus in Sancto Augustino, palam asserente, servilem gehennarum metum esse proprii, lucidè vitiosi amoris factum, ideoque vult illum non posse non esse vitiosum. Neque hic stetit hominis temeritas.... Metum purè servilem, non tantum utilem, sed etiam bonum, audivimus supra à Sancto Thoma & S. Augustino, qui omnino nusquam eum dixit peccatum, malum, vanum, aut vitiosum, & pag. 75. Gehenna metum, uti sanctum & Dei donum, laudari vario S. Augustini & aliorum Patrum testimonio novè. Denique Pag. 82. Hinc conceptam ex metu servili contritionem esse legitimam, sanctam ac veram non est ambigendum: & hinc Julianus Pomerius, servilem gehennæ metum dicens esse in vitio, non est bene locutus. pag. 74.

110. Quomodo hæc consistunt? metus purè servilis utilis est & bonus, sanctus ac Dei donum; contritio ex metu servili concepta sine dubio legitima, sancta, ac vera est. Quomodo inquam hæc consistunt cum iis, quæ supra ex eodem auctore retulimus, nempe quod dilectio, qua quis Deum amat, ut sibi bene sit vel non inale, sit turpissima avaritia & concupiscentia, quod per illam proprium commodum antefertatur Deo, quod dictum quoque

nefas est; quod aliquid supra Deum diligatur, quod est etiam cogitatu horrendum. An forte id, quod bonum ac sanctum est, potest simul esse turpissima avaritia & concupiscentia, dictu nefas, & cogitatu horrendum?

111. Rem perplexam duce Jansenio nobis evolvet P. Lupus dum pag. 74. de eodem actu pronuntiat *esse licitum, bonum, irreprehensibilem, ac solo officio & substantiâ, non sine & radice. Nec enim est propter Deum, sed propter proprium sanguinem; Neque ex casto Dei, sed ex privato sui amore procedit.* Et rursus pag. 75. postquam dixerat, timorem gehennæ ab Augustino laudari, ut sanctum & Dei donum; pro ratione seu explicatione subnectit: *Nempe non omnis istius mali metus est servilis; aliquis etiam castus est, qualis fuit in Adamo ante lapsum, & in multis postea sanctis, timentibus illud, non quia ipsis durum sit, sed quia intellectualis creatura à naturali ejus sine separativum.* Mira responsio.

Controvertitur an metus gehennæ servilis, id est qui ultimâ sistit in timore illius poenæ, sit bonus nec ne, & ipse P. Lupus capiti 15. hunc præfigit titulum: *An ob istas imperfectiones servilis gehennæ metus sit peccatum?* & respondet non esse peccatum, sed esse bonum, sanctum, ac Dei donum, quia nempe datur aliquis alius metus gehennæ, qui non sit servilis, sed ultimâ referatur in Deum; hic autem bonus est & sanctus. Simile sane foret responsum, si duobus hoc primùm mense legitimè matrimonio junctis, rogantibus, an copula quam inter se habuerunt ante annum mala fuerit & peccaminosa; responderem, illam copulam non esse peccaminosam, sed licitam, bonam, irreprehensibilem: ejusque tam solidæ resolutionis æquè solidam nempe rationem adjungerem, quia datur inter vos aliqua copula, quæ bona est & irreprehensibilis, ea nimirum quæ fit ex debito sine constante jam inter vos matrimonio. Neque necesse est extra materiam de qua agimus argumentum petere. Sit aliquis qui affirmet metum gehennæ castum & filialem malum esse & peccaminosum. Id negare non poterit P. Lupus: nam eodem modo alter pro ratione adferet: nempe non omnis istius mali metus castus est & filialis, aliquis etiam servilis est, qualis est in iis, qui gehennam timeant, quia ipsis dura est; non autem quia intellectualis creaturæ à naturali ejus sine separativa.

112. Quæro ergo: an metus gehennæ servilis sive qui sistit in timore poenæ, nec assurgit ad Deum diligendum; an inquam hic specificus actus bonus sit nec ne? si dicas malum esse; quid Lutherum reprehendis illum actum vitii damnantem? ut quid pronuntias malè locutum esse Julianum? Si vero admittas esse bonum: malè igitur asservisti, esse *turpissimam avaritiam & concupiscentiam*; malè quod per illum ipse timens se Deo anteferat; id autem esse *dictu nefas & cogitatu horrendum*; malè quod sit bonus solo officio, non sine.

113. Evidens igitur est, P. Lupum omnino affirmare, timorem servilem malum esse & peccaminosum, nec nisi fictam ac chimæricam ei boni-

tatem attribuere, nempe non aliam, quam hæc sensu, quod detur actus timoris gehennæ filialis, qui bonus sit. An non vidit, eodem sensu timorem gehennæ filialem vocari posse malum, quia datur ejusdem gehennæ timor qui malus sit? cur enim non æquæ actus ab opposito actu malo appellari possit malus, quàm alter ab opposito bono bonus. Quod quid aliud est, quam omnia confundere, & bonum appellare malum, & malum bonum. Nihil aliud ergo his agit P. Lupus, nisi ut cum maximè afferat timorem servilem esse malum, videatur tamen apud ignaros bonum asserere. Cæterum quam à S. Augustino dissideat P. Lupus, dum actum, quem fatetur solo officio bonum esse, non autem fine, appellandum nihilominus censet bonum, ex ipso Augustino discamus. Hic lib. 4. contra Julianum cap. 3. ante medium ita cum redarguit. *Novitis itaque non OFFICIIS, sed FINIBUS à vitiis discernendas esse virtutes. Officium est autem quod faciendum est; finis vero, propter quod faciendum est. Cum itaque facis homo aliquid, ubi peccare non videtur, si non propter hoc facis, propter quod facere debet, PECCARE convincitur. Quæ tu non attendens, FINES ab OFFICIIS separasti, & virtutes veras OFFICIA sine FINIBUS appellandas esse docuisti. Ex quo te tanta absurditas sequitur. Cre. Et rursus post pauca: Quidquid autem boni fit ab homine, & non propter hoc fit, propter quod fieri debere, vera sapientia præcipit, IPSO NON RECTO FINE PECCATUM EST. Audis? ipso non recto fine peccatum est: quomodo ergo asseris, Augustinum omnino nusquam timorem servilem vocare peccatum, si verum est, quod ais; illum non esse bonum fine, sed solo officio?*

Lutherus igitur timorem gehennæ servilem malum existimavit duplici ex capite, nempe & ratione actus concupiscentiæ necessariò conjunctæ; & quia ille actus caret debito fine. sed non refertur in Deum: ex quo utroque capite malum agnoscit P. Lupus.

114. Notandum: licet Lutherus in timore servili non aliam agnovisset malitiam, quàm extrinsecam illam ratione actus mali inefficacis necessariò conjunctæ, non adeo incongruè fuisset locutus, si ea propter ipsum timorem servilem appellasset malum. Nam teste Andrea Vega libro 6. de justif. cap. 25. multi Catholici Auctores tradiderunt tunc vitiosum esse timorem servilem, quando ei adest hic actus: nollem implere præceptum, nisi immereret pœna. Ipse tamen Vega negat timorem etiam tunc dicendum vitiosum, quia, inquit, & in se bonus est, nec est causa hujus voluntatis malæ. In sententia autem asserente affectum illum malum necessariò comitari timorem gehennæ, non apparet quomodo dictus timor non sit aliqua ratione causa prava illius voluntatis.

115. Assert. 1. Non est peccaminosum, sed bonum & honestum, intuitu æternæ mercedis sustendo in illo motivo, detestari peccata, aut mandata Dei observare.

Prob. 1. ex scriptura, quæ passim homini proponit præmiũ celeste ut bene operetur, monetque ex hoc motivo operari, ostenditque Sanctos illius intuitu operatos. Matth. 6. *primum querite regnum Dei &c.* Lucæ 16. *facite vobis amicos de mammona iniquitatis, ut, cum defeceritis, recipiant vos in æterna tabernacula.* Simile est illud Apost. 1. ad Corint. 9. *debet in spe qui arat arare, & qui triturat in spe fructus percipiendi;* Christus prædicationem exorsus est à spe præmii Matth. 4 v. 17. & cap. 5 v. 2. sic inchoavit Joannes Matth. 3. v. 2. Ab eodem iussit Christus inchoare Apostolos Matth. 10. v. 7. hoc intuitu operati sunt viri sancti; David Psal. 118. *Inclinavi cor meum ad sciendum iustificationes tuas propter RETRIBUTIONEM.* Moyses ad Heb. 11. *Majorem divitiis vestigans thesaurum Ægyptiorum improprium Christi: aspicebas enim in REMUNERATIONEM.* Paulus ad Philipp. 3. *ad destinatum personarum ad braviũ supernæ vocationis.* 1. ad Corint. 9. *Omnis autem qui in agone contendit, ab omnibus se abstinere, & illi quidem ut corruptibilem coronam accipiant, nos autem incorruptam.* Ad Coloss. 1. *Gratias agimus Deo audientes fidem vestram & dilectionem, quam habetis in sanctos omnes, propter SPEM quæ reposita est vobis in calis.*

116. Prob. 2. ex Tridentino sess. 6. can. 31. *si quis dixerit iustificatum peccare, dum intuitu æternæ mercedis operatur; Anathema sit.* Porro hic canon, ne aliàs imperfecta sit doctrina & captiosa, intelligi debet de eo, qui operatur intuitu solius mercedis æternæ, nam cum is qui hoc solo motivo operatur, propriissimè dicatur operari intuitu mercedis; si hic peccaret, quomodo posset Tridentinum dicere anathema asserenti iustum peccare, dum intuitu æternæ mercedis operatur.

117. Prob. 3. ex Patribus. S. Augustinus exposuit: in Pl. 120. *Quid est, nescias sinistra tua, quid facias dextera tua? id est, quando facis opus bonum, PROPTER VITAM ÆTERNAM FAC..... noli facere nisi PROPTER VITAM ÆTERNAM: ideo fac & securus facies: hoc enim mandavit dominus.* Et sermone 19. de verbis Apost. agens de æterna beatitudine ait: *Ecco PROPTER quam VISIONEM fac bonum. Ecco PROPTER quam VISIONEM noli facere malum.* Adfert etiam Vega aliique sequentia ex Augustino. *Non faciamus aliquid nisi spe celestium præmiorum, ipsa est enim aliitudo; non hic querere mercedem, sed sursum.* Sed loco ab illis indicato, nempe in Pl. 14. dicta verba minime reperiuntur.

118. S. Cyprianus in epist. ad Moysen & Maximum presbyteros: *Næ mors metuitur, sed optatur, quæ scilicet immortalitatis præmio vincitur, ut vitæ æternitate, qui viceris honoretur.* Qui nunc in vobis animus, quàm sublimis ac capax pectus, ubi talia ac tanta voluntur. *Ubi non nisi præcepta Dei & Christi PRÆMIA cogitantur, voluntas est illis tantum Dei; & in carne adhuc licet vobis possitis, vitam jam vivitur non præsentis sæculi, sed futuri.*

119. S. Gregorius. Homil. 13. in Euang. *Nec castitas ergo magna est sine bono opere, nec opus bonum est aliquod sine castitate. Sed si utrumque agitur, restat ut quisquis*

quisquis ille est SPE AD SUPERNAM PATRIAM tendat, iniquaquam se à viis suis pro mundi huius honestate contineat.

Et Hom. 29. in Ewang. Nicææ: *agamus: retribuimus nobis bona præsentia requiramus, nam pro labore patientia bona speranda sunt sequentis, vitæ... Tolerate ergo aduersarios vestros. ÆTERNA PRÆMIUM damus temporalibus: querite.*

Denique in 1. Reg. lib. 9. cap. 2. in illa verba *Servite Domino &c. Cui nimirum in veritate seruimus, quando eius præcepta pro sola SUPERNA RETRIBUTIONE persequimur.*

Richard. à S. Vi. lib. 4. de contempt. cap. 10. *Ad hoc infunditur. memoriam intelligentia, ut sciamus, quid inde fieri debemus: per studium querere, vel per desiderium suspirare.*

120. Prob. 4. ratione: licitum & bonum est, in suis actionibus spectare & intendere finem illarum à Deo propositum, & ad hunc media referre: Atqui finis fidei & operum bonorum est vita æterna: Ad Rom. 6. *Habitis fructum vestrum in sanctificationem, finem vero vitam æternam.* 1. Petri 1. *Respondentes finem fidei vestre salutem animarum.* Ergo &c.

Deinde bene facit, qui frequenter sacramenta, aliaque bona operæ exercet, ut in se augeat gratiam sanctificantem; ergo etiam qui ut assequatur gloriam æternam, quæ est gratia consummata & perfecta. Et hæc omnia certa sunt ex communi fidelium sensu.

Denique ex omnium DD. consensu datur virtus seu habitus Spei, distinctus, ab habitu seu virtute Charitatis, ergo etiã datur actus proprius Spei, qui non sit ex motivo Charitatis, & tamen bonus: nam virtutes distinctæ habent objecta formalia seu motiva distincta: objectum autem Charitatis formale est Deus, quia bonus in se; ergo Spei, quia bonus nobis.

Refert etiam Vega lib. 13. cap. 39. Bagaurium quemdam de Monte Falcone docuisse, nullum opus esse bonum, nisi fiat ex sincero amore, quicumque ex causa fiat, etiam spe mercedis æternæ: damnatumque fuisse cum suo errore à Sancto Archiepiscopo Terraconensi.

121. Assert. 2. Non peccat, sed bene & honestè agit, qui peccata detestatur ex metu gehennæ.

Prob. 1. ex Tridentino sess. 6. can. 8. *Si quis dixerit gehennæ metum, per quem ad misericordiam Dei de peccatis dulendo confugimus, vel à peccando abstinemus, peccatum esse: anathema sit.* Huc autem anathematissimum de metu plenè servili intelligi fatetur P. Lupus pag. 77. vide etiam ejusdem luss. cap. 6.

Et sess. 14. can. 5. *Si quis dixerit contritionem quæ paratur per desperationem peccatorum... ponderanda... amissionem æternæ beatitudinis, & æternæ damnationis incursum... non esse verum & utilem dolorem; anathema sit.* Omnis autem verus & utilis dolor de peccatis bonus est sine dubio & honestus. Unde Sylvius 2.2. q. 19. art. 4. ait; quod timor servilis bonus sit & ad salutem

perutilis; fide certum est, definitum in Tridentino.

122. Prob. 2. ex Patribus. Augustinus enarrat: in Ps. 127. *Timore facit, quicquid boni facit; non timore amittendi bonum illud, sed timore patiendi illud malum: non timet ne perdat amplexus pulcherrimi sponsi, sed timet ne mittatur in gehennam; BONUS EST ET ISTE TIMOR, UTILIS EST.*

Et sermone 18. de de' verbis Apost. *Es cum timore te correxeris, & utilis timore capris, non temporales cruciatus, sed æterni ignis supplicia &c. & paulo infra. Modis cum dicis mihi, gehennam timeo, ardere timeo, in æternum puniri timeo. Quid dicturus sum? male times? vane times? non audio; quandoquidem ipse Dominus ablato timore subiecit timorem, ubi dixit: Nolite timere eos qui corpus occidunt, sed eum time, qui habet potestatem & corpus & animam mittere in gehennam: ita dico vobis hunc time. Cum ergo Dominus timorem incusserit, & vehementer incusserit, & repetendo verbum comminationem ingeminaverit, dicturus ego sum, male times ista: non dicam. Plane time, NIHIL MELIUS TIMES, nihil est quod magis timere debeas.*

Huc etiam facit quod habet lib. 1. contra Advers. legis & Proph. cap. 16. *Si ergo salubriter non solum bonitatem, verum etiam severitatem Dei S. Scriptura commendat: quoniam & amatur Deus utiliter & timetur.*

123. S. Gregorius in 1. Reg. lib. 5. cap. 2. in illud, *servite domino & time, eum in veritate: ita loquitur: Hæc quidem via bona & recta est, quia ad æternam vitam tendit & velociter pervenit. Per timorem quippe Domini deviantur mala.*

Hinc etiam Roffensis, Eckius, alique, qui Lutherum sunt insectari, toti in eo fuerunt, ut ex Scripturis ac Patribus contra illum evincerent, timorem gehennæ bonum & laudabilem esse.

124. Prob. 3. quia ipsum naturæ lumen ostendit rationi maximè congruere, fugere summum malum, & quod non nisi per peccatum incurritur, & ad illud evadendum peccata vitare. Præterea cum actus, de quo agitur, positivè excludat omnem voluntatem peccandi, ut supra demonstratum est, non potest non esse bonus.

Nec refert quod ille actus pro fine habeat amorem sui & proprium commodum; neque enim omnis amor sui ipsius malus est, sed datur aliquis bonus & ordinatus, ad quem nos adhortatur Scriptura Eccl. 30. *Atserere animæ tuæ placens Deo, & continere, & congregare cor tuum in sanctitate ejus.*

125. Atque hæc adeo manifesta sunt, ut Jansenius Tom. 3. lib. 5. cap. 21. asserat à Tridentino definiri, & ab Augustino tradi, timorem gehennæ bonum esse. Idem fatetur P. Lupus pag. 73. Sed Tridentino non satisfaciunt, dum hunc actum specificè sumptum malum & vitiosum asserentes, bonum appellant non alio sensu, quàm quia actus quidam alius specie ab illo distinctus bonitatem habet,

CAPUT VII.

*An timor gehennæ, & dolor peccati inde conceptus,
sit supernaturalis.*

126. **L**utherus in disput. Lipsica & alibi passim negat, timorem servilem esse ex gratia, adeoque & esse actum supernaturalem, ut patebit ex afferendis infra.

Idem negat Jansenius, qui Tom. 3. lib. 5. cap. 23. ait: Hinc fit, ut quisquis ex divina legis pœnas comminantis timore præcepta justitiæ facit, non ex gratia Dei, sed ex propriis viribus ea implere velle censetur. Nempe quia quatenus lex & pœnarum comminatio sit à Deo, non aliter tamen ea juvant, nisi cognitionem afferendo, quæ percepta si timore percellatur, propria voluntatis viribus facit, quidquid facit. Et cap. 32. Ex istis patet, quæmodi sit animus & voluntas eorum, qui pœnas timeant, & ex isto timore justitiæ legis facere, & injustitias suas dolere, & abjicere meditantur. Patet etiam cujusmodi esse possit ista justitia... nempe justitia sua, id est, propria, non Dei; justitia ex lege, non ex gratia. Admittit tamen Jansenius cap. 23. citato timorem hoc sensu esse supernaturalem quod fidem supernaturalem supponat. Timorem præcedit fides, quæ cum perspicit Dei donum sit, sine dubio eatenus etiam timor pœnarum, quas sola fides apprehendit formidabiles, divine donationi deputandus est.

127. Consentit P. Lupus, qui pag. 74. de timore gehennæ ita pronuntiat: Humanus & carnalis est, non divinus & spiritualis, nec meritorius regni... Hinc item laudatus timor, licet infusus ac supernaturalem fidei actum frequenter præsupponat, non est tamen ipse actus infusus aut supernaturalis. Et pag. 75. Addo etiam illum, qui fidem infusam præsupponit, non esse infusum aut supernaturalem. Quod enim non ex speciali Dei per JESUM Christum dono, sed ex proprio sui amore, adeoque ex puro libero arbitrio nascitur, est supra osensum ex S. Augustino, & res ipsa clamat. Et post pauca: Licet porro timor ille non sit infusus, est tamen à Deo infusus actus; quarum causalitatum divinarum differentiam exponere, non spectat ad questionem præsentem.

128. Assert. t. Actus spei est supernaturalis. Ita passim omnes DD.

Prob. 1. ex Tridentino, quod postquam sess. 6. c. 5. declaraverat exordium justificationis in adultis sumendum esse à Dei per JESUM Christum præveniente gratia, cui gratiæ consentiendo & cooperando peccatores ad justificationem disponuntur, deinde cap. 6. enumerans dispositiones ad justificationem, inter illas collocat Spem: *Disponuntur autem ad justificationem, dum excitati divina gratia & adjuti... in spem eriguntur.* Ex quibus sic licet argumentari: disponuntur ad justificationem cooperando gratiæ, dispositio

una inter cæteras est Spes, ergo hæc est cooperatio gratiæ, adeoque ex gratia. Idem indicat dum cap. illo 6. ante enumerationem dispositionum præmittit disponi; dum excitat divinam gratiæ & adiuti. Porro Spes, de qua hic agit Tridentinum, non est illa, quam volunt adversarii esse ex motivo Charitatis, cum post Spem enumeratam subjungat synodus illam dispositionem, quæ Deum tamquam omnis iustitiæ fontem diligere incipiunt, id est, ut explicant adversarii, Charitatem.

Et eadem sess. can. 3. *Si quis dixerit sine præveniente Spiritus S. inspiratione atque ejus adiutorio hominem credere, sperare, diligere aut penitere posse, seu operari, ut ei justificationis gratia conferatur; Anathema, sit.* Quo loco manifestè supponit Synodus, tam actum Spei, quam Fidei aut Dilectionis, esse ex præveniente Spiritus S. inspiratione, id est supernaturalem.

129. Prob. 2. ex PP. S. Ambros. in epist. ad Rom. cap. 5. *Pec enim copiosæ merces vestra in cælo. Contemnere enim præsentia, & quæ oblectamento sunt, & in pressura non cedere spei futurorum, MAGNI MERITI EST APUD DEUM.* Si operari spe futurorum sit magni meriti, ergo actus Spei est supernaturalis.

S. Gregorius in 1. Regum lib. 5. cap. 1. *Sed quia à Deo tentari permittitur, adventus ejus gratiæ ab utroque malo relevatur, dum contra tentationes lucem accipit, & per calorem advenientis spiritus; abicit frigus mentis: Incipit enim videre cælestia, qui levare mentem à carnalibus non valbat, & quæ amanter aspicit, ardentius cupit.* Ecce adventus gratiæ & calor spiritus est videre cælestia, eaque ardentius cupere. Idem indicat ibidem cap. 2. *Deo nimirum in veritate servimus, quando ejus præcepta pro sola superna retributione perficimus.* Per actum quippe naturalem non servimus Deo in veritate.

S. Cyprianus libro de exhortat. Martyrii cap. ult. *Hæc (nempe præmia cælestia) oportet mente contemplari. Si talis persecutionis dies Christi militem invenit, vinci non potest VIRTUS AD PRÆMIUM PROMPTA.*

130. Prob. 3. Quia datur habitus Spei supernaturalis distinctus ab habitu Charitatis; Ille autem esset frustraneus, nisi actus proprius Spei esset supernaturalis. Quo etiam argumento contra Lutherum utitur Rosenfeld ad art. 6.

Afferit 2. Timor, poenatum & detestatio peccati inde concepta est supernaturalis. In conclusione consentit ipse Estius in 4. dist. 16. §. 9. licet cam statuatur insufficiens pro susceptione Sacramenti.

131. Prob. 1. ex Tridentino: nam cap. 6. inter dispositiones, ad quas excitat & adjuvat divina gratia, recenset divina iustitia timorem, quo milititer concuruntur. Quo loco agi de timore sceluso motivo charitatis patet ex dictis num. 128.

Et sess. 14. cap. 4. *Illam vero contritionem imperfectam, quoniam ex gehennæ & pa-*

et penarum metu concipitur, si voluntatem peccandi excludat cum spe veniæ; declarat, non solum non facere hominem hypocrisiam et magis peccatorem: verum etiam DOMINUM DEI esse et SPIRITVS S. IMPULSUM, non adhuc quidem inhabitantis, sed tantum mouentis, quo penitens aduersus viam sibi ad iustitiam parat. Non poterat clarius exprimere talis actus supernaturalitatem.

Denique ejusdem sess. can. 5. definit illum actum preparare ad gratiam, nullus autem actus preparat ad gratiam nisi sit ex gratia seu supernaturalis, ut patet ex Arausiano, Tridentino &c.

132. Prob. 2. ex PP. Ambrosius in Pl. 1. 18. ferm. 38. in illud: Particeps ego sum timentium te, ait. Non dixit imitantium, sed timentium. Initium sapientie timor Domini.... timere VIRTUTIS est, quia scriptum est: Timere Dominum sancti ejus. Sed quibus TIMOR iste non sanctus videatur? Et libro de Jacob & vita beata: Visque timor Dei de numero VIRTUTUM est, quia, initium sapientie timor Domini, per quem accipitur pax, forma, doctrina.

S. Basilii in Psalmorum 33. timorem judicii & gehennæ salutarem ac divinum vocat. S. Prosper libro 2. de vocat. gent. cap. 9. Gratia quidem Dei in omnibus iustificacionibus principaliter, præminet suadendo, monendo exemplis, TERRENDO PERICULIS.... Sed etiam voluntas hominis subtingitur, quæ ad hoc prædictis est excitata præsidij, ut DIVINO in se cooperetur OPERI et incipiat exercere AD MERITUM, quod SUPerno SEMINE concepit ad studium. Et rursum: Principium sapientie timor Domini.... Beatus qui donatum est habere timorem Dei. Quid enim tam BEATIFICUM, quam hic timor, qui genitor eruditiorque sapientie est? in cujus ntique devotione devota est voluntas, quæ auctore GRATIÆ eodem proficit timore, quo caput.

133. S. Gregorius in 1. Reg. lib. 2. cap. 1. explicans illud: Dominus mortificat et vivificat, dum ad inferos et reducit: ita scribit: Deo ad inferos ducere, est peccatorum corda eternorum cruciatuum consideratione terrene. Eiquoque ab inferis reducere, est terrens penitentium atque commissæ lugentium mentes spe vite indefinitæ attollere. Tunc quippe peccare desinimus, cum SUPERNA GRATIA mollis cordibus futura tormenta formidamus, et ab inferis reducimur, cum interno vivificati solatio ad spem veniæ de penitentia lamento respiramus. Apud itaque Dominus ducere ad inferos et reducere dicitur: quia humana duritia in hominis solus prædicatione nec terrore contuitur, nec amore subleatur. Nam si doctorum esset mortificare etc.... Dominus itaque ducit ad inferos et reducit, quia illa futura possunt tormenta metueret, illa superna gaudia diligere, in quibus per eas voces, quas foris homo loquitur, INTUS DEI PIETAS OPERATUR.

Et lib. 27. Moral. cap. 10. Peccator dum sola quæ terrena sunt cogitat, si repente DIVINÆ GRATIÆ aspiratione tangatur, hoc ante omnia intelligit, quod in ætæta quæ agit districti eterni iudicii ammonitione premittitur... Sonus ex ore Dei est vis timoris de SUPERNA irruens. ASPIRATIONE.... Quos spiritus S. replet, prius eos de

terrena a'tione terrificat, & postmodum spe celestium consolatur. Vide totum hoc caput. S. Hieronymus in Psalm. 111. Qui gehennam timeat, & propterea non fornicatur, non habet tantam mercedem, quantum ille, qui propter dilectionem Dei facit. Ergo aliquam mercedem, adeoque actus est supernaturalis.

134. Prob. 3. ex communi DD. consensu & iis qui Lutherum impugnant. Eckius lib. 1. de penit. cap. 5. Adfert has Lutheri ad objecta de filio prodigo, aliaque responsiones: Hanc conversionem sui in seipsum, non habuit ex timore pœnae, sed à trahente intus patre, & dilectionem paterna domus inspirante.... idcirco necessaria illi fuit alia affectio, scilicet amor boni. Sic ad Joannem Bapt. : respondit, quod aliud est docere penitentiam, aliud incipere. Predicator monet, terret, allucit, sed nihil sequitur nisi gratia moverit voluntatem. Et postea ait : Lex docet sapientia iusta, & bona, sed sola gratia incipit, facit, & perficit. Ecce volebat Lutherus penitentiam debere esse ex gratia seu supernaturalem, negabat autem timorem esse ex gratia. Quam illius sententiam rejicit Eckius tamquam veritati Catholicæ repugnantem. Subdit enim : Hæ sunt tortuosi colubri evasiones, sed ut invicta veritas Catholica triumphet, pellem leoninam asino detrahimus. Et in fine ejusdem capituli : Ab initio resistimus hæreticis, & dicimus, quia timor, etiam servilis, sit donum Spiritus Sancti.... Fallitur Ludder, quod nesciat veritas Spiritus S. gratias distinguere. Et ibidem cap. 6. quantum autem insensu Ludder erratum suum roborare nitatur de traditione patris, erudito est obvium : fateor enim voluntatem nostram non posse in bonum motum, nisi præcurrente motione tractu Dei Patris, quia non sumus sufficientes &c. ut Paulus nos docuit. Et ideo rectè Augustinus inquit, initium salutis nostræ Deo inspirante habemus ; sed non quæcumque motio paterna est per Amorem iustitiæ, cum omnes moveat sufficienter.... Fatemur ergo traditionem Patris præcedere initium penitentiae in revertente.

135. Similiter alterum Lutheri flagellum Episcopus Roffensis ad art. 6. ita respondet Luthero: At is, de quo iam differimus, ex animo facit, quærens non adhuc propter Deum. Quod autem subdit, animum autem talem & cor non dat natura, nec collectio peccatorum, sed sola charitas spiritus. Huic nos respondemus, quod si natura dare non potest, potest tamen fides informis, quæ ut infra charitatem ita supra naturam est, talem animum & cor exhibere.... neque negaverim, hunc doloris motum à spiritu concitari. Et rursus infra adfert verba Lutheri contra Articulum 6. Leonis X. Quod si dixerint se loqui de contritione in charitate facta, jam articulus nihil ad me, non enim nunquam sic docui : In eo quia ut mentem damnant, de contritione naturali loqui eos oportet. Cui sic respondet Roffensis: Non usque adeo rudis es Lutheri, ut ignores, quid disputatores de contritione sentiant.... Fides contritionem charitate formatam esse. Attritionem verò, quæ discussionem, & collectionem, & detestationem peccatorum complectitur, penitus informem esse. Verumtamen eandem opinantur (nempe Catholici cum Luthero disputantes) ex fide simul & alijs Dei donis gratuitis proficisci, quæ supra naturam sunt, sed citra charitatem.

Nec est dubium, quin tam Fides, quam Spes, ac cetera id genus dona sint in multis peccatoribus aliisque Charitate.... Nos Fidem opinamur & Spem posse peccatorem ad gratiam preparare. Et infra col. 409. Alioqui dona ista, nempe Fides & Spei sunt in cassum donata peccatoribus.

136. Ex quibus sic licet argumentari. Lutherus negavit timorem gehennæ, & ex illo conceptum peccati dolorem esse supernaturalem. Id tamquam errorem ex inscitia ortum, & tamquam hæresim rejecerunt Catholici contra illum disputantes. Tridentinum vero definit illum dolorem cum spe veniæ conjunctum; non solum non facere hominem hypocritam & magis peccatorem; verum etiam DONVM DEI esse & SPIRITVS SANCTI IMPULSUM. Prima hujus dicti pars, quod non faciat hypocritam & magis peccatorem, manifestè petit Lutherum: Unde nemo dubitabit, quin, dum in secunda parte dicit donum Dei esse & Spiritus Sancti impulsus, id definiat, quod constantissime negavit Lutherus, & contra eum affirmabant Catholici, nempe illum dolorem ex metu gehennæ esse ex gratia, sive supernaturalem.

CAPUT VIII.

*An attritio concepta ex metu gehennæ in Sacramento
Pœnitentiæ justificet.*

HÆc est quæstio principalis, ad quam omnia quæ hæcenus diximus diriguntur. An nimirum dolor de peccatis præteritis, & propositum de cætero non peccandi, concepta ex metu gehennæ, unà cum spe veniæ, sit sufficiens dispositio, ut peccator accedente Sacramento pœnitentiæ justificetur.

Afferit. Sufficit hæc attritio ad justificationem accedente Sacramento Pœnitentiæ.

S. I.

Primum Argumentum.

137. **P**Rob. 1. ex Trident. sess. 14. cap. 4. illam verò contritionem imperfectam, quæ attritio dicitur, quoniam vel ex turpitudinis peccati considerat one, vel ex gehennæ & poenarum metu communiter concipitur, si voluntatem peccandi excludat, cum spe veniæ; declarat non solum non facere hominem hypocritam, & magis peccatorem, verum etiam Dei donum esse & Spiritus Sancti impulsus, non adhuc quidem inhabitantis, sed tantum morientis, quo pœnitens adjutus, viam sibi ad justitiam parat. Et quâvis sine Sacramento pœnitentiæ per se ad justificationem perducere peccatorem nequeat, tamen cum ad Dei gratiam in Sacramento pœni-

pœnitentia impetrandam disponit; Præmiteræ autem S. Synodus initio hujus sessionis: Licet in decreta de justificatione (nempe. sess. 6. præcipuè cap. 14.) nullus fuerit de Pœnitentiæ Sacramento propter locorum cognitionem necessariâ quâdam ratione sermo interpositus: tanta nihilominus circa illud nostrâ hâc ætate diversorum errorum est multitudo, ut non parum publicæ utilitatis retulerit, de eo EXACTIOREM ET PLENIOREM DEFINITIONEM tradidisse; in qua demonstratis & convulsis Spiritus Sancti profecto universis erroribus, Catholicæ veritatis præputa & illustra flect.

138. Ex quibus hoc formatum argumentum. Tridentinum. hâc sess. intendit tradere exactiorem & pleniorém doctrinam & definitionem, sic ut Catholica veritas perspicua fiat & illustra: atqui dum agit de requisita ad justificationem dispositione pœnitentis (utique proxima & sufficienti, ut admittunt P. Lupus & P. Farvaques) non meminit alterius contritionis, quàm imperfectæ, quæ ex turpitudinis peccati consideratione, vel ex gehennæ & pœnarum metu communiter concepitur, nullâ factâ mentione Dei propter se dilecti; ergo talis dolor sufficit in Sacramento pœnitentiæ. Alioquin nec exactam nec perspicuam traderet doctrinam, sed talem quæ multos nata esset in errorem periculosum inducere.

139. Dices. 1. Id erat per se manifestum; ita P. Lupus pag. 11, & rursus pag. 16. Res ipsa clamat, res lucida est, in omni pœnitentia debere reperiri amorem Dei super omnia, ac proinde necesse non fuit id addere.

Resp. hæc gratis assumi: quomodo enim id poterat supponi tamquam manifestum à Tridentino; cum Lutherus contra Catholicos urgeret, eos, qui non dolent ex amore justitiæ, non esse dispositos ad absolutionem; & contra vero Catholici, & in primis Rossensis contenderet, non requiri amorem Dei in Sacramento, eamque assereret Catholicorum esse doctrinam, ut infra videbimus. num. 168. Cum Tapperus, qui scripsit eodem tempore quo celebrabatur hæc sessio, vel saltem statim post, asserat ad articulum 4. esse probabilem Doctorum sententiam, nempe anteriorem, quod attritio ex metu gehennæ etiâ cognita sufficiat cum Sacramento. Cum plurimi ante Tridentinum asseruerint, sufficere attritionem si putetur contritio: alii aliter id explicuerint sine amore. Qua ergo veritatis specie dici potest, hæc fuisse adeo evidens, ut Synodus volens tradere perspicuam, pleniorém, & exactiorem de hoc Sacramento doctrinam, duxerit illud de amore Dei, tamquam per se notum, prætereundum? Profecto si Synodus credidit neminem de eo dubitare aut dubitaturum, deceptam plurimum fuisse ipsa docuit experientia; eum plerique post Tridentinum docuerint sufficere attritionem cognitam sine Dei amore, idque ex ipsius synodi verbis, atque hinc

140. Probatur aliter eadem conclusio. Si verum non est, quod attritio
ex me-

ex metu gehennæ, cognita ut talis, sufficiat cum Sacramento, sententia id asserens erat error è præcipuis vitiis & maxime perniciosus salutis animarum; ergo, cum Synodus, ut ipsa loquitur initio hujus sessionis, velit tradere pleniorẽ & exactiorẽ de hoc Sacramento definitionẽ, in qua *demonstratis & conuulsis Spiritus Sancti præsidio uniuersis erroribus* (qui illa ætate erant, ut præmittitur ibidem) *Catholica veritas perspicua & illustis fieret.* Si hanc sententiam credebat falsam, debebat hunc tam perniciosum inter cæteros errorẽ demonstrare & conuellere. Quæro ab aduersariis, quò hujus sessionis capite aut canone hunc errorem demonstraret aut conuelleret nullibi profecto; imo è contra hanc sententiam stabilit, ut in priori probatione ostendimus.

141. Dices 2, cum eod, pag, 84. id dixerat Tridentinum sess. 6.

Resp. ad ea quæ adferuntur ex sess. 6. dicemus infra num, 175. Hic addo, multa quæ illa sess. dixerat Synodus, repetit sess. 14, adeoque ut hic tradat perspicuam & plenam doctrinam, debuerat etiam meminisse hujus præcipui motivi, nempe amoris, si illud credebat necessarium.

142. Dices 3, Imo in hac ipsa sess. 14, requirit amorem, Probatur assumptum.

Primò, quia requirit ut actus preparans ad justificationem cum Sacramento, excludat voluntatem peccandi, quod fieri nequit sine amore Dei amicitie. Ita P. Lupus & P. Farvacques.

Secundò idem lucet ex his verbis sess. 14, cap. 4. *Continet cessationem à peccatis, & eorum detestationem.* Utiq; detestationem ortam ex justitiæ dilectione. Ita loquitur P. Lupus pag. 10. Adde, quòd qui peccata detestatur ex metu gehennæ, non detestetur peccata, sed gehennam.

Tertiò Tridentinum ibidem declarat attritionem disponere ad gratiam, utiq; proximè & sufficienter, proximam autem & sufficientem etiam cum Sacramento dispositionem debere esse charitatem definit alibi Tridentinum; idem pag. ead.

Quartò denique sess. 14, cap. 4, definit contritionem generatim, quòd *fit animi dolor ac detestatio de peccato commisso, cum proposito non peccandi de cætero.* Quæ omnia certum est non posse fieri sine vera dilectione, inquit P. Lupus pag. 84. & alibi. Atqui imperfecta ex metu concepta contritio, est germana species sumptæ generatim, & superius per Synodum definitæ contritionis, pag. 83. ergo palam prædicat Tridentina Synodus, esse debere Dei ac justitiæ dilectionem. Ita pag. 15.

Resp. negando assumpt: Ad 1. probationem, dico evidentè, ni fallor, demonstratum est cap. 5. sine Dei amore excludi posse omnem voluntatem peccandi, idque tum ex ratione, tum ex Patribus; adeoque, ut contrarium tam confidenter pronuntietur, prius conuellenda erunt quæ ibi

diximus, & solida ratio adferenda, quod numquam fiet. Neque mihi persuadere possum id umquam negaturos fuisse adversarios, nisi vidissent id necessarium esse ad suam de attritione sententiam tuendam.

Ad 2. probat: Resp. P. Lupum sine ullo fundamento, & merè pro libitu, verbis Tridentini hanc glossam; *Vtique detestationem ortam ex iustitia dilectione*, addidisse.

143. Quod additur cum qui detestatur peccatum ex metu gehennæ, non detestari peccatum, sed gehennam; id, inquam, vel evidenter falsum est, vel nihil omnino ad rem facit. Si enim sensus sit, quòd ille non detestetur verè peccatum, clarissimæ repugnat veritati. Qui enim fugit leonem aut lupum, ne ab illo lædatur aut laceretur, verè fugit ista animalia, licet id ultimatè faciat ex amore sui, ne sibi malum accersat. Qui sumit potionem amaram, aut patitur se uri & secari, verè illa vult, licet ultimatè referat ad sanitatem aut vitam servandam. Si verò sensus sit, quòd ille actus potius sumat suam specificationem à fine; quid hoc, quæso, ad rem pertinet? Nam eodem modo detestatio peccatorum ex amore Dei, ab hoc potius sumet suam specificationem. Quare dico, si detestari peccata ex timore gehennæ, adeoque ex amore sui, sit detestari gehennam & se amare, non sit autem detestari peccata: similiter detestari peccata ex amore Dei, erit amare Deum, non autem peccata detestari. Et è contra, si detestatio peccatorum ex amore Dei, sit vera peccatorum detestatio; etiam vera erit eorundem detestatio, ea detestari ex metu gehennæ sive ex amore sui. Unde miror hoc nobis opponi potuisse.

Ad 3. probat. Resp. admittendo quod Synodus agat de dispositione proxima & sufficienti: nego autem hanc debere esse ex motivo charitatis. Porro quid alibi definiat Tridentinum, videbimus infra: cap. 9. hinc solum agitur, quid dicat Synodus sess. 14. in qua ex processu tractat de Sacramento Pœnitentiæ, & dispositione ad illud requisita, & ubi promittit perspicuam, exactiorem & plenioram hujus rei definitionem; dicimusque evidens esse, illà sess. nec mentionem fieri amoris Dei, requisiti ad attritionem seu contritionem imperfectam.

Ad 4. probat: Admitto Synodum ibi definire contritionem generatim sumptam, hujusque speciem esse attritionem; sed nego consequentiam, & dico; cum evidens sit posse peccatorem de peccatis dolere, & proponere non peccare de cætero ex solo metu sine Dei dilectione, in illa definitione Contritionis in genere, nihil prorsus dici ex quo colligatur motivum Dei propter se dilecti in omni contritione debere involvi. Et hinc

144. Probatur rursus nostra Conclusio: Tridentinum hæc sess. ubi spondet perspicuam & exactam definitionem eorum, quæ ad Sacramentum Pœnitentiæ pertinent, non aliam tradit definitionem contritionis genera-

generatim sumptæ quàm hanc: *Contritio animi dolor ac detestatio est de peccato commissio, cum proposito non peccandi de cetero*. Nemo negabit, quin hæc definitio sit exacta & plena. Ergo nihil in ea omissum est essenziale, multò minus aliquid primariò essenziale. In illa autem definitione nec explicitè ponitur motivum charitatis, neque hoc implicitè continent alia ejusdem definitionis verba. Ergo omnino alienum est à mente Tridentini, quod asserit P. Lupus pag. 83, 84. & alibi, omni nempe contritioni essenziale esse elici ex motivo charitatis, aliàs esse contritionis fucum &c. Synodus igitur, quando definit contritionem in genere, non meminit amoris Dei; uti nec ejusdem meminit, dum agit de contritione imperfecta, seu attritione; ergo censet attritioni non esse essentialem amorem Dei, ideoque nec contritioni in genere illum amorem attribuit, licet altera contritionis species amorem necessariò involvat. Adde, si omnis contritio debeat essentialiter habere motivum amoris, cur Synodus agens de illa, quæ ante sacramenti susceptionem justificat, dixit *contritionem amore perfectam*? nam in sententia adversariorum sufficisset dicere, contritionem perfectam non facta mentione amoris. Hæc omnia convincunt, à Tridentino tradi nostram sententiam.

§. 2.

Alia evasio P. Lupi.

145. **V**ENIO nunc ad novam explicationem P. Lupi: novam voco quia neminem reperio, qui eam saltem clarè & expressè tradiderit.

Hunc Tridentini locum: *Illam contritionem imperfectam, quoniam ex gehennæ & poenarum metu communiter concipitur*: vult P. Lupus intelligi minimè debere de illo actu, quo quis ex puro metu gehennæ tamquam motivo peccata detestatur, sed de alio actu planè distincto. Quod ut rectè intelligatur, recolendum est, actum timoris esse initium sapientiæ seu charitatis, sic ut actus charitatis introducatur per timorem, sicut linum per setam, uti explicat Augustinus. Quando ergo in homine timor introduxit actum charitatis, jam duo sunt actus sive simul, sive successivè; unus est purè timoris, alter vero, utpote charitatis, pro motivo habet Deum propter se dilectum; hunc autem posteriorem actum, quia suo modo procedit à timore vocat P. Lupus conceptum ex timore, timorem vero vocat concipientem. Hinc dum Synodus dicit: *Contritionem imperfectam, quoniam ex gehennæ metu concipitur*. Explicat ipse de secundo illo actu, qui habet motivum charitatis, qui quia per actum timoris introductus est, dicit esse illum, quem

Synodus ait ex timore concipi. Patent hæc ex P. Lupo pag. 76. in fine capit. 15. ubi descriptis illis Synodi verbis subiungit: *Distinguit duplicem prænitentis animi motum: gehennæ servilem, ex quo imperfecta prænitentium contritio communiter concipitur, metum, & ex eo conceptam attritionem. Hanc definit esse motum utilem, sed & hæc non perfectam, veram tamen contritionem, Spiritus Sancti donum & impulsus, actum non incussum, sed insussum, imperandæ peccatorum remissioni præparationem cum Sacramento omnino sufficientem.* Ea rursus pag. 79. in homine per servilem metum ad correctionem & contritionem perducto dissingenda sunt duo tempora: primum, dum solo timore movetur secundum, dum timor iam concepti sapientiam, ac peperit charitatem. Priori tempore scilicet hominem esse involutum ac involuntarium &c. Posteriori autem tempore est plene liber ac voluntarius. Tunc enim introducta est timorem adjuvans charitas, & expulsa timori repugnans cupiditas, omnisque prior necessitas versa est in virtutem & liberam electionem. Idem sæpè repetit; & tandem cap. 18. ne quid ad plenam huius speculationis intelligentiam & complementum desiderari possit, quaerit quomodo contritio imperfecta, illa nimirum, quæ fertur motivo charitatis, concipiatur seu nascatur ex actu, qui sistit in timore servili; an per imperium, an per emanationem, an aliter? Tum resolvit, contritionem imperfectam concipi ac procedere ex servili pœnarum metu per conversionem, seu tamquam ex termino à quo conversionis. Sicut, inquit, ligni forma in formam ignis transmutatur, adeoque hæc ex illa concipitur & procedit.... Dixerit id tradit Augustinus: *Quem timor coëgit ad charitatem, ejus perfecta charitas foras misit timorem.* Ille introducentis ad introducti ingressum exitus & cessio, est evidens indicium conversionis, seu conceptionis per conversionem.

146. Atque ex his patet quid sibi velit P. Lupus dum pag. 82. ait, *hinc conceptam ex metu servili contritionem esse legitimam, sanctam, ac veram, non est ambigendum.* Ante Lutheri tempora negarunt id cum Donatistis Pelagianis &c. Intelligit nimirum de actu, non qui sit ex motivo metus, sed de alio, qui pro motivo habeat Deum propter se dilectum.

Hæc explicatio verborum Tridentini licet per se appareat ad evadendam vim Tridentini gratis excogitata, adeoque refutatione non egeat, quidam tamen ad eam plenè confutandam adferemus.

147. Ac 1. quidem, quoties agitur de dolore concepto ex hoc aut illo, quod capax sit esse illius doloris motivum, homines intelligunt, dolorem ex illo tamquam motivo concipi, non autem de alio quopiam actu distincto. Sic dum pœnitens dicit se dolere ex amore Dei, nemo intelligit illud ex transitive de ulteriori actu procedente ex amore. Quæro an, quando P. Lupus pag. 85. dicit contritionem perfectam procedere ex charitate perfecta, an, inquam, non tamquam cavillatorem reputaret eum, qui diceret P. Lupum non contentum charitate perfecta; alium insuper ad justifica-

fectionem requirere actum distinctum, qui ex illo actu perfectæ charitatis procedat tamquam à termino conversionis? Quæro an, quando pag. 25. dicit desiderium Christi & vitæ æternæ aliquid vitii habere, quia oritur ex proprio suo amore; an, inquam, dicat, desiderium Christi & futuræ vitæ ex motiva charitatis, qui sit actus ortus ex priori, esse vitiosum? Quæro denique an, quando paginâ 68. arguit timorem imperfectionis, quia oritur ex amore sui, & dum ibidem dicit eum qui ex timore facit, facere voluntate invita & averfa, sic ut cor ejus non sit rectum cum Deo &c. quæro, inquam, an hæc rectè possint explicari de actu charitatis, qui ex timore seu amore sui ortum ducit? Incongruè igitur vocibus Tridentini eam tribuit explicationem, quâ, si eædem voces apud ipsum reperiuntur intelligerentur, diceret, & merito, verba sua ineptissimâ interpretatione contorqueri.

148. Secundò Tridentinum eodem c. 6. post assignatum actum contritionis per se justificantis, eumque per rationem sibi propriam & specificam descriptum; progreditur ad alteram contritionis speciem, quæ se sola non justificat, eamque vocat imperfectam contritionem seu attritionem. Quæro an Synodus describat attritionem per rationem sibi propriam & specificam, an vero per id, quod æquè competit contritioni perfectæ? Posterius dici non potest sine injuria illata tot vitis doctissimis & Spiritu S. afflatis: quod neipse volentes tradere species contritionis generatim superius definitæ, unam speciem descripserint per aliquid, quod contritioni generatim sumptæ competit, id est non magis attritioni, quàm contritioni perfectæ, adeoque nullo modo affecti sint scopum, quem initio lèssionis sibi præfixerant. Neque etiam juxta adversarios dici potest, quod attritioni attribuerint rationem ejus propriam, & distinctivam ab actu contritionis perfectæ. Nam ut asserit auctor dissertationis dogmaticæ pag. 86. & alibi, etiam contritio perfecta regulariter inchoari debet à timore; &, ut ait auctor Quodlibeticæ pag. 13. *salsum est, quod impius possit justificari absque ulla prævio timore*. Ergo concipi ex timore, prout id explicat P. Lupus, commune est tam contritioni perfectæ quàm imperfectæ: ergo &c.

149. Tertiò quando Synodus dicit: *Contritionem verò imperfectam, quoniam ex gehennæ & poenarum metu concipitur*: manifestum est ex particula quoniam quod imperfectiorem attritionis ex eo perat, quod concipiatur ex metu gehennæ. Ergo vel Synodus eam imperfectiorem petit ex eo, quod attritio listat in metu gehennæ tamquam motivo ultimato; vel ex eo quod poenam aversetur referendo ulterius in Deum. Si primum, habemus quod intendimus: si secundum, falsum est, quod inde actus sit imperfectus: nemo enim dubitat, quin per actum perfectæ contritionis possit quis simul detestari gehennam v. g. sub ea ratione, qua est impedimentum amandi Deum.

Et hoc argumentum vim suam habet etiam contra illos, qui, licet non recurrant ad alium actum à timore distinctum, volunt nihilominus hic agi de actu, qui ultimare referatur in Deum propter se dilectum. Adde, cum ante Tridentinum, ut vidimus num. 10. passim vox attritio, sumeretur pro dolore, qui pro motivo habet poenas, si per attritionem ex metu intellexisset, non illum actum, cujus motivum sit metus, sed aliquem ulterio-rem, quid hoc fuisset aliud, quam dare occasionem errandi in re tanta, à qua pendet animæ salus.

150. Quartò, si illud ex sumatur transitive, sic ut designet actum ulterio-rem, qui ex actu timoris procedit; quomodo potuit Synodus de illo generaliter affirmare, quod sine Sacramento poenitentiae per se ad justificationem perducere peccatorem nequeat? Quandoquidem contritio perfecta tali quoque ratione procedat ex timore, illa tamen sine Sacramento poenitentiae iustificet.

151. Quintò denique, si verba Lutheri ex sermone de poenitentia con-feras cum iis, quæ habet Tridentinum sess. 14. cap. 4. & can. 5. quæ vide supra cap. 1. manifestissimum fiet, illam ipsam attritionem à Synodo probari quam impugnat & reprobat Lutherus. Atqui evidens etiam est Lutherum impugnasse attritionem, quæ est ex metu gehennæ tanquam motivo unico & ultimo; illam verò, quæ est ex amore iustitiæ, approbasse tanquam veram poenitentiam, quæ reddat dignos & dispositos ad absolutio-nem. Ergo Tridentinum agit de attritione, quæ pro motivo habet aut so-las poenas, aut turpitudinem peccati. Major hujus argumenti negari ne-quit, eamque admittit P. Lupus pag. 78. 80. 83. 88. Minor probatione non eget, nisi apud eos, qui vel Lutheri mentem in hac parte non indagarunt, vel non intellexerunt.

152. Negat nihilominus minorem P. Lupus, qui, cum distinguat duos actus, unum timoris, alterum amoris Dei, ut vidimus num. 145. vult con-tra hunc secundum actum, qui charitatis est, effutisse Lutherum quidquid effutit. pag. 73. de Luthero dicit: *non solum gehennæ metum, sed & conceptam ex illo attritionem blasphemasse peccatum*: & pag. 77. *Hinc gravissimi DD. existimantes Synodum non de purè servili, sed de finire de metu iniiali, quem præsertim infamatas Lutherus: nec loquuntur sine fundamento.... Purum ac plenum, cui adhuc annexa servilitas, servilem metum peccati quidem accusavit de ipso tamen vix expresse dispu-tavit Lutherus, ideoque & sancta Synodus videtur de ipso nihil definitivè.* Denique pag. 80. relatis verbis Tridentini ex sess. 14. cap. 4. & can. 5. quod attritio non faciat hypocrisiam &c. *asserit illa tendere in Lutherum, in serm. de poenit. & in apologia, errores istos, non solum de servili timore, aut ejus servilitate, sed & de concepta per ipsum contritione garrientem.*

153. Posito autem hoc saltu ab actu timoris, ad actum amoris à timo-ri pro-

re procedentem, jucundum est audire, quàm acriter P. Lupus in Lutherum invehatur & quasi de illo triumphet pag. 78. in fine: *Conceptam ex servili metu contritionem cum ipso metu, ac ejus servilitate, confudit homo cæcus & dolosus, ideoque & hujus & istius vitia in illam nequiter & Donatistice transcribit.* Et pag. 80. *Lutherus & Donatista confuderunt hæc duo tempora. Hinc purum evangelicæ Prædicationis vinum misceverunt & inquinaverunt sordida aqua suarum fabularum.* Denique pag. 81. *Conspicientem metum & conceptam attritionem non distinxit cæcus & dolosus Lutherus, atque hinc tam grossè lapsus est.*

154. Verùm investivæ hæ, utpote non vero nixæ fundamento Lutherum non feriunt: nam 1. quod dicit pagina 77. Lutherum præsertim infamasse metum initialem, de metu vero servili vix expressè disputasse, ab omni prorsus alienum est veritate: nam de purè servili agit in sermone de pœnitentia, quo loco signanter etiam asserit, contritionem, quæ paratur per contemplationem speciosissimæ virtutis, facere verè pœnitentem & dignum absolutione. De metu servili, & non alio agit ad art. 6. à Leone X. damnatum; de eodem denique, qui nullam habet adjunctam charitatem fusissimè disputavit in illa disput. Lipsica, ut patet ex ejus verbis, quorum aliqua retulimus num. 106. De eodem quoque timore disputant contra Lutherum Rossensis & Eckius: quæ omnia tam certa sunt, ut negari nequeant ab eo, qui illos legerit.

Secundò falsum est quod dicit pag. 80. Lutherum in sermone de pœnit. garrivisse contritionem, quæ esset formata charitate, & concepta ex actu metus præcedenti, facere hominem hypocritam & magis peccatorem. Idque palpabitur, si sermo ille tantummodo legatur, si ea quæ habet ad art. 6. si disputatio Lipsica de hoc puncto: & hæc sufficienter patent ex iis, quæ hætenus sparsim ex Luthero retulimus.

Tertiò denique falsum est, quòd Lutherus non distinxerit inter actum qui purè sit timoris, & eum qui pro motivo habet amorem justitiæ; ut clarum est ex hætenus dictis. Nonne satis multa sunt, quæ in Luthero carpi possunt, ut necesse fuerit ad alia non rectè fundata recurrere?

§. 3.

Alterum argumentum.

155. **P** Rob. Conclus. 2. ex tam constanti & unanimi plurimorum omnis generis & conditionis consensu.

Huic argumento initio suæ Quodlibeticæ occurrit P. Farvacques: *Neque, inquit, hic jurare poterit ab Auctorum multitudine pretium patrociniū: quia non mille Auctores, nec decies millies centena millia suffragiis suis efficiunt, ut sufficiat apositio,*
quæ

que ex Christi institutione non sufficit. Fateor libenter non posse Auctorum multitudinem efficere, ut ad valorem sufficiat, quod noluit Christus sufficere. Verum quid inde? nam nec ullum Concilium id efficere potest. Id igitur isto argumento agitur, quòd talis dispositio ex Christi institutione sufficiat. Quod sic conficio.

156. Ponamus Auctores serè unanimiter affirmare, certò sufficere pro forma absolutionis hæc verba: *Rogo ut Deus te habeat pro absoluto*; vel alia quæcumque distincta à forma, qua modo utimur; & ita passim institui in scholis confessarios, hosque ea uti, etiam à plurimis annis promiscuè fuisse usos, scientibus Ecclesiæ Prælati & ipsis summis Pontificibus, neque ullo modo contradicentibus, idque postquam diversis temporibus pauci aliqui acriter rejecissent illam formam, tamquam manifestè insufficientem. His positis nemo negabit, quin inde planè efficax duci possit argumentum, formam illam ex institutione Christi esse omnino sufficientem. Credibile enim non est Spiritum S. qui Ecclesiam ejusque capita regit, permitturum, ut cum tot animarum pernicie talis persuasio pleraque Ecclesiæ membra pervadat, & ex tot Pontificibus ne unus quidem eam sententiam noter ut falsam, vel saltem ut dubiam. Atqui hæc omnia æquè vel magis locum habent in casu nostro; ergo etiam inde ducitur efficax argumentum. Probatior minor: Quia illa sententia passim invaluit post Tridentinum, plerisque in eam abeuntibus; passim ea imbuti fuerunt animarum Pastores, & ab his eorum subditi, quorum sine dubio plurimi illam in praxi sunt amplexi, idque in Sacramento unde pendet æterna salus: sciverunt id Ecclesiæ prælati, sciverunt Pontifices; neque horum quispiam eam sententiam ut falsam aut ut dubiam notavit; etiam postquam pauci aliqui libris editis eam sententiam, ut falsam & saluti animarum perniciosam, insectati sunt. Imò, quod plus est, Auctores hujus sententiæ fundant sese præcipuè in verbis Tridentini, adeoque hujus verba hunc sensum præ se ferunt; ea enim potius censenda est verborum significatio, quam passim viri docti illis subesse existimant. Fieriine potest, ut quis sibi persuadeat, Patres Tridentinæ Synodi, postquam Spiritus Sancti instinctu decreverant contra illius temporis errores tradere de hoc Sacramento doctrinam perspicuam & exactam, postmodum in executione adeo desertos fuisse à Spiritu S. ut doctrinam suam iis verbis conceperint, quæ in obvio sensu accepta errorem ingenerarent æternæ fidelium saluti perniciosissimum; neque Spiritus S. illum exortum statim per Ecclesiæ capita in suo ortu præfocaverit; atque hac ratione alium à se per ea verba sensum intentum fidelibus manifestarit. Hæc certè illi contra quos agimus numquam mihi persuaserint; multò minùs alii, qui quorundam errorum ab Ecclesia sunt convicti. Nostram autem sententiam de sufficientia attritionis ex merò gehennæ conceptu

conceptæ passim à Theologis post Tridentini tempora traditam, nec negant, nec negare possunt; quare non est quod illis recensendis inmoremur.

157. Porro quia Exim. P. Farvacques pag. 2. negat, quemquam ante Tridentinum nostram sententiam docuisse, beneficii loco habiturus si aliquis proferatur, qui asserat sufficere attritionem cognitam talem; fatetur enim fuisse qui traderent illam sufficere, si putetur bonâ fide contritio: sit

§. 4.

An & qui nostram sententiam docuerint ante Tridentinum.

Maxima fuit inter scholasticos olim sententiarum varietas, & sæpe obscuritas, circa contritionem seu pœnitentiam.

158. Primò aliqui non distinxerunt inter actum requisitum in Sacramento, & extra illud. Hi divisi erant in duas classes: his requirentibus in utraque justificatione amorem Dei propter se dilecti; & hanc sententiam inter antiquos fuisse satis communem testatur Gabriel Biel: illis verò dolorem ex timore pœnæ aut spe beatitudinis, quem volebant sine Sacramento sufficere. Inter hos fuit Guido de Monte Rocherii ante annos circiter trecentos, qui tract. 2. de Contrit. cap. 1. definiens contritionem nulla facta mentione amoris Dei, sed solius timoris ac spei, asserit hanc contritionem justificare etiam cum solo voto Sacramenti.

2. Marsilius in 4. q. 10. art. 1. asserit dolorem, qui elicitur ante obtentum habitum charitatis, non esse veram pœnitentiam, sed tantum esse penitentiam improprie, eò quòd sit similis in tendentia cum pœnitentia. Verùm non aliud censendus est intellexisse, quàm quòd sine charitate & gratia habituali, non sit meritoria, nempe de condigno. Hoc sensu in disput. Lipsica dixit Lutherus: *Omnes consentiunt contritionem oportere fieri in charitate, si debet esse meritoria pœnitentia*: quod verum esse admittit Eckius.

3. Marsilius ibidem, dicit, charitatem esse priorem pœnitentiâ; sed, ut ex ipso patet, per charitatem intelligit gratiam actualem, ex quâ pœnitentia promanet. Et hoc modo loquendi sæpe abusus est Lutherus in disputatione cum Eckio, charitatem confundens cum gratia actuali, ut videre est ex responsionibus Eckii.

4. Dicebant alii sufficere actum naturalem præsertim amoris Dei, ut refert Tapperus ad art. 4. qui de hoc actu naturali addit: *An sit idonea dispositio, ut virtute Baptismi & Pœnitentiæ gratia conferatur, certum non est; sed tamen probabilis multorum opinio quòd sufficiat*. Adverte tamen quosdam antiquos per actum naturalem, seu qui fiat ex solo libero arbitrio, intelligere actum qui non ex habitu supernaturali, sed tantum à gratia actuali procedat, ut colligere

gere est ex Altiſſiodorenſi in 4. de Sacramento Pœnitentiæ pag. 265.

5. Apud Tapperum quidam DD. ſcholastici, ſed, ut addit, neoterici aſſerebant quodvis attritionis genus ſufficere ad gratiam, dummodo pœnitens bona fide exiſtimet ſe præſtitiffe id, quod eſt neceſſarium.

6. Volebant aliqui ſufficere habere dolorem de peccatis in voto.

Verum longiſſimum foret & difficile omnes ſententias recenſere: quare ut propius ad quæſtionem noſtram accedamus;

159. 7. Docuerunt alii ſufficere attritionem ex metu gehennæ, ſi putetur eſſe contritio: fuiſſe qui ita docerent ſaretur P. Farvacques. Hos autem auctores plurimum fauiſſe noſtræ ſententiæ negari non poteſt: negabant enim omni pœnitentiæ eſſentiale eſſe elici ex charitate in Deum, quod aſſerunt Adverſarii.

160. 8. Fuiſſe aliquos ante Tridentinum, qui docerent ſufficere attritionem ex metu cognitam, maniſeſtum eſt ex Tappero, dum ad Articulum 4. dicit hanc eſſe probabilem Doctorem ſententiam: dum autem non addit eſſe ſententiam neotericorum, quod expreſſè notat ad ultimam ſententiam ex ibi relatis, ſatis indicat eos eſſe Tridentino antiquiores, ſub cuius initia hæc ſcripſit. Quod adhuc magis patebit ex dicendis.

161. Pro hac noſtra ſententia primo loco adfero Joannem Fiſcherum Episcopum Roſſenſem, mortuum decem annis ante Tridentinam Synodum congregatam: qui Auctor multorum inſtar eſt, cum non ſuo tantum, ſed & aliorum Catholicorum nomine loquatur. Hic ad art. 11. columnâ 437. refert hæc Lutheri verba: *Nulla modo confidas te abſolvi propter tuam contritionem &c.* Ad quæ ita reſpondet Episcopus: *Nihil in ſe mali continet is articulus juxta verborum frontem, neque in eo quidquam eſt, quod noſtri (id eſt Catholici) non aſſerant. Cum nemo de ſua contritione certus eſſe poſſet, quod ea ſit ſufficiens: neque noſtri contritionem exigunt à confeſſiuro, ſed attritionem ſolam; Quod autem per attritionem idem intelligat, quod nos, conſtat ex ejus teſtimonio ſupra num. 10. & aliis locis paſſim.*

Et ad art. 5. col. 385. *Diobus itaque modis (ut ſupra diximus) Ecclēſia credit, peccatores Deo poſſe conſiliari. Altero per ingentem & acerbum dolorem, nondum abſolutionis ſuſcepto Sacramento: altero per ſuſceptionem Sacramenti, dolore nonnulla præſedente. Utroque certè modo ſuam paratus eſt Deus gratiam elargiri. Secundus tamen modus faciliſſor eſt, & peccatori ſecurior. . . . Accedat ad Sacramentum quiſpiam fide & dolore nihilo majoribus, quam ſatis fuerit ad huius Sacramenti ſuſceptionem. Ego certè tam fidem, quam dolorem, voto ſaltem aſſectatum, exigi non dubio. Verum ſi dixerò ſine dolore, qui ex charitate naſcitur, neminem ad ſuſcipiendam abſolutionem idoneum eſſe, quis jam de Sacramenti fructu ſecurus eſſe poteſt, cum nemini certum ſit dolorem ex charitate proſiciſſi. Tutius eſt igitur, ut dicamus fidem cum nonnullò dolore ſufficere, ut quis per Sacramenti ſuſceptionem conſidat ſe proſuſ ab omni peccatorum*

reata jam liberum esse factum. Ubi cum dolorem nonnullum opponat dolori qui nascitur ex charitate, per illum intelligit nostram attritionem.

Rursus ad art. 14. col. 455. *Ecclesie orthodoxe communis doctrina est, nimirum ut confessorum cum aliquo dolore veniat ad suscipiendam absolutionem, & quod Sacerdos illum audiens, si non aliis indiciis confiterit, ab eo sciscitetur, an doleat: non (quemadmodum tu dicis) an sufficienter doleat. Dum autem dicit peti, an doleat, agit de dolore, quem Lutherus dixerat facere hypocritam & magis peccatorem, uti patet ex præcedentibus. Denique ad artic. 1. col. 339. ad illud Lutheri: Quidam enim ex eis dicunt nec motum bonum cordis requiri: respondet Roffensis: Non est utilis absolutio, nisi præcedat in conscientia aliqua contritio vel attritio.... sufficit enim quod aliqua displicentia, licet informis, præcedat, & tunc ille capax est absolutionis Sacramentalis.*

162. Omittere nequeo testimonium Roffensis, quo fatetur se aliosque Catholicos motos ad hanc sententiam commiseratione erga peccatores quam passim in nostræ sententiæ Auctoribus sugillant adversarii: ita enim loquitur eadem columnâ 339. *illi (nempe Catholici) spectant illud Evangelicum, arundinem quassatam non confringet, & linum sumigans non extinguet. Condescendunt itaque misericorditer infirmitatibus peccatorum, ac propterea viam struunt faciliorem, & certioram quo posuerunt, ad alluciendo in rectam semitam peccatores. Quoniam igitur via contritionis, seu attritionis formata, non minus est dura, quàm incerta peccatoribus, ideo viam hanc alteram, per Sacramentorum susceptionem, multò mihiorem & securiorem docent, utpote ob quam nihil exigitur, nisi ut non ponatur obex vel infidelitatis, vel peccati mortalis: & hæc est causa, quæ movet eos docere tantam inesse Sacramentis efficaciam. Per obicem autem, ut explicat columnâ præcedente, intelligitur vel carentia fidei, vel quòd adsit affectus actualis ad mortale, vel quòd quis de mortali præterito neque conteratur, neque atteratur.*

163. Hisce testimoniis adeo manifestis tenebras aliquas affundere conatur P. Farvacques pag. 55. asserens Roffensem solummodò docuisse, attritionem ex solo motivo metus gehennæ tunc sufficere cum Sacramento, quando bona fide existimatur esse dolor ex amore Dei proveniens: id autem, ut inquit, evidenter colligitur ex his illius verbis relatis num. 161. *Ego certè tam fidem, quàm dolorem saltem voto affectatum exigi non dubito. Quæ verba eadem pag. sic explicat ille auctor: docet quod sufficiat si habas dolorem affectatum, hoc est si bona fide conetur & putes se habere dolorem ex charitate provenientem. Pergit P. Farvacques: unde, quicumque scribis de sufficientia timoris in Sacramento Pœnitentiæ, ex hoc loco explicanda sunt, quòd nempe putes attritionem ex timore sufficere, dummodo existimetur contritio. Fateor sæpe in Auctoribus unum locum explicari debere per ea quæ idem Auctor alibi dicit. Quæ, inquam, Auctor dicit, nego enim explicari debere juxta unum hoc est, quòd alius quipiam pro suo arbitratu & sine ulla probatione adjicit. Illo autem loco non*

dicat Roffensis exigi dolorem ex charitate saltem voto affectatum, sed simpliciter asserit exigi dolorem saltem voto affectatum. Non mutatur autem nec restringitur significatio vocis *dolor*, quando ei additur, in voto; nam pecunia in voto non magis restringitur ad auream, quam pecunia nullo addito. Sicuti ergo, dum Roffensis, & omnes qui nobiscum sentiunt, fatentur ad justificationem in Sacramento requiri dolorem, malè quis id interpretaretur de dolore qui sit ex motivo charitatis, sic quoque dum dicit requiri dolorem voto saltem affectatum, gratis additur; hoc est dolorem ex charitate. Hoc ipsum etiam patet ex testimoniis Fisscheri recitatis, dum dicit Catholicos non requirere contritionem à confessuro, sed solam attritionem; non rogare an sufficienter doleant, dummodo constet ipsos dolere; sufficere aliquam displicentiam licet informem &c. Alibi etiam dicit posse verè dolere eum, qui non dolet ex charitate. Quæ non rectè dicerentur, si judicasset debere esse putatam contritionem. Sic illi, qui docent peccatorem invincibiliter putantem se esse in statu gratiæ, justificari per sumptionem Eucharistiæ, si adsit attritio; malè profecto dicerent Catholicos in eo, qui mortaliter peccavit, non requirere statum gratiæ per Sacramentum penitentiae obtentum, antequam communicet; sed solam attritionem, hanc sufficere, non debere quæri seu curari an mortalia confessus sit ante communionem, dummodo ex aliquo signo constet eum attritum &c.

Fisscherum ergo & cum ipso alios nostram sententiam tenuisse ante Tridentinum, negari non potest. Et id sufficere poterat; quosdam tamen insuper profero.

164. Joannes à Daventria Anno 1537. edidit Exegesis contra Confessionem Augustanam, in qua ad Artic. 5. hæc profert verba Lutheri ex sermone de poenit: *Contritio quæ paratur discussione, collectione, detestatione peccatorum, quâ quis ponderat gravitatem, damnum, sorditatem peccatorum, deinde amissionem æternæ beatitudinis, facit hypocritam, imo magis peccatorem, quia timore præcepti & dolore damni id facit & tales omnes indignè absolventur.* Ad quæ Daventria, postquam fusè probasset dolorem de peccatis ex ingruentis mali timore natum, non facere hypocritam & magis peccatorem, tandem respondet pag. 30. *Sic absolvere non est irretire, quod nūquid serè nobis obijciunt adversarii.* vide etiam pag. 49. & 50.

Et rursus ad Artic. 12. pag. 180. recitat hæc verba ex Confessione Augustana:

Quare intelligunt omnes boni viri utiliter & p̄e reprehensam esse doctrinam Sophistarum & Canonistarum: nam hæc dogmata aperte falsa sunt..... 2. quòd per attritionem mereamur gratiam.

Et respondet Daventria: *Secundum, quòd per attritionem mereamur gratiam, certissimum est: Sacramentum enim Baptismi cum fide & dolore de peccatis, & cum propo-*
posita

posito melioris vite acceptionem iustificat & salvat; sic & attritus, id est, suorum peccatorum poenitens, cum suscipit Poenitentiae Sacramentum, gratiam haud dubie accipit. itaque hoc modo de attritu meretur fieri contritus.

Per Attritionem autem hoc loco Confessionistæ Augustani intelligunt illam, quam reprehenderat Lutherus, quamque ex iis proximè attulimus, adeoque illam de qua hîc agimus. Eandem quoque intelligit Daventria, cum ita intelligerent ii, quos oppugnabat, & etiâ passim Catholici, ut ostensum est capite 2. Imo hoc ipso loco expressè asserit se attritionem accipere hoc sensu. Profert enim ibidem articulum 4. Confessionistarum, qui erat, quòd propter contritionem, non fide in Christum consequamur remissionem peccatorum. Ad quod dogma ab hæreticis reprobatur, sic respondet Daventria pag. 181. Mendacium est impudens quòd docuerint (Catholici) hominem propter contritionem absque fide in Christum mereri remissionem peccatorum: Noverunt enim veram contritionem nunquam haberi, nisi per fidem charitate formatam, licet per fidem informem, ut jam nunc diximus, ateri possit peccator.

165. Tilmannus Segeburgensis impressit Coloniz Anno 1538. librum de septem Sacramentis contra Lutherum: & cap. 4. de Sacramento Poenitentiz pag. 138. dicit, si charitas adsit, vocari contritionem; sin autem, attritionem dici, ac subiungit: *Es hic quidem dolor poenitenti ante absolutionem necessarius est, ut per Sacramentum superveniens ex attrito fiat contritus.*

Et rursus paginâ 149. ita loquitur. Tertiò adfert & dicit Lutherus, scholasticos invenisse, aut, ut ejus verbis utar, finxisse attritionem: cui sic respondet Tilmannus: *frivola est disputatio de nomine, quando de re constat. Quod addit eos docere attritionem virtute clavium fieri contritionem, & eam virtutem Doctoribus esse notam, partim verum dicit, partim falsum. Nam primum, hoc est attritionem superveniente Sacramento fieri contritionem superius ostendimus. Alterum autem falsum est, hanc virtutem clavium Doctoribus incognitam.*

166. Paulus Cortesius item Tridentino antiquior in 4. dist. 3. pag. 88. Ita scribit: *Ad hoc questionis genus pertinet, de poenitentiz partibus inquirere: quarum quidem enumeratio tripartita est. Earum una, confusio; altera, confessio; tertia, per solutio nominatur. Confusio est amor ob patrata scelera susceptus, cum confitendi & persolvendi voluntate; vel fletus animi demisso ex scelerum memoria, ac ex impendentis judicii formidine manans. Quo loco agens de dolore requisito in Sacramento, nullâ factâ mentione amoris, solum meminit timoris judicii. Vocat autem contusionem, quia sic appellabant Anabaptistæ, contra quos scribit.*

167. Denique his omnibus multò antiquior Gabriel Biel in 4. distinct. 14. quest. 2. art. 1. opin. 3. ita loquitur ex sententia aliorum: *Quandoque dispositio illa prævia non est sufficiens, sed dispositio quasi à remotis, & hanc vocant attritionem seu poenitentiam informem, & illa non sufficit ad peccati remissionem: sed superveniens Sacramentum supplet imperfectionem illius attritionis, & confert peccato-*

*rum remissionem & gratiam, & per hoc formatur attritionem, ut mereatur dici contritio: nempe quia per attritionem cum Sacramento idem obtinetur, quod per contritionem: prout etiam explicat Vega, alique passim. Quod autem intelligat per attritionem id, quod nos intelligimus, patet ex Distinct. 16. verba retulimus supra num. 11. Item ex iis quæ dicit hoc loco explicans illam insufficientiam per hoc, quod non fiat propter Deum tamquam finem ultimum, sed propter se & amorem sui, quia peccata sunt inductiva poenæ, aut impeditiva gloriæ: & tandem eadem quæst. articulo 2. subjungit: *Quoniam, ut recitatum est in priori articulo, diversæ sunt opiniones: quarum quælibet habet graves viros defensores: sequor nunc opinionem Magistri &c.**

Videri etiam possunt Altissiodorensis in 4. tract. de Sacram: Pœnit. fol. 265. Hervæus in 4. distinct. 14. q. 1. Dionysius Cisterciensis, alique.

168. Auctoribus ante Tridentinum accenseri posset non immeritò Tapperus; nam licet tempore Tridentini suum opus primum absolverit, non citat tamen Tridentinum, sed solum Florentinum; unde illius acta videtur nondum conspexisse, adeoque independenter à Tridentino suam tradidisse sententiam. Illum referemus cap. undecimo num. 178.

169. Fuisse qui nostram sententiam traderent circa tempora Lutheri, patet ex Luthero variis locis hanc ut Catholicorum sententiam perstringente: ut in sermone de Pœnitentia, & in captivitate Babylonica Tit. de Pœnit. ubi ait: *fixerunt quamdam attritionem, quæ virtute clavium (quam ignorant) fieret contritio, eam donant impiis, & sic universa contritio aboletur.*

At, inquit Auctor Quodlibeticæ pag. 54. mentitus est Lutherus, dum asseruit, scholasticos docere, quod attritio servilis sufficiat cum Sacramento. Probat. ass. quia aliàs mentitus esset Joannes Morinus doctissimus & solertissimus indagator; hic enim asserit se neminem legisse qui id docuerit ante Melchiorem Canum, & Henricum quemdam Doctorem Salmanticensem.

170. Resp. omnino immeritò & sine fundamento asseri Lutherum in hoc puncto fuisse mentitum, ut patet ex jam dictis. Nam Luthero respondens Rossensis fatetur Catholicos docere eam sententiam, Joannes à Daventria, qui totus est in annorandis Lutheri & sectatorum mendaciis, ad verba Lutheri ex sermone de Pœnitentia, dicit, sic absolvere non esse irritum, ut volebant hæretici. Tilmannus Segebergensis, ad verba Lutheri ex captivitate Babylonica, dicit, in hoc verè dixisse Lutherum: tantum abest, ut horum aliquis neget, ita Catholicos docuisse, aut dicat Lutherum mentitum.

Verissimè ergo id dixit Lutherus; neque hinc tamen sequitur mentitum fuisse Morinum (prout dicebatur in probatione) sed solummodo, quod

quòd in hoc saltem puncto non fuerit tam solers indagator, quàm aliqui autumant.

Patet etiam non subsistere quod habet Auctor Quodlibeticæ, quòd Ludovicus Lopez circa annum 1583. scripserit initio nascentis hujus doctrinæ.

§. 4.

Duo alia Argumenta.

171. **P** Rob. 3. quia si verba Lutheri & Tridentini relata cap. i. cum invicem componantur, clarum fiet, quòd Synodus illum contritionis modum tueatur ac adstruat, quem rejiciebat Lutherus. Atqui Lutherus loquebatur de attritione, quæ non erat ex charitate, sed ex timore pœnitæ; ergo de eadem loquitur Tridentinum. De hac autem attritione declarat Tridentinum, quòd *præparet ad gratiam*, quòd *ad Dei gratiam in Sacramento Pœnitentiæ impetrandam disponat*: Utique proximè & sufficienter, ut admittunt illi contra quos disputamus; ergo Tridentinum affirmat illam attritionem sufficere ad justitiam in Sacramento. Idem confirmatur ex eo, quòd ubi Lutherus dixerat attritionem ex metu facere indignos, seu indispositos qui absolvantur; è contra Tridentinum declaret eam attritionem disponere ad gratiam in Sacramento pœnitentiæ impetrandam seu reddere dispositos & dignos qui absolvantur.

172. Dices cum Auctore Quodlibeticæ pag. 52. inane esse hoc argumenti genus; quia, si quid prober, sequetur etiam definiri à Tridentino, quòd sufficiat cum Sacramento dolor naturalis. Nam idem est tenor & forma hujus argumenti: Lutherus graviter redarguit Catholicos, quod docerent sufficere attritionem naturalem in Sacramento. Atqui Synodus damnat Lutherum, & approbat doctrinam Catholicorum de attritione; loquitur enim Synodus in sensu, quem Catholicis attribuit Lutherus; ergo declarat attritionem naturalem sufficere.

173. Resp. inanem potius esse hanc argumenti retorsionem. Fateor quidem Lutherum aliis locis, Catholicis & ipsi Leoni X. impigisse calumniam, quòd traderent dolorem naturalem sufficere cum Sacramento, quia nimirum censebat (quod etiam affirmat P. Lupus) illum dolorem esse non posse nisi naturalem. Fecit, quod fecere aliqui in Gallia, qui, quia putant attritionem esse naturalem, nostræ sententiæ Auctores traducunt, quasi asserant sufficere naturalem, cum tamen constet nos oppositum mordicus tueri. Eodem modo Lutherus asseribat Catholicos docere, quòd sufficiat naturalis, id est, quam ipse censebat naturalem. E contra verò Catholici

cum illo disputantes Roffensis & Eckius, ut vidimus n. 134. & sequentibus, constanter urgebant eum actum naturalem non esse, sed supernaturalem. Et ne de hac re dubitari posset, noluit hanc quæstionem Synodus manere indecisam; sed antequam declararet attritionem disponere ad justificationem in Sacramento, pronuntiat illam esse donum Dei & Spiritus Sancti impulsum. Insuper eodem capite addit: *Quamobrem falso calumniantur Catholicos scriptores, quasi traderint sine bono motu iustipienium gratiam conferre.* Declarat igitur id, quod senserant Catholici, nempe illum actum esse supernaturalem: & oppositum dicentes calumniari. At quoad punctum, de quo agimus, nullibi insinuat Synodus calumniatos fuisse hæreticos, dum Catholicis objicerent doctrinam de sufficientia attritionis in Sacramento, neque declarat hanc non sufficere; sed è contra, postquam statuit illam esse supernaturalem, declarat in Sacramento ad justificationem disponere, utique proximè, ut adversarii admittunt. Maxima igitur disparitas est inter utrumque argumentum. Addo Lutherum eodem modo impigisse Catholicis calumniam de naturalitate attritionis, sicuti de ejusdem malitia & hypocrisi, ut patet ex illius responsione ad Artic. 6. Leonis X.

Dices cum eodem pag. 52. licet Lutherus initio suæ hæresis voluerit pœnitentiam concipi debere ex amore, postea tamen docuit eam timore seu terrore concipi, adeoque etiam tenuit sententiam nostram,

Resp. Fateor Lutherum admisisse terrores, hinc tamen non infertur docuisse nostram sententiam. Ostendere debebat Auctor Quodlibeticæ, quòd Lutherus alicubi docuerit, in Sacramento Pœnitentiæ ad justificationem sufficere dolorem de peccatis, & propositum vitæ novæ ex solo motivo timoris gehennæ. Addo, licet verè postea mutasset sententiam, ex verbis tamen Tridentini manifestum est, reprobari id, quod docuerat Lutherus in serm. de Pœnit. vide dicta capite primo.

174. Prob. 4. cum Tappero ad Artic. 4. Ysamberto disp. 14. de Pœnit. art. 5. aliisque ex S. Augustino lib. de catechizandis rudibus. Ubi cum cap. 16. posuisset exemplum instructionis faciendæ illi qui petit baptizari, multumque laudasset baptizandum, qui respondet, se propter vitam æternam velle fieri Christianum: dixissetque illum cogitare *de vera & certa securitate*, subjungit cap. 17. *Qui autem propter beatitudinem sempiternam, & perpetuam requiem, quæ post hanc vitam sanctis futura promittitur, vult fieri Christianus, ut non eat in ignem æternum cum diabolo, sed in regnum æternum iniret cum Christo, verè ipse Christianus est: cautus in omni tentatione, ne prosperis rebus corrumpatur, & ne si angatur adversis, & in abundantia bonorum terrenorum modestus & temperans, & in tribulationibus fortis & patiens. Qui etiam proficiendo venit ad talem animum, ut plus amet dominum, quàm timeat gehennam: ut etiamsi ducat illi Deus, utere deliciis carnalibus sempiternis, & quantum poses pecca, nec morietur, nec in gehennam mittetur,*
sed

sed mecum tantummodo non erit exhorrescat & omnino non peccet; non jam ut in illud, quod timebat, non incidat, sed ne illum, quem sic amat, offendat; in quoniam est requies etc. Hoc loco Augustinus ponit ad ultimum, qui ex timore gehennæ vult fieri Christianus, & ex eodem motivo exhorrescit peccare: & hunc per Baptismum pronuntiat fieri verè Christianum. Id autem intelligi non posse de solo valore Baptismi & charactere, sed debere intelligi de illius effectu seu de justificatione patet ex contextu: præmiserat enim initio capitis: *Sunt enim qui propterea volunt esse Christiani, ut aut promereantur homines, à quibus temporalia commoda expectant, aut quia offendere nolunt, quos timeant. Sed isti reprobi sunt; etsi ad tempus eos portat Ecclesia, sicut area usque ad tempus ventilationis paleam sustinet: si non se correxerint, & propter futuram sempiternam requiem Christiani esse coeperint, in fine separabuntur. Nec sibi blandiantur, quod in area possunt esse cum frumento Dei, quia in horreo cum illo non erunt, sed igni delitescunt.* Illi de quibus hic agit Augustinus, licet non accipiant fructum Baptismi, ac per hoc maneat reprobi, validè tamen sine dubio baptizantur, & characterem accipiunt; unde dicit eos portari ab Ecclesia, esse in area cum frumento Dei, damnandos tamen, nisi se correxerint: correctio autem, quam exigit, alia non est, quam ut propter futuram æternam requiem Christiani esse incipiant, quia nempe hac voluntate posita tollitur obex seu defectus dispositionis, quæ ad fructum Baptismi erat necessaria. Quando ergo eos, qui fiunt Christiani propter æternam beatitudinem, vel ne eant in infernum, pronuntiat esse verè Christianos, intelligit quod fructuosè baptizentur, spem faciens fore ut postea id agant ex amore Dei, quod jam faciunt ex timore pœnæ vel spe præmii,

CAPUT IX.

*Solutio eorum, quæ proponuntur in questione
Quodlibetica.*

EXimius P. Farvacques in suo libello plurima proponit ex Synodo Tridentinâ petita argumenta, quibus probare nititur, in dispositione ad Sacramentum requisita necessariò involvi amorem Dei propter se dilecti; quæ cum ordine & more scholastico deducar, nos ejus ductum sequentes iisdem ferè verbis illa proponemus & eodem ordine dissolvemus.

§. I.

Primum Argumentum.

175. **A**D Pœnitentiam, quam agi oportet à baptizandis, requiritur, ut *Deum tamquam omnis justitiæ fontem diligere incipiant*: ergo illud ipsum requiritur in Sacramento Pœnitentiæ. Antecedens petitur ex Tridentino sess. 6. cap. 6. *Disponuntur autem ad justitiam, dum excitati divinâ gratiâ & adjuti, fidem ex auditu concipientes,...* & à divinæ justitiæ timore, quo utiliter concutiuntur, ad considerandam Dei misericordiam se convertendo, in spem eriguntur, fidentes Deum propitium fore; illumque tamquam omnis justitiæ fontem diligere incipiunt: ac propterea moriuntur adversus peccata per odium aliquod & detestationem, hoc est, per eam pœnitentiam, quam ante baptismum agi oportet. Quod autem illa verba, *diligere incipiant*, intelligenda sint de amore amicitiz, confirmat ex eo quod eadem vox *diligere* in canone 3. qui respondet huic capiti, manifestè importet amorem amicitiz.

pro responsione

176. Not. 1. Hæreticos illius temporis in hoc errasse, quod dicerent, ante justificationem non posse præcedere dilectionem Dei seu charitatem, adeoque nec ad illam posse disponere: patet hoc ex Luthero variis locis, & probat P. Farvacques pag. 6. asserens Concilii scopum hoc cap. 6. fuisse, damnare illam hæresim ac definire, quod dilectio Dei justificationem possit præcedere, & ad hanc disponere. Concedo huic Auctori cum fuisse

Con-

Concilii scopum. Dignum tamen notatu est, quod idem Auctor, quando aliquid reperit in Tridentino, quod sibi favere arbitretur, incunctanter pronuntiet, eo loco definiri contra hæreticos, quando constat hos oppositum docuisse: & ex eorum errore contrariam mentem Synodi colligat. Quando vero nostræ sententiæ Auctores proferunt definitiones Concilii iisdem ferè verbis conceptas, quibus suos errores expressit Lutherus, & ex eo contendunt, id damnari à Synodo, quod docuit Lutherus: respondet Tridentinum de mente Lutheri sollicitum non fuisse. Vide illum pag. 52.

177. Notandum 2. Tridentinum sess. 6. non agere determinatè de justificatione quæ fit per Sacramentum, sed de justificatione generatim. Manifestum id est; quia, dum meminit Baptismi aut Pœnitentiæ, addit de eorumdem voto. Sic cap. 4. cum descripsisset justificationem, subiungit: *Quæ quidem translatio post Evangelium promulgatum sine lavacro regenerationis aut ejus voto fieri non potest.* Et eàdem sess. cap. 14. agens de lapsis post Baptismum, ita loquitur: *Unde docendum Christiani hominis pœnitentiam post lapsum multò aliam esse à baptismali, eaque contineri non modo cessationem à peccatis & eorum desestationem, aut cor contritum & humiliatum: verum etiam eorumdem Sacramentalem Confessionem saltem in voto, & suo tempore faciendam.* Atqui justificatio, quæ fit per Sacramenti votum, prout hoc opponitur actuali illius susceptioni, est justificatio extrasacramentalis, sive per actum vi sua justificantem: ergo.

Notandum 3. vocem *diligere* tum in capite 6. tum in Can. 3. non magis importare actum illum amoris imperfectum, quem adversarii volunt requiri in Sacramento, & sine hoc non sufficere, quàm perfectissimum quemque Dei amorem. His prænotatis

178. Respondent aliqui per *diligere* intelligi à Tridentino amorem concupiscentiæ: Hanc responstionem multis refutat P. Farvacques; verùm non satis efficaciter, præsertim si dicatur Synodus loqui de amore abstrahendo ab amore amicitie, & ab amore concupiscentiæ, seu qui involvitur in desiderio posthac divinis mandatis obtemperandi. Neque quidquam urget quod adfert, in præcedentibus actu non fuisse de amore concupiscentiæ, id est, de actu spei: nam Tridentinum eodem capite post verba relata num. 175. Subiungit: *Denique dum proponunt suscipere Baptismum, inchoare novam vitam, & servare divina mandata.* Hæc tamen dubium non est, quin includantur in præcedentibus. Imo illa verba; *moventur adversus peccata per odium aliquod, proponunt suscipere Baptismum & servare mandata*, videntur esse explicatio præcedentium; in his autem cum nulla fiat mentio Dei propter se dilecti, censenda est Synodus, dum ait, *diligere inchoant*, loqui indeterminatè de quavis dilectione, quæ continueat detestationem peccati commissi, propositum suscipiendi Baptismum, & servandi reliqua mandata; idque vel ex motivo amoris non accedentis Baptismo, vel cum hoc ex alio motivo. Vide dicta

num. 14. Item Vegam lib. 6. cap. 28. ubi hac ratione eum Tridentini locum interpretatur. Quidquid sit de hac solutione, quæ sine dubio magnam habet probabilitatem:

179. Resp. Cum ut diximus num 176. assentiente P. Farvaques, scopus Synodi sit definire, quodd dilectio Dei præcedere possit justificationem, nihil urget nos illud *diligere incipiunt*: fateamur enim omnes, quodd possit dilectio præcedere. Quare urgeri tantum possunt verba sequentia: *ac propterea moventur adversus peccata per odium aliquod ac detestationem, hoc est, per eam penitentiam, quam ante Baptismum agi oportet.*

180. Ad quæ Resp. Tridentinum ille enumerasse varia motiva timoris, spei, amoris, ex quorum singulis concipi potest detestatio peccatorum efficax; tum subungere, *ac propterea*; quod rectè potest sic intelligi; ex horum motivorum aliquo moventur adversus peccata per odium aliquod; ubi vox, *aliquid*, importat dari odia diversa, quod nec negare possunt adversarii.

Dum autem pergit Tridentinum: *hoc est per eam penitentiam, quam ante Baptismum agi oportet*: omnino gratis id intelliges de sola justificatione in, seu cum Sacramento Baptismi: duplex enim penitentia, quæ agi ante Baptismum debet, nempe quæ sit vel contritio se sola justificans, vel attritio non justificans nisi cum actuali Sacramenti susceptione. Justificatio enim, quæ sit cum solo voto Baptismi, de quo actum erat cap. 4. ejusdem sess: est justificatio non baptizari, adeoque penitentia ad illam disponens, est penitentia quæ agitur ante Baptismum; imò quæ ante hunc agi debet, quando illius suscipiendi non adest opportunitas.

181. Querit P. Farvaques quo revelante didicerimus particulam *propterea* referendam ad alia quoque motiva nempe timoris & spei.

Resp. 1. quoniam revelante didicit, eo non referri, aut illud *ante Baptismum* importare solam penitentiam, quæ actualis Sacramenti consortium postulat ad justificationem, præsertim cum illa sessione passim agatur de justificatione etiam extra Sacramentum?

Resp. 2. id nos didicisse ex Tridentino, quod sess. 14. ex professo agens de Sacramento Pœnitentiæ, ejusque partibus, & promittens doctrinam exactam & perspicuam, quando loquitur de contritione imperfecta disponente ad justificationem in Sacramento Pœnitentiæ, ne minimam quidem mentionem facit dilectionis Dei. Ex hoc nimirum loco investigandum est, qualis dolor requiratur in Sacramento potius quàm ex sess. 6. in qua etiam agitur de dispositione ad justificationem extra Sacramentum, ad quam requiri dilectionem Dei nemo negaverit.

182. Respondet aliter Ysambertus disp. 15. de Pœnit. illo cap. 6. agi de sola justificatione, quæ obtinetur sine actuali Sacramenti susceptione: nam

Synodus hoc cap. 6. loquitur de illis dispositionibus, quibus positus confertur ipsa justificatio; ita enim inchoat sequens caput 7. *Hanc dispositionem cui præparationem justificatio ipsa consequitur.* Atqui si, dum dicit *diligere incipimus*, id intelligatur de alia dilectione, quàm illà, quæ per se justificat, verum non erit, quoddam dispositionem seu præparationem cap. 6. descriptam justificatio ipsa consequatur; ergo agit de sola dilectione per se justificante. Minor, quæ sola negari potest, probatur: dispositiones hoc ordine enumerat Tridentinum; primum ponit Fidem, & inde timorem, ac spem, postea dilectionem Dei & hinc odium & detestationem peccati, ac denique propositum suscipiendi Baptismum, inchoandi novam vitam ac servandi mandata. Ponamus igitur hominem non baptizatum, jam credere, timere, sperare, Deumque diligere, amore illo imperfecto (quem statuunt adversarii esse dispositionem necessariam in Sacramento) ac deinde ex hoc amore imperfecto peccata detestari, ac denique proponere suscipere Baptismum, novam vitam inchoare, & servare mandata Dei. Has dispositiones juxta adversarios non consequitur justificatio ipsa, cum juxta illos hi actus tantummodo constituent attritionem, quæ non justificat cum solo proposito suscipiendi Baptismum, sed tantum cum hujus susceptione actuali. Ergo cum Tridentinum dicto loco non facta mentione Baptismi reipsa suscepti, asserat quoddam præparationem consequatur justificatio ipsa, necesse est ut aliam intelligat dispositionem, nempe amorem Dei, qui cum proposito suscipiendi Baptismum justificat. Eodem modo ostendetur, in sententia eorum, qui nobiscum sentiunt, omnem Dei propter se dilecti amorem justificare; attritionem vero cum Sacramento sufficientem, esse actum ex motivo metus aut alio simili; ostendetur, inquam, Concilium eo cap. 6. non agere de actu attritionis, sed contritionis. Porro de actu per se justificante verissimè dicitur quoddam sit poenitentia, qualem ante Baptismum agi oportet, & quidem determinatè, ut scilicet sit ea poenitentia, quam justificatio ipsa consequitur: de hac enim ibi est sermo.

Contra hanc responsionem non video quid opponi possit, nisi hoc tantum, quoddam eodem cap. 7. subjungat Tridentinum, causam instrumentalem hujus justificationis esse Baptismum. Verum facillè responderi potest, quoddam Synodus, postquam pronuntiavit ad illam dispositionem consequi ipsam justificationem, incipiat definire quid sit justificatio, nempe non tantum remissio peccatorum; sed & sanctificatio & renovatio interioris hominis &c. ac deinde progrediatur hujus, id est, jam descriptæ justificationis causas enumerare: cum autem hujus justificationis causa instrumentalis sæpè sit Baptismus, voluit & hunc recensere, ut causas omnes simul proponeret, & hac ratione (nisi qui fortè illud explicare velint de voto Baptismi) respondere debent omnes, quia certum est, quod Synodus illo cap. 6. saltem

simil egerit de justificatione extra Sacramentum, si non de sola, ut dictum est nu. 177. & 179. Ipse quoque P. Farvacques asserit illo cap. 6. contra hæreticos definiri, quod justificationem præcedere possit, dilectio Dei, utique tam illa quæ est contritio, quàm alia; imo de contritione præcipuè loqui debet Synodus, cum de tali dilectione loquerentur hæretici, qui negabant eam posse reperiri in homine ante justificationem.

S. 2.

Argumentum Secundum.

183. **T**ridentinum sess. 6. cap. 7. ait: *Fides, nisi ad eam Spes accedat & Charitas, neque unit perfecte cum Christo, neque corporis ejus vivum membrum efficit, quæ ratione verissimè dicitur Fidem sine operibus mortuam & otiosam esse, & in Christo JESU neque circumcisionem aliquid valere, neque præputium, sed Fidem quæ per Charitatem operatur.* Ergo si attritio destituatur omni motu Charitatis, neque uniet perfecte hominem cum Christo, neque corporis ejus vivum membrum efficiet.

Resp. negando consequentiam intellectam de illa accedente Sacramento, Neque quidquam probant verba Tridentini allata, cum certissimum sit illa intelligenda de habitibus illarum virtutum. Nam

184. Primò, de actibus, qui ad gratiam disponunt, egerat capite proxime præcedente, & enumerarat actus fidei, spei, & dilectionis; caput verò septimum sic incipit: *Hanc dispositionem seu præparationem justificatio ipsa consequitur: quæ non est sola peccatorum remissio, sed & sanctificatio & renovatio interioris hominis per voluntariam susceptionem gratiæ & donorum.* Postea autem explicans, quænam sint ea dona subjungit: *Per Spiritum Sanctum Charitas Dei diffunditur in cordibus eorum, qui justificantur atque ipsi inheret. Unde in ipsa justificatione cum remissione peccatorum hæc omnia simul infusa accipit homo per JESUM Christum, cui inferitur Fides, Spes & Charitas.* Vide etiam Can. 11. ejusdem sess. quibus locis cum agat de charitate non tantum quæ infunditur, sed etiam quæ inheret; loquitur procul dubio de charitate habituali. Adde quòd per gratiam, quam dicit infundi, intelligatur gratia habitualis, adeoque & per dona, quæ gratiæ conjungit, intelligit dona habitualia.

2. Justificationis & renovationis interioris, quæ fit per susceptionem gratiæ & donorum, causam instrumentalem statuit esse Baptismum; hic autem nullos in anima causat actus, sed tantum gratiam & habitus.

3. Tridentinum ita concludit hoc caput: *Uaque veram & Christianam justitiam*

justitiam accipientes (id est gratiam & dona quæ postea vocat Fidem, Spem, & Charitatem) eam, seu primam stolam, pro illa, quam Adam suâ inobedientiâ sibi & nobis perdidit, per Christum JESUM illis donatam, candidam & immaculatam jubentur statim renati conservare, ut eam perferant ante tribunal Domini nostri JESU Christi, & habeant vitam æternam. Esse autem stolam loco ejus, quam Adam nobis perdidit, quæ conservetur & proferatur ante tribunal Christi, non convenit nisi habitibus: ergo &c.

185. Atque hinc patet, quis sit sensus verborum, quæ nobis opponuntur: nempe quod virtus seu habitus fidei, sine habitu Spei & Charitatis non uniat perfectè cum Christo neque corporis ejus vivum membrum efficiat, sive non reddat animam sanctam eâ sanctitate, quæ dicitur vita animæ, & quæ verosimiliter identificatur habitui charitatis, vel saltem sine hoc non infunditur. Quod item sine habitu Spei & Charitatis, homo non constituatur intrinsecè potens ad qualvis operationes supernaturales. Ex ita hunc locum explicat, præter innumeros alios, Cunerus Petri tract. de charitate art. 2. pag. 263. Dum autem addit. *Qua ratione verissimè dicitur fidem sine operibus mortuam esse*: indicat, quod sicuti in ordine ad vitam spirituales in actu primo est conjunctio necessaria & dependentia inter habitum Fidei, & habitus Spei, ac Charitatis: sic quoque conjunctionem & dependentiam necessariam esse inter fidem actualem, & alias operationes, tum in ordine ad tuendam vitam animæ jam obtentam, tum ad amissam recuperandam; quia nempe fides actualis, si desint opera seu observatio mandatorum inutilis est ad vitam æternam, & sola fides sine aliis operibus seu actibus nequidem peccatorem ad gratiam sive vitam disponit. Ex hoc loco sic intellecto sufficienssime confutatur error hæreticorum volentium solam fidem justificare.

186. Denique illud ex Apostolo ad Gal. 5. *In Christo JESU, neque circumcisio aliquid valet, neque præputium, sed fides quæ per charitatem operatur*: intelligendum est de charitate habituali; quod nempe hæc tribunt operibus dignitatem & efficaciam merendi, quia reddit hominem Dei amicum, adeoque & ejus opera Deo grata & digna, quibus vitam æternam promittat & rependat. Dici etiam potest, quod valeat fides quæ per charitatem operatur, id est per charitatem Dei aut proximi, sive per observationem mandatorum, quæ hiis duobus charitatis præceptis continetur. Ita hunc locum explanat Cornelius à Lapide, aliique.

S. 3.

Argumentum Tertium.

187. **F**ides sine Spe & Charitate vitam æternam præstare non potest: ut eodem cap. 7. loquitur Tridentinum. Ergo nec attritio servilis.

Resp. negando consequentiam; nam juxta dicta ad argumentum secundum, agit Tridentinum illo capite de habitibus: verissimum autem est habitum Fidei sine habitu Spei & Charitatis vitam æternam præstare non posse. Et eodem sensu petuit ab Ecclesia Catechumeni fidem vitam æternam præstantem; neque enim Ecclesia per Baptismum confert actus sed habitus, adeoque & soli habitus ab Ecclesia petuntur.

188. Instat 1. Cum Tridentinum dixisset quòd sine Spe & Charitate, Fides vitam æternam præstare non possit, addit: *unde & (Catechumeni) statim verbum Christi audiunt: Si vis ad vitam ingredi serva mandata.* Atqui servare mandata pertinet ad actus, ergo in præcedentibus per Charitatem intelligit actum, non habitum.

Resp. negando consequentiam. Sensus enim clarissimus Tridentini est, Fides sine habitu Charitatis non potest præstare vitam æternam; quia autem per quodvis mortale, manente habitu Fidei, expellitur habitus Charitatis, monet Synodus Catechumenos verbis Christi, ut servant mandata, si velint ad vitam ingredi: hoc autem manifestum fit ex sequentibus Tridentini verbis: *Itaque justitiam accipientes, eam; seu primam stolam, candidam & immaculatam jubentur statim renati conservare, ut eam perferant ante tribunal Christi, & habeant vitam æternam:* Ecce rationem, ob quam jubentur servare mandata, ut nempe charitatem seu justitiam, quæ prima stola est, conservent immaculatam, & hac ratione vitam æternam consequantur.

189. Instat. 2. Quando Tridentinum dixit quòd petant Catechumeni fidem vitam æternam præstantem, & quòd audiant verbum Christi, *si vis ad vitam ingredi serva mandata*, sine dubio designavit caeremoniam Baptismo præmitti solitam, quam nobis sic exhibet Rituale Romanum: *si vis habere vitam æternam, serva mandata. Diliges Dominum Deum tuum &c.* Ex his firmum, ut inquit, ducitur argumentum: Charitas, sine qua Fides vitam æternam præstare non potest, est illa quæ continetur his verbis: *diliges Dominum Deum tuum &c.* atqui per hæc intelligitur actus charitatis: ergo &c.

Resp. eodem argumento probaret non posse hominem justificari, nisi faciat actum quo diligit proximum sicut se ipsum; nam Rituale Romanum ibidem

ibidem loquitur de hac dilectione; dicit enim, *serva mandata: diliges Dominum Deum tuum ex toto corde tuo, & ex tota anima tua, & ex tota mente tua; & proximum tuum sicut teipsum. In his duobus mandatis tota lex pendet & Propheta.* Certum autem est ad justificationem in Baptismo non requiri actualem dilectionem proximi, sed sufficere si quis non oderit. Deinde cur ex iisdem verbis non posset quis eodem jure sic arguere? Dilectio Dei ex toto corde, tota anima, tota mente importat amorem perfectum & per se justificantem; ergo talis requiritur pro dispositione ad Baptismum. Ceterum neutra collectio bona est, nam Rituale ibi loquitur eo sensu, quo ostendimus loqui Tridentinum, nempe ad vitam æternam necessariam esse observationem omnium mandatorum, quæ summam continentur his duobus, dilige Deum, & dilige proximum. Neque dilectio Dei ibi adfertur, quod ea sit dispositio ad Baptismum, sed quia unum & præcipuum inter reliqua mandatum est de Dei dilectione, quod proinde illo tempore servandum erit, quando urgebit præceptum, sicuti servanda sunt mandata reliqua, in ordine ad hoc, ut suscepto Baptismo ad vitam æternam perveniatur.

§ 4.

Quartum Argumentum.

190. **P**œnitentia, quam Tridentinum sess. 14. cap. 1. declarat necessariam esse universis lapsis, est pœnitentia reconciliandorum, seu quæ est reconciliatio cum Deo, ut colligitur ex cap. 3. & Can. 1. ejusdem sess. Atqui pœnitentia reconciliandorum debet provenire ex aliquo benevolo affectu in personam offensam. Ergo pœnitentia universis lapsis necessaria, debet provenire ex aliquo benevolo in Deum affectu.

Resp. negando minorem. Cum enim Deus in casu iratus sit peccatori, si Deus iram deponens illum in amicitiam recipiat, jam ex omnium sensu habebitur reconciliatio; imo & ea haberetur si Deus peccatori sine ullo hujus actu gratiam infunderet. Quis, si Petrum iratum Paulo (à quo laesus est) eo adducat, ut Paulo ex animo condonet, Paulus vero nullum foveat odium erga Petrum, imo & firmissimè statuatur non gerere in futurum animos inimicos? Quis, inquam, his positis dicit nondum factam esse reconciliationem, nisi prius Paulo perluaserit, ut eliciat actum amoris amicitiz erga Petrum? Quis unquam dubitavit, quin sit vera reconciliatio, dum quis juxta nostram sententiam cum sola attritione justificatur? An non erit justus, an non accipiet gratiam sanctificantem? Hoc autem erit reconciliari; neque aliter conciliantur infantes; quo modo, quin Deus possit sibi reconciliare adultum, dubium non est.

Confirmatur ex Tappero, qui cum asserat reconciliationem amici & amicitiae leges requirere, ut mutua fiat inter eos voluntatis benevolentia, eam tamen non aliter explicat, quam per propositum non amplius peccandi, sed servandi mandata; idque tam in peccatore respectu Dei, quam in filio respectu patris. Vide Tapperum art. 8. pag. 9.

191. Instat 1. Quod ad reconciliationem requiratur in eo, qui offendit, benevolus affectus in personam offensam, docent sanctissimæ ipsius naturæ leges: Fingamus dissidium subortum inter conjuges, cui uxor causam dederit, quæ, quia persentiscit incommoda sibi inde provenientia, cupit viro reconciliari. Si dicat, poenitet me facti ob incommoda quæ patior, & quamvis te nullo benevolo affectu complectar, seu non amem, cupio à te in pristinum favorem admitti &c. Certè hæc non erit idonea poenitentia reconciliandæ cum marito uxoris &c.

Resp. si illud, non amo, significet (ut sæpe inter homines solet) odium; non facit contra nos. Si vero simpliciter significet, non adesse hic & nunc actum amoris amicitiae erga virum, dico id nullo modo impedire, quo minus in gratiam admitti possit; & retorqueo argumentum. Sit uxor, quæ suâ erga maritum inobedientiâ damnum notabile rei familiari intulerit, ac ea propter habeat maritum graviter sibi offensum; ipsa autem, propter incommoda, quæ patitur, velit viro reconciliari: accedat, & coram marito genuflexa humiliter petat veniam inobedientiæ, spondens se posthac ad omnem ipsius voluntatem promptam fore, & obedientissimam. Quis mortaliū dubitat quin hac ratione facilius longè veniam sit impetratura, quam si tantummodo dicat: Mi marite amo te supra omnes viros? Porro in casu, de quo agimus, peccator detestatur peccata commissa, humiliter à Deo veniam petit, ac firmiter proponit omnia Dei mandata in posterum servare, adeoque & amare Deum amore amicitiae, quando urgebit præceptum amandi, quod quia jam non urget, jam non amat.

192. Addo, non rectè argui ab hominibus ad Deum. Quis enim Rex à subdito graviter offensus, huic remittet, eumque in intimam amicitiam rursus admittet, si ille dixerit se amare Regem supra omnes homines? Certè magis moveretur Rex ad ignoscendum, per insignem subditi humiliationem, vel si subditus Regi vitam servasset, licet id non alio intuitu fecisset, quam ut poenam sceleri suo debitam evaderet. Quis maritus uxori, sæpe jam in gratiam admissæ, & iterum iterumque adulteranti, ignoscet? & tamen Deus millies relapsos, dummodo eos poeniteat, rursus ut amicos & filios complectitur. Unde patet quàm inefficax sit in hoc puncto argumentum petitum ab hominibus ad Deum, ejus miserationes super omnia opera ejus.

193. Instat 2. Tridentinum sess. 6. can. 3. sic habet: *Si quis dixeris sine*
grave

præveniente Spiritus Sancti inspiratione atque ejus adjutorio, hominem credere, sperare diligere, aut poenitere posse sic oportet, ut ei justificationis gratia conferatur: Anathema sit. Ubi fidei, spei, & dilectioni subjungit poenitentiam tanquam ex illis fontibus promanantem. In eodem Can. asserit P. Lupus pag. 10. definiri quòd proxima & sufficiens dispositio in Sacramento debeat esse charitas.

Resp. cum Andrea Vega, ex illo Canone nullo modo colligi posse, dilectionem Dei debere antecedere justificationis gratiam, sed solum, quòd ad sufficientem poenitentiam, quæcumque illa sit, opus sit inspiratione Spiritus Sancti, ut manifestum fiet dictum Canonem legenti. Imo staret veritas hujus Canonis, licet ad justificationem nullus requireretur dolor de peccatis, sed tantum alius quicumque actus supernaturalis, v.g. solus amor proximi &c. Quod ibidem addit ex Tridentino, quòd omnis poenitentia debeat esse tristitia secundum Deum, non plus urget: dicimus enim nostram attritionem esse tristitiam secundum Deum.

S. 5.

Quintum Argumentum.

194. **P**OENitentia salutaris debet aliquo modo averfari peccatum ut est offensa Dei, juxta Tridentinum sess. 14. cap. 1. Atqui in odio peccati, ut est Dei offensa, intrinsecè & inseparabiliter includitur amor benevolentiae erga Deum. Ergo poenitentia salutaris intrinsecè & inseparabiliter includit amorem Dei.

Resp. ad Majorem, Tridentini hæc esse verba: *ut perveritate abjella & emendata, tantam Dei offensionem cum peccati odio & pio animi dolore detestarentur.* Ac proinde non habet particulam reduplicativam ut vel tanquam, in quo tamen ponitur tota vis argumenti. Porro quis non videat, in idem prorsus recidere, sive quis dicatur detestari peccatum contra Deum factum, sive quo Deum mortaliter offendit, sive detestari tantam Dei offensionem? Sensus ergo verborum Tridentini est, quòd debeat dolere, quòd Deum ad indignationem & iram provocaverit; hoc autem facere potest tam ex motivo spei aut metus, quam ex motivo amoris, & ex eodem motivo detestari & odisse peccatum tanquam illius in Deo iræ seu indignationis causam, ex qua infligendæ sint poenæ gehennæ, quas timet.

Ad Minorem Resp. dissidere inter se Auctores, an detestari peccatum ut est offensa Dei, necessariò includat amorem amicitiae erga Deum, quos tamen puto solummodo in voce dissidere, ut statim videbimus. Cæterum in

hanc rem frustra adferuntur Auctores nostræ sententiæ quoad præsens punctum in diversa abeunt. Nam qui ex his concedunt detestari peccata, quatenus Dei offensæ sunt, involvere amorem; negabunt talem detestationem peccati requiri in Sacramento; qui verò asserunt non includi amorem amicitie, facile admittent necessariam esse detestationem peccati ut offensæ Dei est. Porro dum ex his assumitur illa propositio; Pœnitentia debet detestari peccatum ut offensæ Dei est; ex illis verò: atqui odium peccati ut offensæ Dei est includit amorem; contra neutram partem quidquam solidè concludetur.

195. Ut autem melius intelligatur an & quomodo attritus vel contritus detestetur peccatum, ut offensæ Dei est

Notandum quòd diversa detur peccati detestatio & odium.

1. Enim potest quis detestari peccatum commissum v. g. luxuriam aut ebrietatem merè, quia fuit sibi causâ morbi per se ex tali peccato provenientis. Hic detestatur quidem illos actus, qui peccatum sunt & Dei offensio, sed merè materialiter, & cum nullo ordine aut respectu ad Deum: sed & detestaturus si illæ actiones non essent à Deo prohibite aut male: unde nulla ratione dici potest detestari peccatum quatenus est contra Deum, aut hujus offensæ.

196. Secundò alius detestatur peccatum, quia per hoc Deum provocavit ad iram & indignationem talem, vi cuius velit cum in æternum damnare, quod malum quia timet, dolet se Deum offendisse seu contra Deum peccasse. Hic non ita materialiter detestatur id, quod est offensæ Dei seu peccatum contra Deum, quàm faciebat is de quo num. præcedente; sed aliquo modo prout Deum respicit tamquam justum, & punire potentem ac puniturum gehennâ; licet non detestetur ex amore Dei propter se dilecti, ac proinde vero sensu dici potest, quòd talis peccatum contra Deum commissum, sive offensionem Dei detestetur quatenus contra Deum est, & hujus offensæ. Hoc sensu rectissimè intelliges illos omnes, qui asserunt debere peccatorem detestari peccatum, quatenus Dei offensæ est. Imo sic explicari debent, si iidem nobiscum teneant attritionem ex metu sine ullo actu amoris amicitie sufficere in Sacramento.

197. Tertiò denique potest aliquis detestari peccatum quatenus Dei offensio est, hoc sensu, quatenus est læsio & suo modo malum Dei ibi sistendo; & hæc ratione intellige illos, qui dicunt in detestatione peccati quatenus offensæ Dei est necessariò involvi amorem amicitie erga Deum.

198. Porro quia auctor Quodlibeticæ hic primo loco nobis opponit verba Andreæ Vegæ ex libro 6. cap. 30. *Qui Deum denegant nostris peccatis offendi, nunquam verè ad ipsius gratiam perveniunt, nisi & de ipsis doleant, quatenus offensa illius fuerunt, & amore in ipsum redeant à quo se mali per ea averterunt.*

Quia

Quia inquam, huic pro sua sententia adfert Auctorem, operæ pretium fore duxi, ex illo ipso ostendere, quod per detestationem peccati ut est offensa Dei, non intelligat aliud, quàm quod nos intelligimus num. 196, & per amorem Dei, propositum solum Deum non amplius offendendi, ex quocumque demum motivo illud concipiatur sive spei aut metus, sive dilectionis Dei.

Nam Vega post verba jam relata subjungit. *Non tamen perinde certum est, qualis & quanta debeat esse hæc dilectio Dei, quam necessariam esse affirmamus ad justificationem nostram. Sed cum divina in nos miserationis viscera attentius mecum perpendenda, tuto & indubitanter affirmare nos posse crediderim, eam Dei dilectionem, ad gratiam necessariam esse, & sufficere, quæ satis est, ut de lethalius ejus offensis, doleamus, & mandata ipsius servare proponamus. Et ubi tantum in aliquo affectum deprehenderimus, illum hæc ex parte ad gratiam idoneè se præparasse, minime hæsemus. Neque Sanctos Doctores majus aliquid videre requisisse. Ex neque auctoritate re in tanta loquamur, possumus hoc colligere ex verbis Christi: Si quis diligit me, sermonem meum servabit, & pater meus diliget eum. Hæc verba palam indicant illam dilectionem Christi satis esse, ut diligamur à Patre cælesti, & in ipsius gratia finis, quæ satis est ut sermonem illius servemus.... & si sit ea dilectio Dei super omnia, si non, parum refert, modo sciamus hoc quod planissimum est, quodque omnibus possumus securè tradere, sufficere ad justitiam diligere Deum sic, ut de ipsius offensis doleamus, & mandata illius velimus servare. Ecce quando hic Doctor requirit detestationem peccati ut offensa Dei est, & detestationem ex amore, non intelligit amorem nec affectum alium erga Deum, quàm quo & doleamus de peccatis commissis, & statuamus divina mandata posthac observare. Atqui certissimum est posse peccatorem ex solo motivo metus gehennæ detestari peccata præterita & velle servare omnia Dei mandata, ergo talis detestatur peccata ut sunt offensa Dei, & ex sufficienti dilectione, in sensu quo explicat Vega, Deinde dicit parum referre, sitne ea dilectio Dei super omnia si non; ex quo constat cum non agere de amore quem requirunt adversarii, hi cuius volunt esse debere amorem Dei super omnia.*

199. Verùm quid opus est, id ex eo Auctore per consequentiam deducere, cum id habeamus in terminis ab ipso expressum? lib. 9, cap. 17, pag. 245. ita loquitur: *Tuissima & certissima via nobis data ad justificationem, sunt Sacramenta. Habent enim vel omnia illa, vel ceterè Baptismus & Pœnitentia, ut accedentibus ad ipsa cum quovis dolore de peccatis, & proposito, ea vitandi conferant primam gratiam. Et rursus lib. 13, cap. 24. in responsione ad object. 3. Nul-
lus peccatorum perit, qui ante mortem dolet de suis peccatis propter Deum: Sed idcirco salutem hominum adinvenire dicitur, quibus mortis tempore pœnitentiam ei denegat, quia plerumque per Sacramentum Pœnitentia justificantur, qui alius perirent. Quia absolutio potest primo justificare, videlicet, cum quis sine tali dolore (id est propter Deum)*

Deum) & cum solo dolore de peccatis propter gehennam, vel alia mala evitanda aut propter alias similes causas, ad confessionem accedit. Denique eodem libro cap. 34. pag. 538. Tunc dumtaxat concedendum est, primam gratiam conferri in hoc Sacramento, cum quis dolet de peccatis timore pœnæ imminenti, vel propter mala alia ex illis secuta vel propter turpitudinem ipsorum, vel denique alia quavis ratione, & non quatenus sunt offensa Dei: in quibus ultimis verbis dolorem de peccatis quatenus sunt offensa Dei, sumit juxta explicationem datam num. 197. adeoque aliter quàm intellexerat lib. 6. cap. 30. Unde patet, dolere de peccatis, quatenus sunt offensa Dei, esse indifferens ad significandam vel attritionem vel contritionem, nisi ex aliis adjunctis determinetur ad significandum potius dolorem ex amicitia, quàm ex metu gehennæ, aut contra.

200. Hinc patet, nihil nos urgeri testimoniis, quæ ibidem adfert P. Farvacques ex Tolet, Tappero, Reginaldo Tannero aliisque requirentibus detestationem peccati ut est offensa Dei: explicandi enim sunt eo sensu quem tradidimus num. 196. & quo intelligit Vega. præsertim qui nobiscum sentiunt sufficere dolorem ex metu gehennæ. Unde ut similia testimonia contra nos robur habeant, ostendendum prius est, quòd dolorem de peccato ut Dei offensa est, sumant in sensu tradito num. 197.

§. 6.

Argumentum Sextum.

201. **A**D salutarem pœnitentiam requiritur vera cordis ad Deum conversio, de qua Ezech. 18. *Convertimini ad me* &c. Atqui vera cordis ad Deum conversio non potest obtineri, nisi per amorem benevolentia, ergo. Primam propositionem probat, quia Tridentinum agens de pœnitentia lapsis omnibus necessaria adfert testimonium illud Ezechielis. Probat etiam propositionem alteram, quia illa verba Ezechielis important conversionem, quæ fiat per amorem benevolentia, quo solo certum est potuisse converti Judæos, quos illic Propheta alloquitur.

202. Resp. 1. Si quid hoc argumento probetur, everti quoque sententiam P. Farvacques: nam actus amoris benevolentia, quo solo certum est potuisse converti Judæos, fuit is qui per se justificabat. Adeoque si sensus Tridentini sit ille, quem esse vult hic Auctor, nec sufficiet cum Sacramento amor amicitia imperfectus; hunc enim affirmat se solo non justificare: ex quo patet quàm inefficacia sint similia testimonia petita ex veteri

teri testamento, quæ tamen passim contra nos proferunt adversarii. Quare

203. Resp. 2. negando minorem, & dico dolentem de peccatis ex metu gehennæ, cum proposito servandi omnia Dei mandata, sufficienter converti ad Deum, mente mutari &c. Ad illius probationem Resp. illa verba Ezechielis prout dirigebantur ad Judæos, & simul complectebantur conversionem habitualement, id est, remissionem mortalis ante commissi, importasse sine dubio amorem benevolentiam, & quidem vi sua justificantem. Eadem tamen illa verba prout dirigebantur ad statum novi testamenti, sive prout à Synodo adferuntur, significant indeterminatè vel contritionem per se justificantem, vel aliam contritionem, quæ nonnisi cum Sacramenti susceptione vim illam habet. Et hoc modo respondere coguntur adversarii.

204. Porro quia ille Auctor rursus in hujus argumenti deductione adfert Vegam, ex ipso Vega audiamus, quid de hac conversione, ac mutatione mentis senserit. Ita loquitur lib. 13. cap. 21. pag. 547. *Tunc verissimè mente mutamur, & aliter quàm prius de ipsis cogitamus, cum illa odimus & averfamur, quæ prius placuerunt, & de iis dolemus, de quibus ante delectati sumus.* Et infra pag. 549. *Satis avertitur à suis peccatis, qui de eis vehementer dolet, & ad Deum verè convertitur, quicumque humiliter, & absque complacentia alicujus peccati, misericordiam divinam implorat.* Denique lib. 6. cap. 32. *Christus, dum præcepit Apostolis ut prædicarent Baptismum & baptizarent; adjecit etiam ut docerent servare, quacumque mandavit illis.* Et hinc tendunt multa loca Scripturæ, quibus Deus requirit à peccatoribus, ut se ad illum convertant, ut ipse se convertat ad eos. Sicut enim avertimur à peccatis nostris per penitentiam, ita convertimur ad Deum per propositum servandi mandata illius. Ecce quid sit verè ad Deum converti, nempe proponere servare mandata.

S. 7.

Argumentum Septimum.

205. **F**uit quovis tempore ad impetrandam veniam peccatorum Contritionis motus necessarius: ut constat ex Tridentino sess. 14. cap. 4. sed motus Contritionis aliquam Dei propter se dilectionem requirit. Ergo.

Huic argumento responsum est supra num. 143. in fine & num. 144.

Instat. 1. Requirit Contritionem probat Tridentinum ibidem ex iis Scripturæ locis, quæ nequeunt esse vera, nisi cum aliquo benevolo affectu in Deum: ut ex illo Ezech. 18. *Projicite à vobis omnes iniquitates vestras, in*
quibus

quibus prævaricati estis, & facite vobis cor novum & spiritum novum. Atqui qui solo timore pœnæ à peccato abstinere, non projicit à se omnes suas iniquitates, nec facit sibi cor novum & animum novum: prout constat; quia Judæi solo timore pœnæ à peccatis abstinentes non projiciebant à se iniquitates suas, nec habebant cor novum.

Resp. 1. retorquendo Argumentum, & sub eadem Majore subsumo, atqui qui ex amore Dei imperfecto (qui in sententia Adversariorum non sufficit sine Sacramento) abstinere à peccatis, non projicit à se iniquitates suas, nec facit sibi cor novum &c. ut pater, quia Judæi tali actu non projiciebant à se iniquitates suas &c. ergo nec sufficit attritio ab adversariis assignata. Ecce idem contra ipsos valet, quo nos impetunt.

206. Resp. 2. Ad Majorem illum locum Ezechielis tantum adferri à Synodo, ut probet quod non sufficiat ad veram pœnitentiam nova vita ejusque propositum, sed insuper requiri odium vitæ præteritæ inale actæ. Cum enim dixisset utrumque horum semper fuisse requisitum ad veram pœnitentiam, declarat contra Hæreticos; Hanc contritionem non solum cessationem à peccato, & vitæ novæ propositum & inchoationem, sed veteris etiam odium continere, juxta illud: Projicite à vobis iniquitates vestras &c. Statuit ergo Synodus contritionem genericè sumptam necessariò complecti hæc duo, odium vitæ præteritæ, & propositum novæ: quod utrumque cum involvat nostra attritio, non video, quid sub illa Majore subsumi possit, quod vel in speciem nos urgeat. Dico ergo attritum projicere à se iniquitates suas in sensu Tridentini, in quantum detestatur peccata commissa, eaque etiam habitualiter abjicere, seu eorum remissionem accipere, accedente insuper Sacramento: facere verò sibi cor novum & animum novum per propositum & inchoationem vitæ novæ. Ita hoc intellexit Andreas Vega lib. 6 cap. 32. in illa verba: Facite vobis cor novum &c. ita loquitur. Certè cor novum & spiritum novum habes, qui cum prius in transgressione divinatorum mandatorum, suæ immemor salutis permanseris, jam novo spiritu concepto, tota animi devotione libenter, promptè & constanter proponis illa servare. Atque ut nemini esset ambiguum, hoc esse cor novum nobis facere & spiritum novum, cum per eundem Prophetam dixisset Dominus, dabo vobis cor novum & spiritum novum; adjectum est continuò: & faciam ut in præceptis meis ambuletis, & judicia mea custodiatis & operemini: & cætera, quæ eodem spectant. Eodem modo id exposuit Joannes à Daventria pag. 31. in fine.

207. Instat 2. Qui detestatur peccata ex solo timore pœnæ, adhuc ambulat in vetustate litteræ, non pertinet ad legem novi testamenti; &, ut loquitur pag. 64. timendum est ne permixtio fiat & confusio quædam utriusque testamenti. & similia

Probat ass. quia hæc inter utrumque testamentum est differentia, quod vetus sit timoris, novum autem amoris.

Resp.

Resp. cum Augustino lib. de Moribus Eccles: cap. 28. tam timorem, quam amorem esse in utroque testamento: *Utrumque*, inquit, *in utroque testamento est; praevalet tamen in veteri timor, amor in novo.* Cor ergo detestans peccata ex timore poenae potius spectet ad vetus testamentum, quam ad novum? unde autem lex vetus lex timoris vocatur, quia retrahebat homines à malo poenarum temporalium comminationibus, ut loquitur Driedo Tract. 4. de captivitate & redemptione generis humani cap. 2. parte 7. pag. 105. versâ. Adde si denominatio legis timoris & amoris desumenda sit ex dolore requisito ad justificationem peccatoris, jam lex vetus potius dicenda erit lex amoris etiam juxta adversarios, cum illis fatentibus in lege gratiae requiratur amor minus perfectus, quam requiretur in lege veteri.

§. 8.

Octavum Argumentum.

Dolor cum Sacramento sufficiens debet positive excludere voluntatem peccandi; atqui hoc non facit attritio servilis. Ergo.

Huic argumento responsum est supra toto cap. 5. ubi evidenter demonstravimus, posse timore gehennae positive excludi omnem prorsus voluntatem peccandi.

§. 9.

Nonum Argumentum.

208. **A**ttitio salutaris debet concipi ex illo timore quo utiliter concussi Ninivitarum plenam terroribus poenitentiam egerunt & misericordiam à Domino impetrarunt: atqui timor ille Ninivitarum non fuit destitutus omni benevolo in Deum affectu. Ergo.

Quàm efficax autem hoc argumentum arbitretur Auctor Quodlibeticæ, declarat, cum subdit: ab aliis tractatum est hoc argumentum, neque scio aliquid responsum esse hactenus, quod Lectori curioso, vel apparenter satisfaceret. Nam neque ipsi qui negant requiri amorem in attritione, audebunt asserere, Ninivitas solius timoris servilis beneficio misericordiam à Domino impetrasse. Quare cum non videam quznam propositio in præsententi argumento vocari possit in controversiam, non est quod pluribus

huic argumento comprobando insistam. Hæcenus Auctor Quodlibeticæ.

209. Resp. 1. & sub eadem illa majore propositione subsumo : atqui timor ille Ninivitarum non fuit destitutus dilectione Dei per se justificante. Nam neque Adversarii audebunt asserere Ninivitas solius amoris imperfecti, & non nisi in Sacramento sufficientis beneficio misericordiam à Domino impetrasse. Ergo. Quæro ab illo Auctore, videatne quæ propositio in hoc argumento negari possit ? Si affirmet videre se, eadem operâ videt, quid negari possit in suo. Si non videt, necesse est, ut fateatur in Sacramento requiri contritionem vi sua justificantem.

210. Resp. 2. Majorem illius argumenti negabit P. Lupus, cum enim asserat non semper inchoari debere pœnitentiam Baptizatorum à timore, sic ut soliti Deum amare, si in mortale lapsi sint, non raro timorem transiliant, & inchoent ab amore; fieri etiam debet amorem in casu non fore semper tam perfectum, ut se solo justificet, adeoque poterit tantum esse attritio; hanc autem fore sufficientem cum Sacramento non negabit; ergo juxta illum falsum est, quod attritio salutaris debeat concipi ex illo timore quo concussi sunt Ninivitz. Porro cum P. Faræacques pag. 13. videatur approbare sententiam P. Lupi quoad punctum jam dictum, etiam hic auctor negare debebit Majorem sui argumenti.

Similiter Auctores nostræ sententiæ negabunt eandem propositionem; nam juxta hos necesse non est ut attritio salutaris concipiatur ex timore eversionis civitatis, ut per se manifestum est; ergo concipi non debet ex illo timore, quo utiliter concussi sunt Ninivitz. Neque etiam concipi debet ex ullo timore; sed sufficit ad salutarem pœnitentiam, seu attritionem si concipiatur ex desiderio vitæ æternæ.

211. Resp. 3. negando similiter Minorem. Ad hujus probationem, quod nempe Ninivitz non impetrarint misericordiam per solum actum timoris servilis: Resp. si per misericordiam illic cum communi intelligamus justificationem, admitto hanc illos non impetrasse solo actu timoris; sed quid hoc quæso contra nos? nam neque per amorem imperfectum impetrarunt juxta Adversarios. Aliud enim est quærere, qualis fuerit ille timor, quo utiliter concussi Ninivitz pœnitentiam impetrarunt; aliud, quis fuerit pœnitentiæ actus, per quem peccatorum veniam impetrarunt. Hic enim fuit actus amoris per se justificantis, qui timori debebat superaddi. Sic nec jam sola attritione ex timore peccator justificatur, sed unâ cum susceptione Sacramenti. Unde sicut timor perpulit Ninivitas ut assumerent medium tunc temporis unicum ad impetrandam misericordiam, quod erat contritio vi sua justificans; ita & jam timor gehennæ facit, ut homo adhibeat, quod ulterius ad justificationem requiritur, nempe ut vel Sacramentum suscipiat, vel si hujus desit copia, pergat ad actum contritionis.

212. Quod si forte id, quod P. Lupus pag. 39. putat de Davide, transferat P. Farvacques ad Ninivitas; quod nempe extraordinario Dei favore justificati fuerint sine actu contritionis lege statâ per se justificantis; eodem fundamento asseram solâ attritione ex timore pœnæ eos misericordiam impetrasse.

§. 10.

Argumenta quædam ex Tridentino conglobata.

Arguit 1. Tridentinum sess. 6. cap. 6. & sess. 14. cap. 1. inter præparationes ad justificationem requiritas illam recenset, quæ continetur veròis D. Petri Act. 2 *Pœnitentiam agite & baptizetur unusquisque vestri*. Atqui his verbis non continetur solâ præparatio per motum timoris; ergo &c. Minorem probat, quia Israëlitarum, quos illic D. Petrus alloquitur erant compuncti spiritu timoris proposito sibi die Domini magno; & nihilominus D. Petrus requirit ab illis pœnitentiam; ergo diversam ab illo spiritu timoris.

Resp. ut hoc argumentum habeat aliquid roboris, probari deberet 1. quod Israëlitarum compuncti fuerint spiritu timoris; nam illic tantum dicitur, quod compuncti fuerint corde; qui autem habet detestationem peccatorum ex amore Dei, sine dubio est compunctus corde. Imo cum proxime ante præmiserit ibi Petrus, quod Christum occidissent innocentem, poterat quæ esse compunctio ex commiseratione erga innocentem occisum. 2. probari insuper deberet quod habuerint timorem qualem nos requirimus; neque enim sufficit timere, ut dictum est num. 13. sed requiritur ut ex timore detestetur peccata omnia commissa, & decernat omnia Dei mandata servare, adeoque & in casu suscipere Baptismum. Quæ quamdiu non probantur, nihil concludit argumentum.

214. Secundò addert ex sess. 6. cap. 7. *Fides quæ per charitatem operatur.*

Responsum ad hoc est num. 186. Hic quæro, cum ibi dicatur nec circumcisionem nec præputium aliquid valere, sed fidem quæ per charitatem operatur, an inquam censeat, nullum actum valere, nisi qui fiat ex motivo Dei propter se dilecti? Hoc ut arbitror non admitteat.

215. Tertiò opponit ex sess. 6. cap. 10. *Hoc verò iustitiæ incrementum petis Ecclesia, cum orat: da nobis fidei, spei, & charitatis augmentum*; ergo in homine justificato præcessit etiam charitas, utique actualis, agit enim Synodus de operibus; *Videris quoniam ex operibus justificatur homo, & non ex fide tantum.*

Resp. illic agi de Fide, Spe, & Charitate non actuali, sed habituali, ut manifestum fiet vel obiter illud caput inspicienti, nam titulus capitis est *De acceptæ justificationis incremento*, & in decursu capitis dicitur, homines per

observationem mandatorum Dei & Ecclesiæ, in ipsa iustitia accepta crescere ac magis justificari, & tandem subjungit. *Hoc verò iustitia incrementum perit Ecclesia dum orat: da nobis Fidei, Spei & Charitatis augmentum.* Ubi certum est agi de habitu charitatis, seu de justificatione, de qua loquitur titulus: nec ad aliud fieri mentionem operum, quàm ut ostendatur per observationem mandatorum Dei & Ecclesiæ acceptam justificationem augeri. Adde quòd habitus dicatur accipere incrementum, non autem actus. Hinc mihi persuadeo illud argumentum datà operà in turbam conjectum, quòd satis videretur non urgere.

216. Quarta opponit ex sess. 6. c. 11. *Qui sunt filii Dei, Christum diligunt;* sed qui suscipit Sacramentum fit filius Dei, ergo Christum diligit.

Resp. sub illa Majore eodem jure subsumeret: Sed justus non cogitans jam de Deo, vel delirans vel dormiens, aut etiam peccans venialiter est filius Dei, ergo Christum diligit. Eodem quoque jure diceret; qui sunt Christiani continentur sua peccata, ergo qui sit Christianus confitetur sua peccata, Dico ergo illic agi de dilectione, quæ sita est in observatione mandatorum, seu in non peccando: certum est autem sapissime servari mandata sine dilectione Dei, de qua disputamus. Et licet eo loco ageatur de actu charitatis, ut ex illo aliquid inferri posset, assumi deberet hoc modo; nullus est filius Dei, nisi qui actu diligit, ergo nemo fit filius Dei, nisi qui diligit: sed antecedens hoc falsum est.

217. Quinto: Tridentinum ibidem; qui operando mercedem intuentur æternam, illud debent spectare, ut inprimis glorificetur Deus; ergo qui fugiunt gehennam debent spectare ut inprimis glorificetur Deus; hoc autem involvit amorem Dei propter se.

Resp. Tridentinum non dicere quòd spectare debeant ut glorificetur Deus: sed tantum definire, quòd non peccent justi, dum in suis operibus, cum hoc, ut inprimis glorificetur Deus, mercedem quoque intuentur æternam, ex quo nihil contra nos inferri potest. Cæterum ostendit Tridentinum non esse necessarium simul spectare, ut glorificetur Deus, dum Can. 31. qui Canon citato Capiti respondet, simpliciter definit, non peccare justum, dum intuitu æternæ mercedis bene operatur.

218. Sexto arguit ex ejusdem sess. Can. 8. *Si quis dixerit gehenna metum, per quem ad misericordiam Dei de peccatis dolendo confugimus, vel à peccando abstinemus, peccatum esse aut peccatores peiores facere: Anathema sit:* Ubi Synodus non dicit propter quem, sed per quem, ut significet gehennæ metum esse quidem principium extrinsecum de peccatis dolendi, non autem causam finalem.

Resp. Quando illud *per* conjungitur alicui, quod potest esse motivum, passum usurpari pro *propter*, seu pro causa finali; neque id negare potest hic Auctor, cum eodem illo paragrapho ipse ita utatur: nam pag. 45. post medium

dium sic usurpat, dum ait in verbis D. Petri : *Agite poenitentiam* &c. non contineri solam præparationem per motum timoris : ubi si illud *per* non significet *propter*, falsa est juxta ipsum illa propositio. Quod autem in Canone 8. *per* sumatur pro *propter*, colligitur ex *sess.* 14. Cap. 5. Ubi definitur, quod dolor, qui paratur considerando æternæ damnationis incursum, non faciat hominem hypocritam & magis peccatorem, nec esse dolorem coactum &c. quo loco non addit vocem *per* : & agit Contra Lutherum utens ipsius verbis ex sermone de Pœnitentia : quo loco non aliud dicit, quàm quod dolor, qui pro motivo habet timorem, faciat hominem hypocritam & magis peccatorem. Vide quæ diximus ad similem evasionem num. 145.

219. Septimò denique *sess.* 14. cap. 2. Ad effectum poenitentiae salutaris pervenire nequaquam possumus, *sine magnis nostris fletibus, ut merito Pœnitentia laboriosus quidam Baptismus à Sanctis Patribus dictus fuerit.* Quid autem opus est magnis fletibus, si sufficit dolor ex timore gehennæ proveniens?

Resp. 1. Quid opus est magnis fletibus, si sufficit dolor ex amore proveniens? cum grave aut laboriosum non sit amare, sed prorsus suave & leve, ut ipsemet probat pag. 62. in fine & pag. 63.

Resp. 2. Quid opus est verba adferre detritæ, quando toto contextu fideliter ob oculos posito, tota objectio in fumum abit? Sic autem dicto loco habet Tridentinum : *Alius præterea est Baptismi & Pœnitentiae fructus. Per Baptismum enim Christum induentes, novæ prorsus in illo efficiuntur creatura, plenam & integram peccatorum omnium remissionem consequentes : ad quam tamen novitatem & integritatem per Sacramentum Pœnitentiae sine magnis nostris fletibus & laboribus divina id exigente iustitia pervenire nequaquam possumus : ut merito Pœnitentia laboriosus quidam Baptismus à SS. Patribus dictus fuerit.* Agit Tridentinum tum in verbis citatis, tum toto illo capite de differentia inter Sacramentum Baptismi & Pœnitentiae : quoad dolorem autem requisitum ad utrumvis Sacramentum, nulla est differentia etiam juxta Adversarios. Assignat ibi Synodus expressè diversitatem fructus seu effectus utriusque Sacramenti, quod nempe Baptismus faciat hominem novam prorsus creaturam, delendo omnia peccata quoad culpam & pœnam, id autem non faciat Pœnitentia, post hanc enim in eum finem assumenda sunt opera tristitiae & laboris.

CAPUT X.

Satisfit aliis argumentis.

220. **O** Bjic. præterea 1. Tridentinum sess. 14. cap. 4. asserens contritionem imperfectam ex metu gehennæ ortam, ad gratiam in Sacramento impetrandam disponere; non addit quòd disponat proximè, adeoque intelligi potest de dispositione remota, quatenus disponit ad actum alium, qui cum Sacramento sufficiat.

Hoc argumentum obiter indicat P. Faracques, additque plerosque antiquos scholasticos Tridentino viciniore, illa verba interpretatos de dispositione remota; ceterum voluisse se illud argumentum indicare, ne quid desideretur; sibi tamen necesse non esse ad illud recurrere. E contra P. Lupus tamquam indubitatum supponit, eo loco Tridentini agi de dispositione proxima & sufficiente.

221. Antequam objectioni respondeam; præmitto, mirum mihi visum esse, quòd hoc argumentum tamquam specialiter contra nostram sententiam faciens, suggerere voluerit Auctor Quodlibeticæ. An fortè non vidit hoc argumentum æquè contra se facere? id tamen apertissimum est, quòd breviter ostendo: juxta hunc Auctorem, quando Tridentinum dicit; *illam verò contritionem imperfectam, quæ attritio dicitur ... si voluntatem peccandi excludat &c.* intelligitur dolor qui sit ex aliquo Dei amore, nempe tali, quicumque ille sit, qui per se sine Sacramento non justificat; ergo si Synodus, dum dicit illam contritionem imperfectam seu attritionem in Sacramento ad gratiam disponere, intelligi possit aut debeat de dispositione remota, requireretur alia insuper dispositio, quæ proxima sit & sufficiens. Hæc autem juxta illum non poterit esse alia, quàm amor Dei per se justificans; cum omnis alius amor Dei tantum sit attritio, adeoque tantum dispositio remota. Ex quo sequitur Sacramentum Pœnitentiæ inutile fore ad conferendam primam gratiam. Vidit hoc credo P. Lupus, ac propterea indubitanter pronuntiavit, hic agi de dispositione proxima & sufficiente. Nunc ad argumentum.

222. Resp. non posse intelligi de dispositione remota. Ratio est

1. Quia Tridentinum hoc cap. 4. agit de contritione, quæ est pars Sacramenti Pœnitentiæ; præmiserat autem ejusdem sess. cap. 3. hac ratione aliquid dici partem pœnitentiæ, *quatenus in pœnitente ad integritatem Sacramenti, ad plenamque & perfectam peccatorum remissionem ex Dei institutione requiritur.* Atqui talis non erit attritio, si tantum disponat remotè & requiratur alia proxima, nempe amor Dei; hic enim ultimus actus independentè à priori,

priori, & illo inposito, habebit id, quod Tridentinum requirit in contritione prout est pars penitentiae.

223. Secundò: Tridentinum initio hujus sess. spondet exactiorem, pleniorē, ac perspicuam de hoc Sacramento definitionem; qualem nullo modo traderet, si scilicet, quem dicit disponere ad gratiam in Sacramento impetrandam, non disponderet proximè, sed remotè dumtaxat, & alius insuper requireretur scilicet, qui qualis sit he verbo quidem indicaret, sed nobis relinqueret divinandum: imò nec moneat, hanc tantum esse dispositionem remotam, Quod quid esset aliud quàm fidelibus ansam præbere periculosè errandi in re tanti momenti?

224. Tertiò: dum dicit attritionem disponere ad gratiam in Sacramento impetrandam, loquitur eodem modo, quo sess. 6. cap. 6. ubi dicit: disponuntur autem ad ipsam justitiam dum credentes timore concutuntur, sperant, ac Deum diligere incipiunt, proponentes suscipere Baptismum &c. Atqui hic loquitur Synodus de dispositione proxima & sufficienti; ergo etiam sess. 14. cap. 4. de eadem dispositione loquitur.

225. Quartò: quia alias Synodus loquens de attritione perperam faceret hanc oppositionem: *Et quamvis sine Sacramento Penitentia per se ad justificationem perducere peccatorem nequeat, tamen cum ad Dei gratiam in Sacramento Penitentiae impetrandam disponit.* Nam illa attritio per se non posset magis perducere ad justificationem in Sacramento, quàm extra, neque magis disponderet ad gratiam impetrandam in Sacramento, quàm extra illud; cum etiam disponat remotè ad justificationem extrasacramentalem.

226. Instabis. Tridentinum eodem cap. 4. sess. 14. subjungit: *Hoc enim timore utilis consilii Niniuita ad fons prædicationem plenam terroribus penitentiam egerunt, & misericordiam à Domino impetrarunt.* Atqui non impetrarunt misericordiam immèdiatè per actum timoris, sed tantum mediatè. Ergo

Resp. negando consequ. Nam illud de Niniivitis non adfertur ad ostendendum quo modo in Sacramento obtineatur justificatio; cum hic modus sit juxta omnes diversus ab illo, quo misericordiam impetrarunt Niniivitæ. Adducitur ergo ad probandum, quòd metus poenæ à Deo infligendæ sit actus bonus & utilis, non faciens hypocritam & magis peccatorem, quod ibidem Synodus declarat, & uno dictionis filo subjunxerat disponente ad gratiam in Sacramento. Quòd autem adferatur ad probandum bonitatem actus, manifestum sit ex eo, quòd Synodus statim addat: *Quamobrem falsò quidam calumniantur Catholicos scriptores, quasi tradiderint Sacramentum Penitentiae absque bono motu susipientium gratiam conferre.*

227. Objic. 2. ex institutione Apostolorum debebant baptizandi profiteri se credere non tantum Deo, sed etiam in Deum; atqui credere in Deum, juxta Augustinum, est credendo adhærere ad bene operandum ope-

ranti Deo, est Christum diligere, est sperare, diligere &c. ergo baptizandus (& eadem est ratio de absolvendo) debet Deum diligere. Ita Auctor dissertationis dogmaticæ pag. 12. & pag. 19.

Resp. ut hoc argumentum vim habeat, debere probari, quodd Augustinus per diligere intelligat dilectionem Dei propter se & super omnia; & quodd velit talem dilectionem necessariò adesse debere quoties quis elicit actum fidei, ut possit dici credere in Deum, adeò ut, nisi adsit actualis Dei dilectio, falsò & mendaciter dicturus sit; Credo in Deum. Hoc ubi probatum fuerit, negabo baptismales professiones illud *Credere in Deum* intelligere in sensu Augustini, dicamque illud sumere in alio sensu passim apud fideles usitato. Quis enim unquam existimavit, non posse fideles, sive peccatores sint sive iusti, verè dicere, Credo in Deum; nisi, dum eliciunt actum fidei, habeant simul actum dilectionis Dei super omnia? An fortè debebit Ecclesia alterum symbolum concinnare, in quo omnia ponantur in dativo, Credo Deo Patri, Filio & Spiritui Sancto, quod tum in sacro tum alibi recitent illi, qui simul non eliciunt amorem actualem? Porro sensus Augustini tantum est, vel quodd hoc sit perfectissimè credere in Deum; vel ut suum, quodd credere in Deum, sit religionem Christianam amplecti & proponere illius leges, inter quas una est dilectio Dei, observare, dum urget præceptum;

228. Objic. 3. ex eodem pag. 13. non absolvitur nisi resuscitatus; ergo debet prius diligere; antecedens probat ex Augustino aliisque.

Resp. Patres, dum dicunt non absolvi à sacerdote nisi resuscitatum, intelligere resuscitationem per gratiam actualem, quâ Deus eos movet & præparat ad conversionem: nam apud Catholicos certissima est sententia non debere peccatorem accepisse remissionem peccatorum & gratiam sanctificantem, antequam absolvi possit.

229. Objic. 4. ex eodem pag. 89. si sufficiat cum Sacramento dolor ex metu gehennæ, etiam patibuli, aut regii gladii metus eadem dignitate & viribus possèbit.

Resp. negando ass. quia timor supplicii humani non excludit voluntatem peccandi; id autem facit timor gehennæ: demonstratum id est cap. 5.

230. Objic. 5. *Qui non diligit manet in morte* 1. Joan. 3.

Resp. illic agi de charitate fraterna; nam subiungit: *qui odit fratrem suum, homicida est* &c. non ergo agitur de actu positivo amoris, sed ut non adsit odium fratris vel injuria illi illata: quo sensu etiam intelligi potest, qui non diligit Deum, hoc est, qui non servat ejus mandata. Porro similibus non immoror, quia illa loca scripturæ passim reperies explicata apud obvios Auctores: sic ut necesse non sit hic repetere. Videri potest Rossensis pag. 382. ubi locum Joannis *Charitas foras mittit timorem*: & *Timor pœnam habet*, explicat de charitate fraterna,

CAPUT XI.

*Quæ fuerit mens DD. hujus Academia de attritione
ex metu gehennæ.*

EXimius P. Farvacques in sua ad Quodlibeticam appendice ostendere conatur antiquam hujus Academiae doctrinam nostræ sententiæ adversari. Porro licet non exprimat eam sibi favere, id tamen intendit aut intendere debuit, ne aliàs æquè ipse ac nos convincatur ab hujus Academiae placitis recessisse, & per consequens fateri cogatur, nullam Academiae in hac parte habendam esse rationem.

Operæ pretium fore duxi examinare & ostendere, multos ex iis, quos contra nos adfert, nobis patrocinari, alios tam ipsi quàm nobis repugnare, vix unum alterumve habere sibi faventem. Tum denique adferam illos qui nostræ sententiæ patrocinantur.

§. 1.

Ad Articulos Universitatis & Adrianum VI.

231. **P**rofert primo loco contra nos Articulos 3. & 4. editos à Facultate anno 1544.

Tertius est: *Pœnitentia Sacramentum complectitur Contritionem, Confessionem & Satisfactionem.*

Quartus vero: *Contritio est dolor de peccatis propter Dei offensam susceptus, cum proposito confitendi & satisfaciendi: non autem (ut quidam hoc sæculo perniciosè docent) terror conscientie propter apprehensum gehennæ supplicium peccatis debitum. Preparat tamen hic terror & gehennæ metus ad veram animi Contritionem.*

Non video quid hîc sit, quòd monstret Facultatem aut favisse adversariis aut nobis repugnasse. Utrumque enim articulum quoad omnes partes in nostra sententia lubens admitto. Vim ponit P. Farvacques in duobus; quorum primum est, quòd articulus habeat, *Propter Dei offensam.*

Hoc nihil omnino facere contra nos licet satis constet ex num. 196: id tamen ulterius probo ex duobus hujus Academiae Doctõribus:

232. Primus est Ruardus Tapperus, quem hisce articulis condendis interfuisse vix videtur posse dubitari. Hic autem pag. 110. col. 2. relato prius hoc quarto Academiae articulo subiungit: *Complectitur autem Contritio in articulo omnem disciplinam perfectam & imperfectam.* Præmiserat autem ibidem Tapperus imperfectam contritionem esse, quæ oritur ex timore poenarum

zternarum, hancque à Scholaſticis propriè vocari attritionem. Ergo juxta Tapperum definitio Contritionis tradita à Facultate etiam competit dolori de peccatis ex metu gehennæ: adeoque talis dolor eſt *propter offenſam Dei*, unde ulterius patet Tapperum planè repugnare Auctori Quodlibeticæ, qui ubicumque reperit *offenſam Dei* vel *propter offenſam Dei*, in illis verbis cenſet contineri amorem benevolentix ſuper omnia erga Deum.

233. Alter eſt Joannes Molanus in Compendio Theol. præſt. Tract. 1. de Pœnit. cap. 7. ubi adferens dictam Facultatis definitionem, aſſerit ab ea non diſcrepare hanc deſcriptionem Tridentini; *Animi dolor ac deſectatio de peccato commiſſo cum propoſito non peccandi de cætero*. Atqui oſtendimus ſupra num. 144. & per ſe manifeſtum eſt, in definitione à Tridentino tradita nihil omnino contineri de motivo amoris Dei propter ſe dilecti, ergo nec de hoc motivo loquitur Facultas juxta Molanum; aliàs plurimùm inter ſe diſcreparent illæ deſcriptiones.

234. Vim inſuper ponit in his articuli verbis, *præparat tamen hic terror & gehenna metus ad veram animi contritionem*. Verùm neque in hoc quidquam dicit Articulus, quod in noſtra ſententia veriſſimum non ſit. Statuit articulus pœnitentiam non eſſe terrores conſcientiæ ob apprehenſum gehennæ ſupplicium: id nos non admittimus modò, ſed perpetuò inculcamus, quòd terror ſeu metus gehennæ non ſit vera pœnitentia, ſed quòd requiratur ut ex illo metu peccator progrediatur ad deteſtanda peccata præterita, & ſtatuendum ſutura non admittere. Vide diſta num. 13. Timor tamen ille, ut rectè fert Articulus, præparat ad veram pœnitentiam, id eſt prout nos cum Articulo docemus, ad dolorem de peccatis præteritis, & propoſitum conſtendi ac ſatiſfaciendi.

235. Aliud ejusdem Facultatis judicium proferit ex juſtificatione cenſuræ in qua cap. 12. num. 165. ſic loquitur Facultas. *Neque illuminatio duntaxat ſuſſoria, neque metus ſeu terror, etiam poenarum poſt hanc vitam luendarum, inſufficiens ad inchoandam converſionem, ſed præterea gratia opus eſt, qua cor ſic motum atque percuſum inſeſcat atque emolliat: videlicet illa accedat operatio neceſſe eſt, qua præſtatur à Divino illo Sanctoque Spiritu, cum dicitur: Riga quod eſt aridum, ſteſce quod eſt rigidum, ſana quod eſt ſancium, rege quod eſt devium. Etenim quidquid intus eſt, quod ſuadet ſanctum & non perſuadet; allicit non adducit, terrore concutit, non amore afficit.*

236. Antequam huic teſtimonio reſpondeam, quia credo plerique ignotum, quænam ſit hæc juſtificatio, & cujus Cenſuræ utile fuerit id prius exponere: Præterito ſæculo non parva exorta fuit controverſia nos inter & Facultatem Lovaniënſem circa quaſdam, præcipuè de gratia & prædeſtinatione, ſententias, quas noſtræ Societatis Profeſſores in ſcholis tradiderant, & etiamnum docemus. Cumque noſtri contra adverſæ partis objecta, eas ſententias tamquam maximè ſanas tuerentur, Facultas eas tamquam offenſivas, peri-

periculosas, & ut accedentes ad varios hæreticorum errores &c. gravi censura perstrinxit anno 1586. Ad sedandas has controversias reprimendamque usurpam censurandi licentiam, Octavius Episcopus Calatinus Apostolicus in hisce partibus Nuntius, edidit, ac Lovanii 10. Julii 1588. promulgavit Mandatum Apostolicum jussu S. D. N. Sixti V. In quo sententias controversas vocat *sanæ doctrinæ articulos*, ac deinde ita loquitur: *Statuimus & ordinamus ac per Apostolica scripta mandamus, ut nemo cujuscumque ordinis, gradus, conditionis, vel dignitatis existat..... de his assertionibus controversis in alterutram partem ita disputare, rationibus vel Doctorum auctoritate unius partis assertiones confirmare, alteriusque refellere aut impugnare; vel cujusvis pietatis aut necessitatis prætextu, de his loqui, SCRIBERE aut dicere in posterum attente, ut ausu temerario eas hæreticas, suspectas, offensivas, & periculosas esse, & quædam asserunt alienius hæresis labe aut SUSPICIONE contaminatum iri, donec auctoritate Apostolica maturè definita fuerint; affirmare præsumas. Quod si quis contra feceris, sicut se excommunicationis lætæ sententiæ pœnam (à qua nisi in mortis articulo, constitutus à nullo præterquam à Romano Pontifice valeas absolvi) incurrisse, & alias pœnas, nobis, nostroque arbitrio reservatas subituras.*

Concinnavit deinde Facultas *Justificationem sensu defensionem censura suæ*, & absolvit 9. Septemb. 1588. eam tamen, Mandatum Apostolicum, & adjunctam excommunicationem reverita, non impressit, nec publicavit. Donec tandem elapsis à facta justificatione annis quinquaginta quatuor hoc est anno 1641. aliquis vel aliqui, nec fulmine excommunicationis territi, ac Mandatum Apostolicum flocci facientes, eandem justificationem typis, ut prætextitur, Parisiensibus evulgarunt Hæc putavi breviter insinuanda. Nunc ad objectionem

237. Ref. Hoc capite 12. Facultatem agere de gratia sufficienti, asserereque illos, qui non consentiunt, non habere gratiam sufficientem: ac deinde pergit ostendere, ad inchoandam conversionem, nec illuminationem suavoriam, nec timorem &c. sufficere, nisi adlit gratia divina, quæ cor emolliat; quia nempe omnia, quæ sunt sine gratia, alliciunt, sed non adducunt; terrore concutiunt, non amore afficiunt. Quæ omnia non video quid faciant ad punctum, de quo hic disputamus; nisi fortè velit P. Farvacques, quod vox *amor* nullam aliam significationem admittat nisi amoris amicitie erga Deum super omnia, quod proculdubio falsum est. Quis enim ignorat, dari amorem virtutis & honestatis creatæ, dari amorem vitæ æternæ &c. qui bonus sit & ex gratia procedens? frustra ergo nobis opponit ea testimonia in quibus nudè requiritur amor, ut jam vidimus, & ex Cunero Petri infra fusiùs ostendemus: vide etiam supra num. 14. ex Sylvio aliisque.

238. Producit §. 2. Adrianum VI. Verùm cum hic apertè propendeat

in sententiam afferentem, quod sacerdos in hoc Sacramento tantum declararet hominem solutum vel ligatum, non conferat autem primam gratiam, hinc autem consequatur eundem dolorem requiri in Sacramento, & extra: quid mirum, si requirat dilectionem Dei? Unde Auctor hic nec noster est, nec Adversariorum,

§. 2.

Quid senserint ii, quos adfert Paragr. tertio.

239. **P**rimo loco nobis opponit Franciscum Sönnium tract. de Pœnit. cap. 6. ita loquentem: *Contritio autem attritio est, quando peccator incipit sibi ex corde displicere super turpitudinem & pravitate commissorum, atque ferid edisse male a tam vitam, commemorando secum quod fontem bonitatis perdidit, quod mortem invenerit, quod furib. is ad infernum illaqueatus existat. Quæ tunc si facias prorsus ex amore ad bonum Deum, cum fiducia inveniende reconciliationis per Christum, est Contritio; sin autem remissio, vel solo metu pœnæ evadenda, est attritio, non efficiens veram pœnitentiam, aptam ad illam preparans.*

Resp. illum Auctorem æquè repugnare adversariis quàm nobis. Nam illo loco dolorem qui elicitur prorsus ex amore Dei, vocat contritionem, & attritioni opponit; atqui juxta adversarios non requiritur in Sacramento contritio, prout hæc attritioni opponitur; ergo. Deinde, dum dicit: *sin autem remissio, vel solo metu*, illud remissio opponit particulæ prorsus, adeoque intelligit dolorem ex amore Dei remisso seu imperfecto; hunc autem pronuntiat non efficere veram pœnitentiam: adversarii autem affirmant amorem imperfectum esse veram pœnitentiam. Alterum locum ex eodem Auctore citatum non reperio. Porro in illo non magis agit de dilectione imperfecta, quàm perfecta.

2. Adfert Ruardum Tapperum, sed hunc à nobis stare ostendemus infra §. 8. num. 178.

240. Tertiò Martinum Rythovium, sed in manuscriptis, quem proinde inspicere non potui: Neque etiam necesse id fuit: nam in primo testimonio solum dicit timorem non esse veram pœnitentiam, quod & nos fatemur, vide dicta num. 234. ad Articulos Facultatis. In altero testimonio tantum exigit, ut accedat bona voluntas; hanc & nos exigimus, nempe ut ex timore detestetur peccata commissa, & decernat posthac mandata Dei observare.

241. Quartò Janseñium Gandensem. Concord. Evangel. cap. 55. & 13. Verum cap. illo 55. solum ostendit quis actus sit perfectior, atque Christum non præcepisse ut agamus ex timore servili, sed tantum monstrasse, si timere quis velit, potius timendam gehennam, quàm mala temporalia.

poralia. Cap. verò 13. agit contra Hæreticos obicientes, quòd Theologi statuerint contritionem esse partem pœnitentiæ contra Scripturæ morem, quos falsitatis redarguit ex illo Joannis Bapt. *Pœnitentiam agite*: atque in his verbis includi detestationem peccatorum ut offensiva Dei sunt & ut excludentia à regno cælorum. Porro detestari peccata ut offensiva Dei, non importare necessariò amorem amicitiz sæpe jam ostensum est. Deinde id patet ex ipso Janfenio, dum addit, & ut exclusiva è regno cælorum, hoc autem propriè est motivum nostræ attritionis. Denique licet ibi ageret de amore amicitiz erga Deum, non faceret contra nos; alloquitur enim Joannes eos, quibus ad veram pœnitentiã necessarius erat actus dilectionis Dei per se justificans.

242. Quintò adducit Joannem Hesselitum, sed in dictatis, quæ proinde inspicere non licuit. Hoc ex illo Auctore nobis contra adversarios favet, quòd agnoscat vim timoris ad excludendam voluntatem peccandi, ad quam declarandam adfert illud Eccli. 7. *memorato novissima tua & in aeternum non peccabis*. Vide illum in confutatione fidei specialis pag. 4. col. 2.

243. Sextò Joannem ab Hasselt. Verùm ex hoc nihil aliud profert, quàm quòd dicat ad pœnitentiã requiri *Contritionem*. Hoc autem & nos admittimus, nam contritio genus est, ejus species sunt contritio antinomastice dicta, & attritio. Si dicas eum requirere contritionem prout hæc attritioni opponitur, jam hunc Auctorem constat sententiæ adversariorum contradicere.

244. Septimò opponit Judoetum Ravesteyn dicentem: *Scripturas generales, quæ promittunt omni credenti salutem, non esse accipiendas de qualibet fide, sed de fide quæ parit veram & sinceram pœnitentiã, non ex parte & damnationis tantum timore, sed ex vero & sincero erga Deum amore &c.*

Resp. clarum esse quòd hic agatur de Contritione per se justificante, quia de hac sola veræ sunt Scripturæ generales, promittentes omni sic credenti salutem. Quoad illos enim qui habent fidem, quæ tantum pariat vel attritionem nostram, vel etiam adversariorum attritionem ex imperfecto amore (quæ juxta illos non justificat sine Sacramento) non potest omni sic credenti promitti salus, cum possit quis habere fidem cum attritione, & tamen defectu Sacramenti damnari.

Alter locus, quem ex eodem Auctore commemorat, nobis non adversatur; cum ibi tantum requiratur aliquam Dei dilectionem & amorem justitiæ: hoc enim non facit contra nos, ut sæpe jam diximus, & patebit ex Cuncto Petri statim adferendo.

§. 3.

De Cunero Petri, & Rosemundo.

245. **P** Aragrapho 4. producit Cunerum Petri Leowardiz Episcopum: qui in opusculo de Charitate Articulo 2. pagina 263. ita loquitur: *Quamvis igitur in pœnitentia quæ justificationem & reconciliationem præcedit, semper nonnulla dilectio iustitiæ, & amor Dei conjungitur (nam quomodo potest capax esse iustitiæ, & amicitie Dei, qui nullo modo diligit iustitiam vel Deum?) plurimum tamen vera charitas ab ista præcedente dilectione, sicut ex primo. patet articulo, discernitur: nam sine generali amore, neque pœnitentia, neque spes (quæ pœnitenti necessaria est) concipi potest; qui enim dolet de peccato debet contrariam amare iustitiam.*

Profecto si studio pro nobis contra se Auctores conquissivisset, hunc protulisset; Cunerus enim manifestè censet, ad veram pœnitentiam non requiri amorem amicitie erga Deum, ut patebit tum ex verbis jam relatis, tum ex articulo primo ad quem remittit lectorem.

246. Primum igitur Articulum sic orditur Cunerus pag. 244. *Verissimum quidem est pro eodem à Sanctis Theologis poni charitatis & amoris nomina, sed cum varie sint amandi rationes, & diversi charitatis & dilectionis modi, gravissima questio est, quomodo Deum diligere debeamus, & quando in Scripturis charitas prædicatur, an nihil aliud, quàm generatim amor seu dilectio commendetur.* Subjungit hunc amorem à Theologis dividi in amorem amicitie & concupiscentie; ac pag. 246. proseguitur: *Diligimus autem ipsum propter se, quoniam propter bonitatem, quæ per se non solum bonus est, sed ipsa charitas & bonitas intelligitur. Diligimus & sancto quodam amore concupiscentie.... Nam charitas, ut pulchrè Bonaventura, duplicem motum amoris habet, sanctæ videlicet concupiscentie, quæ Deum super omnia bona concupiscit; & filialis cujusdam benevolentie, quæ Deo super omnia cultum & honorem cupimus & obedientiam deferimus.*

Ex his facillè ostendetur Cunerum à nobis stare: nam

247. Primò affirmat artic. primo, charitatem generatim sumptam complecti varios modos dilectionis, inter quos recenset amorem concupiscentie; ac deinde artic. 2. ad pœnitentiam tantum requirit nonnullam dilectionem, quam vocat dilectionem generalem, eanique affirmat à vera charitate pluriùm differre; ergo non plus requirit quàm amorem concupiscentie.

248. Secundò in verbis quæ nobis obijciuntur, dicit non tantum pœnitentiam, sed & ipsam spem non posse concipi sine amore illo generali; & pag. 269. asserit sine amore fieri non posse, ut quis flagitet Sacramenta. Atqui certissimum est, posse hominem sperare seu desiderare beatitudinem, posse

posse item flagitare Sacramenta, licet non habeat actualem amorem amicitiae in Deum super omnia dilectum. Ergo &c.

3. Post illa verba, qui enim dolet de peccato dicit contrariam amare iustitiam immediate subiungit, nemo sperat aliquid quod non diligit: dilectio autem necessario reposita in omni spe non est amor amicitiae, sed concupiscentiae: ergo.

249. Quartò idem constat evidentissime ex iis quae habet pag. 264. paulò post verba proximè adducta: Patet etiam ad veteres quaestiones responsio, quae de Sacramento Baptismi & Pœnitentiae moveri solent; utrum adultis per hæc Sacramenta, quando actu percipiuntur, culpa peccati remittatur: An verò hæc semper ex voto Sacramentorum, propter dilectionem, quae pœnitentiae iungitur, actualem Sacramentorum perceptionem præcedat: Quia enim vera charitatis natura, à generali dilectionis modo non distinguebatur, nata sunt controversie, quibus nonnulli doctores miris huiusmodi implicentur: cum enim Apostolus virtutes Theologicas enumerans Fidem, Spem, Charitatem, hanc tertio loco præcedentibus maiorem pronuntiat, palam est aliam Charitatem Scripturis commendari, quam vulgarem amorem, cuius modi etiam Spem præcedat, & sine quo Spes esse non potest. Ergo juxta illum in Sacramento non requiritur illa Charitas quæ est major Fide & Spe, sed generalis amor, qualem nos statuimus, & negant sufficere adversarii.

250. Quintò denique cum ostendisset aliquem actum cum solo voto Baptismi iustificare, non tamen omne votum sufficere, sed aliquos Baptismum desiderantes, deficientes ministrum damnari, hanc ejus rei adfert rationem: Id quod inde accidit, vel quoniam imperfecta pœnitentia descendit, quæ solet attritio vocari, & sine Sacramento per se ad iustificationem non sufficit..... verum si quis pleno corde contratur, siue imperfecta hac pœnitentia ex turpitudine peccati vel gehennæ & pœnarum metu atteratur &c. Hic manifestè censet attritionem ex metu sufficere, ponit enim casum, quo in extrema necessitate multi ad ecclesiam concurrunt, alii Baptismum, alii reconciliationem flagitantes, asseritque magnum exitium sequi eos, qui defectu ministrorum vel non baptizati, vel non absoluti moriuntur; magnumque esse fidelium luctum ob illorum perditionem; causam autem perditionis assignat, quòd cum tantum habeant attritionem ex metu gehennæ, defectu ministri non suscipiant Sacramentum. Ergo juxta Cunerum fuerant salvandi, si Sacramentum accessisset.

Quare hunc Auctorem bonâ, ut speramus, adversariorum veniâ nostris partibus adscribemus.

251. Succedit Godescalcus Rosémundus Auctor Tridentino antiquior; ex hoc nobis opponitur ex cap. 11. de Contrit. art. 1. fol. 209. Contritio est dolor de peccatis voluntariè assumptus &c. Ex dicta definitione Contritionis elicio primò, quòd non est vera pœnitentia, neque Contritio, quam plures in extremis videntur habere; qui principaliter & magis timore mortis & gehennæ, quam propter Dei offensam peccata sua & vitia peccata videntur desolari & deplangere

Non

Non video quid hoc testimonium nobis vel in speciem possit obesse. nam

1. Loquitur hic de Contritione prout distinguitur ab attritione, hujus enim articuli titulus est, *Quid sit Contritio*: articuli verò proximè sequentis titulus est: *Articulus 2. de Attritione*. Attritio autem ex metu gehennæ sine dubio non est contritio, prout hæc attritioni opponitur, & alteram contritionis in genere speciem constituit.

2. Agit illic de magnis peccatoribus, quorum poenitentia in extremis, ex quocunque demum motivo videatur esse, dubia semper ac suspecta est habita. Hunc esse sensum Rosemundi constat ex iis quæ post verba relata subiungit: *Hoc maxime accidit & regulariter in his, qui in flore juventutis & tempore sanitatis Dei oblii sunt* Sec. & articulo 3. agens de difficultate contritionis, *Ardum est*, inquit, & valde difficile, *præcipue mole gravæ consuetudinis & peccatorum multitudine in invisionum de-pressis, agere veram poenitentiam, & habere dolorem sufficientem, qui sit contritio*. Quo etiam indicat se agere de contritione prout attritioni opponitur. & pag. 112. adfert illud Augustini: *Timendum est de poenitente fero*.

3. Quòd nostram attritionem agnoscat etiam esse veram poenitentiam seu contritionem constat ex fine articuli 3. ubi contritionem hoc modo describit: *Contritio est compunctio & humilitas mentis cum lacrymis veniens de recordatione peccati & timore Judicii*.

S. 4.

De Estio, Lindano & Gravio.

252. **E**stius adversariis æquè adversatur quàm nobis; requirit enim in Sacramento contritionem, quæ etiam sine Sacramento actu suscepto justificet, quando necessitas excludit Sacramenti susceptionem, ut loquitur loco nobis objecto in 4. dist. 16. §. 9. in cujus fine ad argumentum Scoti, quòd sic per institutionem Sacramenti nihil nobis præstitum videatur, responder, hoc præstitum esse ut per Sacramentum quoddammodo certi & securi efficiamur de reconciliatione. Et distinct. seq. §. 2. docet, Contritionem charitate perfectam, de qua loquitur Tridentinum sess. 14. cap. 4. raro justificare ante actualem sacerdotis absolutionem, quod damnatum fuit in Baio, quem Estius magistrum habuit. Hæc omnia, ni fallor, procul absunt à sensu Auctoris Quodlibeticæ. Fateor ergo libentissime dissidere nos ab Estio; qui, ut nostram attritionem rejiceret tamquam insufficientem, motus fuit hæc evidenter falsà ratione, quòd dolor ex motivo gehennæ non possit excludere voluntatem peccandi, uti sæpe repetit illo §. 9.

253. Venio ad Guilielmum Liudanum, ex quo nobis obijciuntur sequentia.

1. Apud Ederum lib. 5. ait: *Fides uti ad salutem non sufficit, ita nec ad impij justificationem. Desiderat enim veram animi conversionem, seu Contritionem, Confessionem & satisfactionem, tres Evangelicæ Pœnitentiæ partes.*

2. Ibidem: *Contritio est dolor de peccato propter Dei offensam susceptum proposito confitendi & satisfaciendi.*

3. Lib. 4. Panopliæ Evangelicæ cap. 64. *Proinde facessat novum istud nova contritionis signum: quod meros animi horrores, & terribiles conscientie carnificinas somniat, quasi vero hisce rebus perficiatur contritio, non inchoetur tantum. Quare dum adversarii istos horrores omnibus Scripturæ locis affingunt & suis semper obtrudunt, quid aliud, quam judaico supercilio ad servilem eos metum alligant.*

254. Resp. primum testimonium non facere contra nos. Fateamur enim Contritionem esse partem pœnitentiæ, sed prout genus est ad contritionem antonomasticè dictam & attritionem, ut patet ex Tridentino, & scriptoribus omnibus, ac ipso Lovaniensium Catechismo.

Ad 2. Resp. dolorem propter Dei offensam non includere amorē amicitiae, ut jam sæpe ostensum est. Vide supra num. 196. & 232.

255. Ad 3. Resp. quod ibi dicit Lindanus, verissimum est in nostra sententia; quod nempe nudus timor seu merus terror non sit pœnitentia: necesse enim est detestari peccata commissa, & proponere vitam novam. Hanc autem esse mentem Lindani, manifestum est: nam cum cap 63. dixisset hæreticos duas statuisse pœnitentiæ partes *Contritionem & fidem*: illam non aliud, quam horribiles animi terrores ob gehennæ metum: hanc conscientia consolatricem; progreditur cap 64. ad expositionem Apostolicæ & Catholicæ doctrinæ de Sacramentali Pœnitentiâ; contentusque unico Augustini testimonio, quod recitat subiungit: *Huiusmodi ergo est vera pœnitentia contritio, qua dolorem de offensa Dei habet, peccatis ad ulciscendum lacerat, vitamque in melius commutat, ideoque ad Auxilium accedit clavium Ecclesiæ ministerium requirens.* Tum statim pergit: *Proinde facessat novum istud &c. supra.*

256. Ex his pro nostra sententia sic licet argumentari. Dum hæretici volentibus Contritionem esse meros terrores animi ob metum gehennæ, Lindanus opponit Apostolicam & Catholicam definitionem Contritionis, tantummodo meminisse doloris de peccatis commissis, commutationis vitæ in melius, & accessus ad Sacerdotem; ergo inde rejicit terrores quos statuebant hæretici, quod non complecterentur & detestationem peccati & Inchoationem seu propositum vitæ novæ.

257. Deinde in sua illa definitione Catholica ne minimam quidem facit mentionem Dei propter se dilecti, sed è contra Dei ad ulciscendum lacerasti, quod est motivum timoris. Imo in testimonio, quod adfert ex Au-

gustino libro de utilitate Pœnit. (quo solo, ut inquit, contentus est ad stabilendam contra hæreticos contritionem Catholicam) nec per umbram fit mentio amoris Dei, sed ubique timoris extremi iudicii & pœnarum gehennæ. Locum Augustini ex Lindano transcribo; *Ascendat homo adversum se tribunal mentis sue; si timet illud, quod oportet nos exhiberi ante tribunal Christi; atque ita confisi usque in corde iudicio adsit acutus atrox cogitatio, seclis consentia, carnifex timor... versetur ante oculos imago futuri iudicii, cogitet quàm sit contemnenda illa pœna, quâ peripitibus aliis vitam æternam, alii in mortem præcipiuntur æternam....* *Judicet ergo seipsum homo in ista voluntate, & mores convertat in melius, dum potest, necum jam non poterit, etiam præter voluntatem à Domino judicatur. Venias ad Antistes, per quos illi in Ecclesia claves ministrantur.*

258. Quæro, cum in his omnibus nulla fiat mentio motivi amoris Dei, sed solius metus, an non ineptissimè hæc attulisset Lindanus ad confutandum dogma hæreticorum, si hæretici per terrores intellexissent actum, quo quis ex timore gehennæ detestatur præterita peccata, & proponit vitam in melius commutare? Quæro, an, dum tradit definitionem pœnitentiæ Sacramentalis, quæ Apostolica sit & Catholica, potuerit nulla facta mentione amoris, solum ubique inculcare motivum metus? nisi censuisset juxta Catholicos sufficere cum Sacramento, quod quis ex motivo metus peccata priora detestetur, & proponat in posterum non peccare.

Quare non videtur dubitari posse, quin Lindanus nostræ sententiæ palam patrocinetur. Quod etiam confirmari potest ex verbis quæ subdit post ea quæ nobis obijciuntur. *Proinde Catholicæ Ecclesiæ Augustini doctrinam secuti aliorumque veterum, hæc contriti cordis sacrificium à perhorrenda tremendi illius iudicii, evititate exorsi, mores veteres in melius jubent commutare.*

259. Proximus adfertur Henricus Gravius: Hunc auctorem non habemus & conquirentem apud Bibliopolas reperire non potui, quibus ne de nomine quidem notus est. An fortè est manuscriptus? Quare ad ejus testimonium non respondeo; hoc solummodo notatum velim, quod verba, quæ ex ipso adferuntur in Appendice, non contineant sententiâ adversariorum.

S. 5.

De Jacobo Baio, Latomo, Joanne Beets, & Joanne Briart:

260. **J**acobus Baius lib. 2. cap. 31. Contritionem definit dolorem animi de admissio contra Deum peccato, cum proposito non peccandi de cætero & confitendi. Displacitiam autem peccati ex solo gehennæ metu ortam, asserit non mereri nomen contritionis; quod non rectè fiat cum Tridentino; hoc enim contritionem genericè sumptam dividit in contritionem per

perfectam & attritionem, conceptam scilicet ex metu gehennæ: quod autem addit ibi involvi amorem, supra refutatum est. Porro hujus Auctoris præcipua ratio tum hic, tum cap. 84. hæc est, quod displicentia peccati ex solo metu gehennæ non possit excludere voluntatem peccandi, sed sola peccata externa; adeoque nixitur principio evidenter falso, ut demonstratum est supra, & patebit ex Driedone §. sequenti.

261. Jacobus Latomus circa annum 1520. scripsit contra Lutherum: ex quo hoc contra nos testimonium adfert Auctor quodlibeticæ ex artic. 3. de Pœnit. pag. 27. *Ex his patet, quòd is, qui timore pœnæ legem servat, quamvis non faciat bene, acit tamen minus male, quàm si ipsam quoque pœnam consentiens legem transgrederetur. Item quòd in principio metu fit, assuetudine levius actam, voluntarie tandem fiet, ut timor transcat in amorem, quemadmodum lex Moysi duxit ad Christum.*

Resp. Latomum illic loqui de timore pœnæ à iudice humano infligendæ, nam ibidem præmiserat, multitudinem rectè coerceri legibus pœnalibus, idque probat ex Augustino lib. 2. adversus litteras Petil. cap. 83. ubi Augustinus agit de legibus imperatoriis contra hereticos latis; subdit autem Latomus: *sic servos & filios metu continemus à malis.* Deinde quando dicit timorem transire in amorem, merè gratis id interpretaberis de amore Dei propter se dilecti, quasi vero non detur amor virtutis, qualem habet is, qui ex timore pœnæ vult omnia bona opera præcepta in posterum exercere. Atque hæc ostendunt, Latomum non esse nobis contrarium.

262. Videamus nunc quantopere nostræ sententiæ in eodem illo articulo favcat.

1. Pag. 26. sub finem, exemplum filii prodigi applicans animæ pœnitenti, in illis verbis: *fac mesent unum de mercenariis*; agnoscit amorem mercenarium, qui nondum est charitatis, sed ex privata sui affectione procedens sollicitudo mercedis, quem affectum dicit relinqui, dum pater accurrens osculatur, unde filius dicit, pater peccavi &c. *Hic, inquit, cupiditas charitate superata est, & affectio commodi cessu amoris iustitiæ. Jam attritio facta est contritio, & hoc per osculum paternum: Quod, licet divinam significet charitatem, tamen sine præiudicio melioris sententiæ etiam convenienter accipi potest reconciliationis Sacramentum, sive sacramentalis absolutio, ubi redditur stola prima, id est, charitas &c.* quibus indicat solam affectionem commodi seu mercedis, id est, attritionem fieri contritionem per osculum paternum, id est, ut explicat, per sacramentalem absolutionem: neque dici potest in illa affectione commodi involvi amorem Dei, nam tunc esset cupiditas commodi superata charitate; unde nec adderet suæ assertioni, *sine præiudicio melioris sententiæ*, id dici convenienter.

263. Secundò ibidem pag. versa: *Sed sunt quidam duri, qui blanditiis & facilitate non emendantur. Ideo & alius modus quo anima peccatrix reducitur ad iustitiam*

per timorem ortum ex sui amore. Iste modus reducendi habetur Matth. 18. in parabola de Rege, qui voluit rationem ponere &c. unde servus perterritus, ad supplicandum conversus est & meruit remissionem: atqui hic servus ex solo timore supplicans, sine alio suo ulteriori actu obtinuit veniam, adeoque censet Latomus etiam dolentem ex metu sine ulteriori actu charitatis veniam impetrare.

264. Tertio subjungit: *Habet quidem Deus alios modos, quibus peccatores ad se reducit, sed hi duo sunt usitatores & nobis notiores. Ex quibus infero, quod Lutherus inconvenienter alterum ex his duobus improbat, dum vult eam solam esse veram poenitentiam, quæ ex amore justitiæ vel virtutis ortum habet.... est quidem ea vera poenitentia, sed non sola* Lutherus in sermone de Poenit. statuebat duplicem poenitentiam: unam, quæ pro motivo habebat pulchritudinem virtutis, & hanc solam volebat reddere dispositos ad absolutionem; aliam verò, quæ pro motivo habebat evasionem poenæ, non reddere dispositos. Latomus verò, præfatus se hic agere contra sermonem Lutheri de poenitentia, asserit, illam ex amore virtutis esse veram poenitentiam, sed non solam; adeoque censet veram etiam esse poenitentiam, quæ concipitur ex timore gehennæ; adeoque reddere dispositum & dignum absolutione, quod negabat Lutherus.

265. Octavus est Joannes Beets multo antiquior Tridentino, qui expositione 4. in 3. præcep. c. 5. ait: *Confessio debet esse voluntaria.... ex eadem conditione sequitur, quid debet fieri cum vera contritione & charitate, sive ex timore filiali, & non servili, quia timor servilis quodammodo cogit, sed filialis hominem liberum facit.*

Resp. 1. illum non distinguere inter charitatem perfectam & imperfectam, adeoque non favere adversariis; fortè enim cum quibusdam antiquis tenuit, eundem dolorem requiri in Sacramento, qui justificat extra Sacramentum.

Resp. 2. fortè sumit charitatem latè, juxta explicationem Cunei supra, cujus aliquod indicium est, quòd eodem cap. asserat: *licet enim dolere debeat propter peccatum quod commisit, debet tamen gaudere propter vitam quam recuperat, & ita ex gaudio voluntariè confiteri.* Si gaudium (& idem est de spe) recuperandi vitam seu gratiæ seu gloriæ facit confessionem esse voluntariam, & non quasi coactam; quomodo ex eo, quòd confessio debeat esse voluntaria, sequitur quòd determinatè debeat esse ex charitate Dei?

266. Nonus est Joannes à Briaert, qui Quodlibeto primo admittit; quòd ille, qui cessat à peccato iniuste detentionis, ne pœnas inferni cumulet, non bene cesset, quia cessat peccaminosè.

Verùm hæc sententia manifestè est erronea, ut fatebitur ipse Auctor appendix, adeoque me ei non consentire libens admitto.

§. 6.

De Joanne Driedone.

267. **D**Ecimus est Joannes Driedo, cujus duplex adfert contra nos testimonium: unum est ex tract. 4. de captivitatibus & redemptione generis humani cap. 2. parte 7. *Quamquam in timore servilis ipsa servilitas seu peccandi voluntas, quæ intus latet, non sit Spiritus Sancti opus, utique tamen timor divini iudicii, cum sit opus fidei, procedit ex dono Dei. Proinde verum quidem est, apud eos, qui solo servili metu solius pœnæ obediunt præceptis, abstinentes ab illicitis, neque esse curam pudoris, neque honestatis, vitiis & castitatis amorem, eosque timore reprimi, non emendari, attamen ipsi neque tantum nocent &c.*

268. Resp. illic agi de timore serviliter servili, seu qui habet annexum hunc actum; vellem peccare si non esset infernus; magis timeo infernum quam peccatum &c. Pater id manifestè ex Driedone, qui ante verba relata præmittit: *Quisquis gehennæ aut iudicii timore incipit peccata odio habere, suaque frangere concupiscentias &c. non peccat in eo quod sic timet.... Tamen aliunde peccabit, si simul adsit in actu qui pravi moris pravis voluntatis vel desideratis non esse legem prohibentem & non esse Deum punientem; vel tristitia, quod sibi non liceat impune peccare, vel magis odio habentis penam, quam culpam. Tum paulò post subjungit verba nobis objecta.*

Neque dici potest quòd semper censeat adesse talem aliquam voluntatem pravam, aliàs enim non diceret; *aliunde tamen peccabit, si simul adsit &c.*

269. Porro quòd Driedo senserit metum gehennæ cohibere etiam à peccatis internis, & à consensu in similia prava desideria indeliberatè exorta, patet ex iis quæ tradit eodem loco; cujus testimonium, licet prolixius sit, non pigebit me hic describere, nec lectorem legere; quia in illo rationem adfert cur timor gehennæ cohibeat à peccatis etiam internis; timor verò supplicii ab homine infligendi à solis externis, & multa quæ supra diximus suo comprobatur calculo, simul explicans varia S. Augustini testimonia. Ita loquitur pag. 107.

Verum non est silentio prætereundum, quòd, etsi in præparandis ad salutarem gratiam hominum cordibus utcumque utilis sit timor, & non solummodo timor gehennæ ignis comminati à Deo iusto iudice, sed & timor pœnæ constitutæ secundum humanas leges & potestates, cum uterque cohibeat voluntatem, ne det consensum in executionem nefarii operis; attamen magnum est discrimen inter istum et illum timorem. Abstinet laico à furto, & ab adulterio, ne suspenda-

tur in patibulo; abstinet & ab illis Christianus ne puniatur in inferno; sed latro solum timens leges hominum, facit latrocinium, dum sperat se ipsum latere tribunalia secularium judicum: Christianus autem leges timens illius, quem novit falli non posse, propter timorem divini tribunalis non modo cohibet membra ab exteriori opere, verum & intra claustra cordium coercet malas cupiditates, sciens Deum omnium occultarum esse conscium..... Verum quidem est in utroque timente vivere quandam peccandi voluntatem, quemadmodum & demonstravit venerab. Augustinus, sed modis longe diversis. Nam adultera propter metum pœna temporalis conminata ab humana potestate, ad tempus sua membra comprimens ab executione, plerumque expectat locorum & temporum occasiones, quibus possit latere, ad satisfaciendum sua, quæ intus latet, peccandi voluntati: Christianus autem commotus & tactus spiritu timoris divini iudicii, non sic expectat ullas exequendi nefarii operis opportunitates, sed certa fide iam tenens Deum omnium rerum conscium, etiam internum suum reprimit consensum ex Spiritu Sancto, nondum quidem sanctificante, sed conturbante spiritum malignum, qui latenter in eo adhuc vivit, etiam plerumque intus operans suos nequitia motus. Proinde, ut docet Venerab. Augustinus, latenter in eo vivit quædam peccandi voluntas, propterea quod nondum est iustitia amicus..... proinde talis adhuc carnalis vellet sibi fore licitum frui creatura, suaque libidini satisfacere..... verum iste voluntatis motus, quo carnalis homo vellet hæc omnia, non est opus spiritus timoris Domini, sed diaboli, qui semper in cordibus hominum sua conatur rixantia superseminare inter divini spiritus semina. Quemadmodum enim in eo qui est iam templum Spiritus Sancti, plerumque spiritus nequitia suos seminat motus pravitatis ad destruendum opus Dei; ita & in eo qui adhuc est templum diaboli, plerumque Spiritus Sanctus suos præmittit præcursores, quibus destruit opus diaboli. Nemo igitur arbitretur esse absurdum, timorem gehennæ ignis esse opus Spiritus Sancti &c.

270. Deinde objicit sibi, quod juxta Augustinum, qui solo metu à malo coercetur, odit præceptum, & iustitiam punientem, velletque Deum non esse criminum vindicem, mallet licere, quod est illicitum, atque hac ratione in

ne in eo adhuc vivit voluntas peccandi; cui objectioni respondet pag. 108. *Is qui solo metu gehennæ coërcet se ab opere malo, præceptum quidem eductum secundum amorem quemdam habituales seu radicem intus latentem, nondum renovatus spiritu amoris iustitiæ, sed non semper est odium in actu, non semper actu concupiscit destructionem esse iustitiæ punientem. Et hoc est alterum testimonium quod contra nos adducit P. Farvacques. Pergit Driedo;*

Proinde subiectus servili timori, quodammodo vult peccare, & quodammodo non vult peccare. Vult quidem, quia vivit in eo latens quædam peccandi voluntas, non actualis quidem semper in actu peccandi, sed habitualis, secundum quam nondum amicus iustitiæ, semper præparatus manet peccare, si esset impunitas. Non vult autem peccare quia iam concussus timore divini iudicii, sciens Deum esse cui omne cor patet, & omnis voluntas loquitur, & quem nullum latet secretum, incipit exire de sæculo. Et idcirco non quemadmodum fur vel adultera exspectat opportunitatem loci & temporis ad perpetrandum nefarium opus, sed intra claustra cogitationis coërcere & comprimere studet, ne pravis cupiditatibus præstet consensum.

Ex his patet sententiam Driedonis esse

271. Primò Quòd timor gehennæ cohibeat etiã à peccatis internis.

2. Rationem, cur id potius faciat timor gehennæ, quàm timor pœnæ ab homine imminenti, esse, quia Deo æquè nota sunt peccata interna quàm alia; adeoque ob illa æquè incurreretur pœna gehennæ.

3. Quòd non semper adsit actu aliquis pravus motus voluntatis etiã inefficax in oppositum, dum quis ex metu à peccato abstinet.

4. Quòd aliquando adsit talis motus pravus à diabolo immixtus, sicut etiã immittit iustis; sed quòd ex metu gehennæ voluntas non præstet illi consensum, & per consequens, ut docet Tridentinum, non peccet.

5. Quòd actus inefficax in oppositum etiã indeliberatus non oriatur ex timore gehennæ.

6. Quòd maneat habitualis voluntas peccandi, seu radix intus lateris, quæ prorumperet in actum, si proposita ratione objecti delectabilis, abesset metus gehennæ, nec succederet aliud motivum, ob quod reprimeretur.

7. Quòd ille timor gehennæ sit à Spiritu Sancto, adeoque supernaturalis.

Quæ omnia planè adversantur illis contra quos disputamus, & conformia sunt illis, quæ supra diximus cap. 4. 5. &c.

§. 7.

De Lensæo, Molano, Stapletono.

272. **E**X Joanne Lensæo contra nos adfertur, quod habet libro 6. de Christiana libertate cap. 4. pag. 264. in titulo capituli. *Qui solo metu, non amore insitit, quod præceptum est, facium, hos nondum esse liberos à servitute peccati.* Et eodem capite pag. 269. asserit id non tantum esse verum de timore, qui dicitur humanus, verum etiam de illo, quo propter poenam metuitur Deus.

Reip. Lensæum illic agere de iis, qui solam speciem bonæ conversationis hominum oculis obijciunt, idque ut vel assequantur terrena præmia vel poenas hinc evitent: ut videre est tum ex toto contextu, tum præcipue ex pag. 268 ubi etiam addit: *sub gratia vero positi, quos vivificat spiritus, ex fide ista faciunt, quæ per charitatem operatur, in spe bonorum, non carnalium, sed spiritualium; non terrenorum, sed celestium, non temporalium, sed æternorum. Hi pertinent ad testamentum novum, filii promissionis &c.* Unde quod dicitur pag. 269. intelligi potest de timore poenæ temporalis. Deinde illo loco tantum dicit, illum timorem, quo propter poenam metuitur Deus, esse servorum. Addit insuper hunc timorem excludi à charitate, cum hæc fuerit perfecta, adeoque nihil huc facit charitas adversariorum solummodo imperfecta. Denique loquitur de amore justitiæ virtutis &c. quod gratis omnino intellexeris de amore amicitie erga Deum.

273. Videamus jam quid de timore judicii & gehennæ, ejusque contra peccatum efficacia dicat Lensæus: lib. 7. cap. 14. pag. 362. ita loquitur:

Paravit calum; sed paravit & tartarum..... Cujus consideratione judicii sæpe perhorrescere, si ad justitiam & quæ nondum sit, comparandam; & quæ jam parata sit, frustra diabolo tentante, retinendam, nihil conducere: non hunc nobis divina Scriptura, toties ejus utilitate propositâ, commendaret. Nolito, ait Dominus, timere eos qui occidunt corpus, sed eum time &c. Ille quippe hominum timor in corpora savientium, sapientum: vero ad peccatum impellit. Hic vero divina severitatis, & peccatum expellit, & cum peccato diabolum: cum sanctissima Dei voluntate cogit parere, ut æterna, quæ malis irrogaturus est, supplicia suziantur.... An fortè ut severus delictorum vindex timeri non vult Deus, quemadmodum ait quidam; sed tantummodo ut benignus pater? Atqui timeri vult, ut is qui corpus & animam mistat

ingehennam; quod non ut benignus pater, sed ut severus proculdubio justusque iudex facit... est igitur hic metus necessarius, non ad ingrediendam solam justitiæ vram, sed plerisque etiam ad retinendam. Quorum bona quidem illa, sed tamen infirma voluntas iudiciorum Dei contemplatione excitanda & firmanda est; ne peccati inescata voluptate, citò ab itinere salutari defleat, & ab hoste semper insidiante captivam se & illaqueatam abduci patiatur. Hunc proinde Cyprianus timorem innocentie custodem vocat... Non immeritò proinde accipi etiam de hoc timore potest, quod à sapiente dictum est: Nisi in timore Dei constanter tenueris te, citò subvertetur domus tua. Est enim & hic Dei timor basis quædam, unde imbecilla voluntas standi accipit firmitatem. Hinc ejusdem & illa semper animo volvenda sententia: Memorare novissima tua, & in æternum non peccabis. Et cætera, quæ in eundem sensum prosequitur.

Poteratne aliquis lûculentius aut elegantius declarare vim timoris gehennæ ac energiam, qua præditus est, ut mentes humanas ab omni prorsus peccato immunes contineat? Poteratne magis evertere sensa eorum, qui negant timorem gehennæ repugnare peccato, & solam manum ac membra cohibere à nefario opere, non autem mentem à pravis perversisque cupiditatibus? Non dubito quin adversarii hunc in posterum agnitori sint fortissimum nostræ sententiæ propugnatores ac defensores.

274. Adfert Joannem Molanum Tract. 1. de pœnitentia cap. 7 num. 3. asserentem Contritionem à Lovaniensibus definiri: *dolorem de peccatis commissis propter Dei offensam &c.*

Verùm id pro nobis facit; nam ibidem asserit hanc Lovaniensium definitionem non discrepare ab hac Tridentini descriptione: *Animi dolor ac detestatio de peccato commisso, cum proposito non peccandi de cætero.* In hac autem non importari amorem amicitie erga Deum, evidens est; ergo censet nec involvi talem amorem in dolore de peccato propter offensam Dei.

275. Alterum Molani testimonium opponit ex num. 31. *Saniores igitur Scholastici, cum asserunt virtutem Sacramenti Confessionis ex attrito contritum hominem acere, loquuntur de attritione, quæ adiunctum habet affectum, quo penitens incipiat diligere Deum tamquam justitiæ fontem.*

Resp. hæc ultima verba intelligi posse de desiderio placendi Deo, de quo locutus erat num. 30. ibidem: hoc autem habet qui attritur ex timore gehennæ, in quantum proponit firmiter omnia Dei mandata servare: qui quidam amor Dei est juxta Cunerum Petri, Sylvium, aliosque: præsertim

cum num. 29. dixerit Molanus *Sunt tamen quidam, qui magis suppliciorum metu consentiantur, quàm Dei amore. Quorum solatio Tridentina synodus providisse videtur, ubi ait: Illam verò contritionem imperfectam quæ attritio dicitur, quoniam vel ex turpitudinis peccati, vel ex gehennæ & pœnarum metu communiter concipiunt &c. quæ illo loco prosequitur Tridentinum.*

276. Postremus est Thomas Stapletonus, qui Tom. 2. de justif. prolegomeno 1. in lib. 5. ita habet. *Lutherus quidem negavit odium peccati esse vel necessarium vel utile, & optimam pœnitentiam vult esse novam vitam. Melancthon contra in timore servili, & in detestatione peccati, ponit plenam & perfectam contritionem, quod non minus est salum. Vera enim contritio odium quidem peccati habet, sed propter Deum offensum, non propter terrores pœnarum, de qua Apostolus dixit. Tristitia, quæ secundum Deum est, pœnitentiam in salutem stabilis operatur.*

Resp. Stapletonum rejicere sententiam Melancthonis, quod in timore servili & detestatione peccati ponat plenam & perfectam contritionem, adeoque sine proposito novæ vitæ; cum pœnitentiam Melancthonis opponat pœnitentiæ à Luthero assertæ, quæ erat sola inchoatio novæ vitæ. Nostra autem attritio complectitur & detestationem peccati præteriti, & propositum vitæ novæ, adeoque hic nihil contra nos. Quod autem ait, *veram contritionem esse odium propter Deum offensum, & non propter terrores pœnarum:* agit de contritione perfecta seu sufficiente extra Sacramentum.

277. Porro quod illo loco agat de sola contritione perfecta & per se justificante: facile, si opus esset, colligeretur ex præcedentibus, verum tali collectione opus non est, cum ipse Stapletonus manifestè id exprimat, dum post verba in objectione allata subjicit: *Sed de hoc præstantium errore, in controversia de pœnitentia ejusque partibus, rectius disputandi locus erit. Hoc loci bene est advertendum, quod odium peccati disponens ad justitiam, multum differt à contritione, quæ est prima pœnitentiæ pars. Agit ergo de odio peccati, quod plurimum differt à contritione, prout hæc ponitur prima pars Sacramenti Pœnitentiæ. Et hinc etiam evanescit vis alterius testimonii, quod ex eodem auctore profert P. Farvacques. Imo hic Auctor nostram tenet sententiam ut ostendimus 5. sequenti.*

§. 8:

*Auctores Lovaniensis Universitatis, qui docuerunt sufficere
Attritionem ex metu gehennæ.*

278. **P**rimus sit Ruardus Tapperus, qui, cum ad Artic. 4. Attritionem cum communi definivisset displicentiam peccati ex timore pœnarum. ita loquitur pag. 111. columna 1. in initio: *Quod autem attritio sufficiat, quamvis verum sit, non est tamen certum atque indubitatum.*

2. Eadem columnâ : *Attritio* verò ex timore peccatorum *supernaturalium* idonea dispositio est ad Sacramentorum Baptismi & Pœnitentiæ gratiam percipiendam: ut cum quis detestatur omnia peccata mortalia, & propterea confitetur, ne per peccatum excludatur à gloria, vel ne in supplicium ignis sempiterni coniciatur: qui etiam si cognoscat se non habere Contritionem, sed tantum hanc Attritionem, probabili est doctorum sententiæ, quod licet accedat ad Baptismi & Pœnitentiæ Sacramenta suscipienda. Id autem ibi fuscè probat ex D. Thoma, ex Augustino, & ratione, & ex facto Christi, qui talem pœnitentiam per se suosque prædicavit.

279. 3. Pag. 112. col. 1. cum dixisset, non omnem pœnitentiam ad salutem perducere, subdit: Ille namque *solummodo* pœnitentiæ timor ad salutem perducit, cum idcirco quis pœnitentiam agit, quia iudicium universale, & eorum regnum futurum esse credit, à quo excludendi sunt & in gehennam mittendi peccatores. Cum ergo quis idcirco pœnitentiam agit, ut mala æterna evadat, & bona consequatur æterna, fidelis iudicatur & per fidem agendo pœnitentiam salvatur.

280. 4. Pag. 113. col. 1. Cum probasset Sacerdotes non tantum declarare pœnitentes esse solutos, sed verè à peccatis solvere: hinc infert: Non igitur requiritur amor Dei super omnia & tamquam finis ultimi, ut dispositio necessaria in Sacramento Baptismi, nec etiam Pœnitentiæ: sed talis sufficit, secundum quem Deus sit causa tristitiæ vel pœnitentiæ.... Affectus autem contritionis, quem Deus despiciere non potest, est odium peccati super omnia odibilia propter Deum tamquam finem ultimum, in quem omnia referuntur, amatum.

281. Ecce juxta Tapperum actus, quo quis odit peccatum super omnia odibilia propter Deum tamquam finem ultimum, in quem omnia referuntur, amatum, sive ob Dei amorem ibi sistendo: hic, inquam, actus est contritio; nec Deus illum despiciere potest, seu ille infallibiliter justificat. In Sacramento autem non requiritur amor Dei super omnia, & tamquam finis ultimi, sed sufficit Deum esse causam tristitiæ. Ergo juxta Tapperum non requiritur in Sacramento actus charitatis. Videat jam Auctor Quodlibeticæ, quomodo his testimoniis quadret hæc responsio: *etiam dixit David, non est Deus.*

282. Objicit 1. Tapperus requirit, ut cum metu adsit alia affectus mutatio, & homo moveatur ad altiore considerationem, mentisque ad Deum etiam affectionem; cujus rationem adfert, quia nec homo placaretur, cum, qui læsit, nullam ipsius in dolore rationem haberet.

Resp. per hæc omnia non importari amorem benevolentis erga Deum, eum ipsenec Tapperus, postquam dixit quæ obijciuntur, dicat hoc esse proprium contritioni, quæ infallibiliter justificat, talem autem amorem non requiri cum Sacramento, seu in attritione de qua ibi loquitur. Unde patet, dum dicitur habendam rationem Dei, debere esse affectum erga Deum, debere Deum respici, haberi rationem offensæ Dei, nihil aliud intelligi, quam quòd

debeat peccator dolere, quod Deum offenderit potentem punire & puni-
turum, quod proponat servare mandata, & satisfacere &c. prout diximus
num. 13. 196. & idem patet ex exemplo in humanis quod adicit, in quo
ad reconciliationem non requiri amorem amicitie certum est.

283. Objicit 2. Tapperus pag. 112. cum retulisset verba in secundo testi-
monio supra relata, & alias sententias, subiungit: *Consolatoria quidem hæc sunt,
sed incerta, & Scripturæ ac Patrum sententiis non satis consentanea, si intelligant nullam
Dei aut offensæ ejus habendam esse rationem.*

Resp. post relata verba secundi testimonii, & fasam satis additam proba-
tionem, refert alios pœnitentiæ modos 1. ubi causa pœnitentiam agendi
est amor præsentis sæculi: qualem egit Achab. 2. dolorem ex amore Dei
naturalis; & hanc dicit esse probabilem multorum opinionem, subditque:
*intelligunt autem, ut credo, si cum Fide, spe veniæ & proposito Deo serviendi sit con-
junctus, sine quibus nulli contingit peccatorum remissio.* 3. quando quis odit pecca-
tum quia turpe est, & contra rationem. 4. quod aliqui neoterici dicant,
sufficere quemcumque dolorem, si homo putet se præstitisse, quod erat ne-
cessarium. Et tunc addit hæc esse consolatoria & incerta, si intelligant,
nullam Dei aut offensæ habendam rationem; quod intelligendum videtur
juxta limitationem paulo ante datam, si non adsit spes veniæ & propo-
situm cavendi peccata. Unde ad has posteriores sententias illa verba referri
debent; non autem ad primam, quam fusè probat ex auctoritate & ratione;
præsertim cum rursus duabus columnis post asserat ea, quæ retulimus supra
in quarto testimonio ex Tappero num. 180.

284. Secundus est Cunctus Petri, qui asserit sæpe fieri ob defectum mi-
nistri, ut volens baptizari, vel Pœnitentiæ Sacramentum suscipere, cum
magno aliorum luctu in æternum pereat, quia tantum habebat attritionem
ex metu gehennæ. Sententiam ejus & verba retulimus supra à num. 246.

285. Tertius est Thomas Stapletonus: hic Tom. 2. prolegomeno 1. in
librum 5. de justificatione pag. 120. ante medium, cum quæstionem de Sa-
cramento Pœnitentiæ, & ejus partibus rejecisset in alium locum, adverten-
dum tamen hic censet, quod odium peccati, quod disponit ad justificatio-
nem extra Sacramentum, multum differat ab ea contritione, quæ est prima
pars Sacramenti Pœnitentiæ, subiungitque: *neque enim tam imensum odium aut
dolor peccati, quale ibi requiritur, sed odium aliquod generale & qualescumque, quam
attritionem scholastici vocant.* Dolor autem ex metu gehennæ est fuitque juxta
omnes vocata attritio, ut patet ex cap. 2. ergo talis dolor juxta illum
sufficit.

286. Quartus est Mercerus Suppl. q. 1. articulo tertio.

287. Eandem sententiam non obscurè indicant Guilielmus Lindanus,
& Jacobus Latomus supra num. 255. & 262. favet etiam Molanus num.

288. Quæro jam ab adversariis quosnam ex antiqua Facultate habeant, qui teneant illorum sententiam? Credo vix rependiendos paucos. Porro ut aliquos pro se meritò adducant, necesse est ostendant, illos docere, quòd nullus dolor cum Sacramento sufficiat, nisi sit ex amore amicitie erga Deum, seu propter se dilectum; deinde dari amorem amicitie aliquem, qui sine Sacramento non iustificet. Denique nec hoc sufficiet, ut inde colligant, quòd sua sententia fuerit sententia Facultatis antiquæ, sed simul debebunt ostendere, quòd non nitantur falso aliquo principio; si enim nitantur illo principio, quòd timor sit malus; illis opponam Tapperum, Driedonem, Stapletonum & plerosque hujus Facultatis Doctores. Similiter si pro ratione asserant quòd timor non possit excludere voluntatem peccandi: Rursus opponam clarissima in oppositum testimonia Driedonis, Lensæi & plurium aliorum.

Profert contra nos P. Farvacques Auctores viginti unum; & iudicium Facultatis: ex his pro nostra sententia stant Tapperus, Cunerus Petri, Lindanus, Latomus, Driedo, Lensæus, Stapletonus, & favet Molanus. Tam adversariis, quàm nobis repugnant Adrianus, Sonnius, Estius, Briaert. Reliqui verò, si unicum ferè Jacobum Baium excipias, nobis minime adversantur. Dissipata est ergo nubes testium contra nos allatorum.

CAPUT XII.

Quodnam sit discrimen Attritionem inter & Contritionem.

289. **S**Ummus hic Contritionem non genericè, & prout etiam Attritionem sub se complectitur, sed pro specie Attritioni oppositâ, & quæ independentè ab actuali susceptione Sacramenti iustificat. De Contritione hoc modo sumptâ unicum ad rem nostram hic inquirimus; quomodo nimirum differat ab Attritione. Neque enim volumus hoc loco prosequi plurima alia, quæ Contritionem concernunt, cum ad institutum nostrum minime necessaria sint, & esse possint alterius scriptiohis justum argumentum.

290. Qui nobiscum sentiunt in quæstione de Attritione, unanimè quoque inter se sunt in dicto discrimine assignando: statuunt enim, quod omnis ille dolor ac detestatio peccatorum, quæ procedit ex motivo amoris Dei propter se dilecti super omnia, seu excludentis voluntatem peccandi (dari enim potest amor Dei propter se, qui non sit super omnia, neque voluntatem peccandi excludat) sit vera contritio, quæ sine actuali Sacramento peccatorem

catorem justificet: Attritio verò sit detestatio peccati ex motivo aliquo inferiori, voluntatem peccandi excludente. Censent insuper Contritionem infallibili lege per se & sine Sacramento justificare. Quæ tota doctrina quam sit conformis Sacro Tridentino Concilio, fiet manifestum consideranti sess. 14. cap. 4. quo loco Synodus postquam definivisset, Contritionem generatim sumptam esse dolorem ac detestationem de peccato commisso, cum proposito non peccandi de cætero, nullâ factâ mentione motivi: subjungit deinde, hanc Contritionem esse aliquando charitate perfectam, seu charitate tamquam motivo præ cæteris nobilissimo perfici, eamque generaliter, nullâ additâ limitatione aut restrictione, pronuntiat hominem Deo reconciliare, priusquam Sacramentum actu suscipiatur.

291. Hunc proinde Tridentini locum non rectè intellexit Estius in 4. distinct. 17. §. 2. dum vult mentem Synodi esse, Contritionem charitate perfectam, quandoque dumtaxat, justificare peccatorem ante actualem Sacramenti susceptionem: unde censet non semper, imò nec ordinariè, sed raro admodum contingere, ut habens Contritionem, qualem dicto loco describit Tridentinum, justificationem statim consequatur; hanc enim regulariter tunc primùm obtineri, quando postea Sacramentum actu suscipitur. Hæc Tridentini explicatio ab omnibus passim rejicitur, & meritò; Non enim dixit Synodus: contingit Contritionem esse charitate perfectam, & tunc aliquando hominem Deo reconciliare ante susceptum Sacramentum: sed ait, contingere aliquando Contritionem esse charitate perfectam; quia nempe Contritio genericè sumpta, quam definierat esse dolorem de peccatis, cum proposito non peccandi de cætero, non semper concipitur ex motivo illo perfecto amoris Dei super omnia, sed sæpe, imò communiter concipitur ex motivo metus gehennæ, vel turpitudinis peccati. Postquam autem dixit, Contritionem aliquando amore perfici, absolute & simpliciter addit, eam reconciliare hominem Deo, antequam hoc Sacramentum actu suscipiatur; adeoque affirmat, semper sic fieri justificationem, quoties peccator elicit actum istic descriptum.

Et ex hoc loco Tridentini sincerè intellecto putant omnes fideles, Contritionem, quæ oritur ex vera Dei super omnia dilectione, semper adferre remissionem præsentem peccatorum: Concilium enim pro eodem reputat, Contritionem esse charitate seu dilectione Dei perfectam, & reconciliare, licet neutrum sit de ratione omnis Contritionis, prout abstrahit à perfecta & imperfecta: sicut etiam discurrit Sylvius in editione quarta. Sic qui diceret, rationem genericam animalis quandoque contrahi per rugibilitatem, esseque Leonem, nullo modo diceret, animal sic contractum non semper, sed raro constituere Leonem.

E contra illi, qui aliam non agnoscunt Attritionem, nisi eam, quæ pro
motivo

motivo habet Deum propter se dilectum; mirum est quantopere laborent, quàmque inter se divisi sint in assignando actu Contritionis per se justificante.

292. Eximius P. Farvacques in sua Quodlibetica §. 5, scrupuli pag. 55, hunc præfigit titulum: *Expendatur, quæ sit Contritionem inter & Attritionem differentia*. Et interim contentus varias de hoc discrimine sententias protulisse, suam non edicit, sed manum tollit de tabula. Neque id miror: nam relictâ communi Doctorum sententiâ, à Tridentino clarè monstratâ, non est ubi quis pedem figat, cum nulla supersit solida ratio, cur discrimen unius actus ab alio petatur potius v. g. ab intensione, quàm ab extensione seu duratione, aut alia re quacumque. Imò cur non æquè cum Sacramento requiratur certa & determinata doloris intensio, duratio &c? Quod asserere, quid aliud esset; quàm universam poenitentiam reddere planè incertam, & infinitis anxietatibus obnoxiam?

293. Atque hoc solum argumentum sufficere ferè possêt; ad rejiciendam Adversariorum sententiam. Quis enim sibi persuadeat, in re obvia, & fidelibus ad salutem pernecessaria, etiam postquam super illa congregatum Concilium Tridentinum voluit claram & perspicuam doctrinam tradere, adeo obscurum in Ecclesia hæcenus mansisse, quid differant inter se actus ad justificationem peccatoris requisiti, tam intra, quàm extra Sacramentum, ut de illo dubitare viri etiam doctissimi videantur? Quænam, quæso, suppetet methodus Parochis, qua hominibus rudibus, aut parum doctis exponant, qua ratione sese ad reconciliationem cum Deo disponant, tum in Sacramento, tum etiam in casu, quando hoc suscipere necessitas prohibet.

294. Alii in hac Universitate, ut ex quorundam relatione intellexi, hoc statuunt discrimen, quòd Ateritio sit dolor ac detestatio peccatorum ex tali amore Dei, qui li. ficiat, ut vi illius homo superet eas tentationes, quæ illi in his circumstantiis status, loci, temporis &c. regulariter solent occurrere; non autem ut quascumque alias, quæ in diversis circumstantiis occurrerent; hoc enim si possit, dicunt fore veram contritionem. Hi ergo volunt requiri & sufficere amorem, qui non excludat positivè omnem voluntatem peccandi: non dubito autem, quin iidem subsidium peturi sint ab alio motivo, timoris vel spei, ut alterutro horum juncto voluntas peccandi planè excludatur.

Denique Eximius P. Lupus aggressus assignare discrimen inter duos hos actus, ea adtert, quæ nullus, quod sciam, ante ipsum scholasticus docuit, nec, ut arbitror, ullus post ipsum est probaturus. Vult autem ad justificationem extra Sacramentum necessario requiri amorem Dei super omnia perfectum: quis autem sit amor perfectus, hac ratione exponit.

295. Primò vult, ut Contritio, per se justificans sit efficax non tantùm affectivè

affectivè, sed etiam effectivè: adeo ut detestatio peccatorum & propositum ea cavendi in posterum, licet eliciatur ex puro & intenso Dei amore, non sit tamen vera contritio, si tantum sit efficax affectivè, seu quoad affectum, qui nunc adest, nisi simul sit efficax effectivè, seu quoad effectum, id est sic ut posthac cum effectu peccata omnia mortalia vitet, adeoque si postea rursus labatur in mortale, jam antecedenter non habuerit veram Contritionem. Hinc, quia D. Petrus, ad vocem ancillæ Christum negando, graviter peccavit, insert non habuisse antea amorem perfectum seu Contritionem per se justificantem, sed illum solummodò amorem, vi cuius accedente insuper Baptismi Sacramento fuerat antea justificatus. Addit reliquos omnes Apostolos, usque ad acceptum in Pentecoste Spiritum S. eidem infirmitati fuisse subiectos; adeoque, antequam confirmarentur in gratia, non habuisse amorem Dei perfectum, seu talem, qui ex statuta Dei lege requiritur ad remissionem peccati, absque actuali Sacramenti susceptione. Hæc videri possunt in Dissertatione Dogmatica cap. 5. & 6.

296. Secundò ad justificationem sine Sacramento obtinendam, asserit non sufficere charitatem Dei robustam, id est, ut explicat pag. 25. talem vi cuius suaves mundi libidines, & insuper tormentorum quorumvis, atque ipsius etiam mortis terrores, & violentias superare quis possit. Hanc tamen charitatem fatetur sufficere cum Sacramento.

297. Tertiò pag. 33. & seq. producit catechumenos divina charitate flagrantés, amarissima cordis contritione donatos, sagittatos divina charitate, insigniter contritos &c. ita ut ex illo amoris divini æstu totà quadragesimâ glaciatum solum nudis pedibus calcarent, dilectas antea suavitates cum gaudio dimitterent, valedicerent sæculo, renuntiarent possessionibus, easque in pauperes distribuerent, certarent usque ad mortem pro Christo &c. Hos tamen omnes asserit, non fuisse vi tantæ charitatis justificados, sed tunc primum eis remissa fuisse peccata, quando ad Baptismi lavacrum pervenerunt. Hinc quorundam agonizantium, absque actuali Baptismo, aut Pœnitentiæ Sacramento, justificationem asserit esse *HETEROCLYTAM & IRREGULAREM*. Additque *hanc esse vitam & unanimem omnium sub cælo Ecclesiæ doctrinam*. Quænam illæ Ecclesiæ sint, libenter fateor me ignorare; ignoravit etiam, ut videtur, is, qui in suo Centiloquio Sacramentali asseruit, doctrinam jam relata longissimè abesse à doctrina Apostolorum, & Patrum, ac totius Ecclesiæ sensu.

298. Quartò denique hinc insert pag. 36. quòd charitas, quæ sine actuali Sacramento Catechumenum, aut Pœnitentem infallibili lege justificat, sit sola charitas perfecta: perfecta autem charitas juxta eundem Auctorem est illa, quæ vivit patienter, delectabiliter moritur, & omnem rerum creaturarum affixum amorem in nobis extinguit.

Duplicis enim generis amores erga res creatas distinguit, nempe volaticos & affixivos: per volaticos intelligit illos, quibus sic afficiamur objectis creatis, ut tamen ea sine ullo doloris sensu amittamus, licet quandoque ea amando leviter delinquamus, seu, ut ipse explicat, licet aliquando adsint assensus levissimi ingeneratæ nobis concupiscentiæ. Hos amores volaticos negat obstat perfectæ charitati, aut ab hac expelli.

299. Amorem verò affixivum vocat illum, quo rebus temporalibus possessis vel speratis cor apponimus, quo eas menti nostræ agglutinamus, & quasi membra facimus; ideoque perdere aut non adipisci non possumus sine dolore; ita ut ejusmodi rerum amissio sit quasi animæ ex absente membro vulnus, adeoque illa statim gemitus aut lacrymas fundit, atque indiget medicina officiosæ consolationis. Ita loquitur P. Lupus pag. 26. ac subiungit: *Isiusmodi amores omnes perfecta charitati repugnare, & ab ipsa, ut perfecta sit, debere absumi, non solum Augustinus docet, aut Apostolus Paulus, sed res ipsa clamat: ea nempe charitas debet deletabiliter mori, ideoque non solum aurum, argentum, usque, filios, possessiones, sed & propriam vitam cum gaudio & desiderio depenere, quod fieri non possit, nisi extinctus sit omnis amor affixivus.* Asserit tamen hos amores affixivos (cum nihil minus non sint, nisi ut summum venialiter mali) nullo modo obesse illi Contritioni, quæ unâ cum Sacramento justificet.

300. Sentius igitur huius Auctoris est, quòd peccator quomodocumque demum ex amore Dei & quantumcumque de peccatis doleat, non possit tamen sine actualis Sacramenti consortio justificari, si erga rem quampiam creatam sic afficiatur, ut illam cum aliquo doloris sensu amitteret, vel non consequeretur. Hinc si conjux morti vicinus optet, vitam sibi à Deo prolongari, quòd res familiæ suæ componat, quòd uxori & liberis subveniat, quibus videt aliqui defore victui necessaria &c. & nihilominus mortem juxta Dei beneplacitum paratus sit acceptare, cum aliquo tamen dolore & gemitu, non poterit talis clicere Contritionem, quæ impetrandæ justificationi per se sufficiens sit: ac proinde si sit in mortali, ac desit copia Confessarii, actum est de æterna illius salute. Quòd idem locum habebit in casibus innumeris; si aliquo quispiam affectu feratur in divitiis; officium, honorem, famam, propinquos &c. qui affectus non sit ullo modo mortaliter malus, talis tamen ratione cujus doleret aut gerneret, si omnibus fortunis spoliaretur, si officio aut honore sine sua culpa privaretur, si famam amitteret, si apud omnes gravissimè infamaretur &c. Si, inquam, ad aliquid horum sic afficiatur, ut ad ejus amissionem, quasi ad vulnus corporis, doleret, gemitus aut lacrymas funderet, atque ita indigeret medicinâ officiosæ consolationis (quod contingere potest, licet ille affectus ne quidem sit venialiter malus) eo ipso incapax est, qui veræ Contritionis actum eliciat. Porro cum satis intelligat hic Autor, talem actum passim in hominibus esse quodammodo impossibi-

lem, fatetur Davidem, Magdalenam, aliosque non videri habuisse actum veræ Contritionis, sed ex speciali ac extraordinario Dei favore sine Contritione veniam peccatorum impetrasse, spem aliquam faciens fore, ut etiam nunc ex iis, qui in articulo mortis non habent copiam Sacramenti, aliqui quandoque cum sola attritione ejusdem favoris participes fiant.

Quæ omnia, licet facillimum id foret, quia tamen ad propositum nobis scopum non facit, hinc non refuto: quamquam, qui hanc illius Auctoris sententiam clarè tantummodo proposuerit, videri possit eam sufficienter refutasse. Satis sit ostendisse, quod desertâ communissimâ Auctorum, fidelium, ac ipsius Tridentini de Attritione doctrinâ, difficillimum sit, ne dicam impossibile, statuere, quid sit Contritio per se justificans; & qui id tentavit, eam Contritionem finxerit, de qua in necessitatis articulo eliciendâ potius desperent passim homines, quam ad eam nitantur.

Dum hæc postrema imprimerentur, incidi in Theses hinc in Hallis propugnatas 12. Februarii 1667. Præside. Eximio. D. Gerardo van Werm.: ubi inter alia hæc habentur:

Cap 3. Isaïz v. 12. *POPULE MEUS, QUI TE BEATUM DICUNT, IPSI TE DECIPIUNT.* Sic te hodie decipiunt qui te beatum & justificatum dicunt ex solo metu poenarum in Sacramento poenitentiae.

Hoc aut similibus S. Scripturæ testimoniis, licet quandoque utantur aliqui contra hæreticos, vel sententias manifestè erroneas sive hæreticas, vel ut tales ab Ecclesia, aut Supremo ejus in terris Capite damnatas: illis tamen uti contra verissimam, & omnium passim Catholicorum unanimem sententiam, ejusque Auctores, quid est aliud, quàm verbis S. Scripturæ abuti ad injustam censuram?

FINIS.

ERRATA SIC CORRIGE.

P Ag. 10. lin. 9. motito, *lege*, motivo. Pag. 15. lin. 17. nullum, *l.* nullam, Pag. 16. lin. 6. proinde.... eas, *l.* proinde....eam, ibidem lin. 28. transgredere-
rentur, *l.* transgredere-
retur, Pag. 29. lin. 17. perfectæ, *l.* perfectæ, Pag. 30. lin. 11. no-
scitur *l.* nascitur, Pag. 31. lin. 34. etiam *l.* & jam, Pag. 34. lin. 24. fatea-
mur *l.* fatemur.

pag. 92. nu. 218. lin. 3. à fine sic lege: Resp. quando per conjungitur alicui, quod potest esse motivum, passim usurpari pro *propter*. Quamquâ, quia Trid. ibi agit de actu timoris (utpote què definit non esse peccatū) incongruè dixisset *propter*: sensus ergo est, abstinere à peccatis per actu timoris, seu qui pro motivo habet poenas, idq; sine actu aut motivo ulteriori. Sic autè rectè intelligi Trid. non negabit P. Farvacques, nisi fateatur falsū esse, quod dicit pag. 45. *verbis D. Petri non continetur sola preparatio per motum timoris.* Idem patet ex text. 14. Can. 5. &c. perge pag. 93. lin. 4.